



This is a digital copy of a book that was preserved for generations on library shelves before it was carefully scanned by Google as part of a project to make the world's books discoverable online.

It has survived long enough for the copyright to expire and the book to enter the public domain. A public domain book is one that was never subject to copyright or whose legal copyright term has expired. Whether a book is in the public domain may vary country to country. Public domain books are our gateways to the past, representing a wealth of history, culture and knowledge that's often difficult to discover.

Marks, notations and other marginalia present in the original volume will appear in this file - a reminder of this book's long journey from the publisher to a library and finally to you.

Usage guidelines

Google is proud to partner with libraries to digitize public domain materials and make them widely accessible. Public domain books belong to the public and we are merely their custodians. Nevertheless, this work is expensive, so in order to keep providing this resource, we have taken steps to prevent abuse by commercial parties, including placing technical restrictions on automated querying.

We also ask that you:

- + *Make non-commercial use of the files* We designed Google Book Search for use by individuals, and we request that you use these files for personal, non-commercial purposes.
- + *Refrain from automated querying* Do not send automated queries of any sort to Google's system: If you are conducting research on machine translation, optical character recognition or other areas where access to a large amount of text is helpful, please contact us. We encourage the use of public domain materials for these purposes and may be able to help.
- + *Maintain attribution* The Google "watermark" you see on each file is essential for informing people about this project and helping them find additional materials through Google Book Search. Please do not remove it.
- + *Keep it legal* Whatever your use, remember that you are responsible for ensuring that what you are doing is legal. Do not assume that just because we believe a book is in the public domain for users in the United States, that the work is also in the public domain for users in other countries. Whether a book is still in copyright varies from country to country, and we can't offer guidance on whether any specific use of any specific book is allowed. Please do not assume that a book's appearance in Google Book Search means it can be used in any manner anywhere in the world. Copyright infringement liability can be quite severe.


About Google Book Search


Google's mission is to organize the world's information and to make it universally accessible and useful. Google Book Search helps readers discover the world's books while helping authors and publishers reach new audiences. You can search through the full text of this book on the web at <http://books.google.com/>


L0
10
718



Lo10.718







QUAESTIONES SAPPHICAE.

SCRIPSIT

Ivan Ivanovich Lunyats
PHIL. MAG. IOANNES LUNÁK.

ACCEDIT COROLLARIUM CRITICUM ATQUE EXEGETICUM AD OVIDIANAM
SAPPHUS EPISTULAM.

5 KAZANIAE.

MDCCLXXXVIII.

2010.718



Salisbury fund.

Печатается по опредѣленію историко-филологическаго факультета,
15 декабря 1888 года.

Деканъ Д. Вѣляевъ.

Typis Universitatis Caesaris litterarum Kazaniensis.

55

PRAEFATIO.

Scribenti commentationem consilio auspicioque litteris eruditissimi summaque auctoritate florentis viri haud pauca ex usu esse solent, imprimis vero id, quod iam inde ab opere incepto spe minime falsa nititur se neque oleum neque operam perditurum esse librumque et summi fautoris et eorum qui partes eius sequuntur faustis acclamationibus acceptum iri. At qui suo Marte aliquam quaestionem tractandam suscipit, multis incommodis obviam it, quorum numerus augetur, si opiniones quasdam iis, quae vulgo probantur, contrarias offerre atque sustentare non vereatur.

Quae cum me usu expertum minime fugerint, tamen Sapphus vitae aliquot capitum retractandorum opus meo periculo suscipere non gravatus opiniones, quibus fere omnium hominum litteratorum mentes hodie imbutae sunt, impugnare labefactare ad nihilum redigere institui. Quod enim plerisque obsistit, qui in magistrorum verba iurantes verecunde eorum sententias repetunt, inde equidem nulli addictus ludo ad rem ipsam plurimum utilitatis percipere potui. Veterum enim de poetria testimonia cum maximam partem a posterioribus scriptoribus, imprimis Suida, servata sint, hominibus doctis plerumque suspecta esse videntur. Quare factum est, ut hodie Sapphus vitae descriptio, omissis iis, de quibus addubitatur, artissimis finibus circumscripta evaserit. Quae via atque ratio

IV

si continuabitur, ita ut Herodoti quoque fides atque auctoritas, (quod iam factum est), in dubium vocetur, quidam ex posteris Graecarum litterarum historiae scriptoribus ita suam de poetria narrationem incipiat necesse erit: „Transeo ad Sapphonem, de cuius vita nihil quidquam constat“.

Itaque cum haec arena in dies magis magisque contrahatur, in componendis concinnandisque Sapphus carminum fragmentis indeque de poetria concludendo homines docti certatim operam ponunt quam diligentissimam. Quae ingenii acuminis exercitatio quamquam amoenissima est, cum qui e fragmentis frustulisque totum tamquam refingere atque restaurare conatur, ipse quodammodo auctoris vice fungatur, tamen nostram poetriae notitiam minime promovet, cum uni feliciter atque acute excogitatae opinioni duae vel plures non minus argutae opponi possint, nec habeas, quo nisus hanc vel illam refellas aut recipias. Quae via quam lubrica sit, exemplis plenum facere supersedebimus.

Cum igitur et argutiolarum numerum augere et ad dubia dubia aggregare noluerim, alia via mihi ingredienda fuit. Quapropter in Sapphus vita retractanda ad illum fontem regrediendum esse duxi, qui hodie plerumque immerito neglegitur. Constat enim in Ovidianarum Heroidum numero Sapphus quoque ad Phaonem epistulam exstare, cui plurimas res ad vitam poetriae pertinentes amplexae nulla vel minima fides fere ab omnibus recentioribus hominibus doctis habetur, cum et epistulam spuriam et eum, a quo conglutinata est. sua maximam partem ab antiquis Graecorum comicis poetis mutuatum esse in vulgus credatur. Priorem opinionem falsam esse hodie iam nonnulli sunt qui concedant; quaedam, in quibus adhuc offendebatur, nos quoque in corollario huic dissertationi adiuncto tollere studebimus. Cardo autem huius commentationis in altera quaestione solvenda versatur. In quo opere

officio nostro ita functi sumus, ut in priore eius parte compluribus Ovidianis locis cum Sapphus fragmentis collatis ostenderimus Romanum poetam non e comoediis, sed ex ipsis poëtriae carminibus plurima deprompsisse, adhibita praeterea antiqua quadam poëtriae vita, ex qua pauca tantum delibavit. Ita factum est, ut multis, quae antea incerta esse putabantur, hac nova ansa confirmata stabilitaque fides addita sit. Cum vero demonstrantis sit non solum sua fulcire, sed etiam, quae contra faciant, infirmare labefactare refutare, nos quoque nonnullas de Sapphone tritas sententias reicere, aliis novas opponere studuimus: quae posteriore huius lucubrationis parte continentur.

Quod autem ad viam et rationem attinet, qua in disserendo utebamur, plerumque imprimis in posteriore parte Letronnii illius sententiam amplexi sequebamur, quam Panofka (v. Abhandlungen der Berlin. Akad. der Wissensch. a. 1849 p. 107) commemorans laudavit. „Je les invite, (inquit ille), à ne pas craindre... de s'écarter de l'opinion commune et de proposer les conjectures, qui leur sembleraient probables... Quand on a l'analogie pour soi, il ne faut pas se laisser arrêter par la crainte de ne pas rencontrer juste. C'est un petit malheur dont on devra même s'applaudir, si... on a pu suggérer des vues ou des recherches nouvelles“.

De uno tantum me excusatum velim, quod ipse quoque haud raro molestissime ferebam; quod enim Ovidius Tomis exsulans de librorum inopia questus est, id mihi quoque in urbe libris minime abundante et a copiosis bibliothecis remotissima degenti lamentandum fuit: multos libros eosque dignos, qui accuratius evolverentur, ne inspicere quidem licuit; alios, quos iam pridem excusseram, in retractando perpoliendoque opusculo iterum adeundi potestate carebam. Quae cuncta impedimento fuerunt, quominus dissertationem undique perfectam

VI

et absolutam atque contra strenuorum iudicum censuras satis munitam emitterem. Attamen cum summam eius minime in priorum opinionibus colligendis, sed in iis, quae ipse enucleassem, iudiciis doctorum hominum proponendis esse voluerim, temporis angustiis coactus chartas intus positas nonnum in annum premere nolui.

Scribebam Kazaniae Kal. Decembribus a. MDCCCLXXXVIII.



ARGUMENTUM.

PARS PRIOR.

De Ovidianae Sapphus epistulae fontibus (pp. 2—62).

Prolegomena (pp. 2—12). — Caput I: De Sapphus carminibus, Ovidianae Sapphus epistulae fonte primario (pp. 13—43). — Appendix: De Anthologiae Graecae epigrammatum ab Ovidio in Sapphus epistula imitando expressorum vestigiis (pp. 44—47). — Caput II: Ex quonam fonte Ovidius alias quasdam res ad Sapphus vitam pertinentes hausisse videatur (pp. 48—59). — Appendix: De duabus Sapphonibus (pp. 59—62).

PARS POSTERIOR.

Sapphus notitiae complendae corrigendaeque experimentum
(pp. 65—94).

Exordium (pp. 65—66). — De Phaone, Sapphus amasio (pp. 66—68). — De Sapphus in Siciliam fuga (pp. 68—72). — De Phaonis in Siciliam fuga (pp. 72—73). — De Phaonis nomine (pp. 73—76). — De Sapphus nomine (pp. 76—79). — De amphorae Sanmartinensis titulo explicando (p. 80). — De Cercolae, Sapphus mariti, nomine et patria (pp. 80—86). — De Cleide, Cercolae et Sapphus filia (pp. 87—88). — De Anactoria et Cydnone, Sapphus amicis (pp. 88—90). — De Sapphus epigrammatis (pp. 90—91). — Epilogus (pp. 91—94).

COROLLARIUM

criticum atque exegeticum ad Ovidianam Sapphus epistulam
(pp. 97—114).

Prooemium (p. 97). — De Erichthone (pp. 98—101). — Vv. Epistulae 33a, 34a explicantur et Ovidio vindicantur (pp. 101—105). — Quid statuendum sit de epistulae vocabulis: chelys, barbitos (pp. 105—106), aequoreae (pp. 106—107), Lesbi puella (pp. 107—108). — De epist. v. 7 lacuna explenda (pp. 108—109). — De obscenis rebus ab Ovidio tractatis (p. 110). — De Sapphus diffamatae crimine Ovidio falso obiecto (pp. 111—114). — Epilogus (p. 114).

INDEX LOCORUM,

qui in hac commentatione corriguntur vel explicantur (p. 115).

PARS PRIOR.

DE OVIDIANAE SAPPHUS EPISTULAE

FONTIBUS.

Ἐτερος ἐξ ἑτέρου σοφὸς τό τε πάλαι τό τε νῦν.
Bacchylid. fr. 14.

PROLEGOMENA.

In melica Graecorum carmina quantum iniuria temporum grassata esset, nemo est qui non sexcenties deploraverit. Cum et in Alexandrinis et in Pergamenis bibliothecis praeclara Graecorum ingenii monumenta eius generis exstiterint, ad nos exceptis Pindari epiniciis perpaucissimisque ceterorum odis integris exilia carminum melicorum fragmenta depravata corrupta saepius sensu cassa forte fortuna pervenerunt, ex quibus Graecorum poesis melicae praestantiam non cognoscere, sed tantum divinare vel ubi plurimum ut ita dicam primis lineis designare licet.

Jam quaeritur quae potissimum causae fuerint, propter quas imprimis melica poesis tam manca atque decurtata posteritati tradita esset. Non dubitari potest quin prima gravissimae causa posita sit in aeolicae atque doricae dialecti difficultatibus, quibus non solum latini, sed etiam graeci homines deterriti sunt, quominus illis carminibus ediscendis describendis propagandis operam navarent. Quod verum esse et innumerabiles glossae e melicis carminibus petitae testantur et antiquorum nonnulli ipsi libere fatentur, ut Didymus, qui in scholiis ad Aristophan. Thesmophor. v. 169: οὐ γάρ, inquit, ἐπεπόλαζε τὰ Ἀλκαίου διὰ τὴν διὰ λέκτοιν. Porro Dionysius quoque Halicarnassensis de vet. script. cens. s. v. Ἀλκαῖος haec censet: Ἀλκαίου δὲ σκόπει τὸ

μεγαλοφυνές... μετὰ σαφηνείας, ὅσον αὐτῆς μὴ τῇ διαλέκτῳ τι κεκἀκωται. Apuleius quoque (Apolog. p. 413 rec. Elmenhorst) de insolentia linguae mulieris Lesbiae queritur *). Quae nihilosecius aetatem tulerunt, iis iam posterioribus temporibus alius isque implacabilior hostis exstitit: homines enim fanatici inde originem morum corruptorum duci arbitrati **) caeco furore acti illos melicae poesis flores tamquam tabem quandam in ignem coniciebant, ut e loco a Fabricio (Biblioth. Graec. T. I p. 733) allato patet. „Dolendum est“, inquit ille, „sacerdotes Graecos Byzantinos effecisse, ut Mimnermi Sapphus Bionis aliorumque carmina amatoria, teste papa Leone X in Alcyonii libro I de exilio p. 69, nefarie comburerentur“.

Quae cum ita essent, recentiores haud facili labore suscepto omnes antiquorum litteras perscrutati disiectos lyricorum Graecorum pannos conquirebant colligebant consuebant. Qui labor imprimis Bergkii illius opera fere ad finem perductus esse videtur, nisi Aegyptiorum tumuli vel lapides carminibus incisis decorati sagacitatem indagantium hucusque fallunt.

At non solum carmina, sed etiam vitae melicorum poetarum ceteraque veterum de iis testimonia haud raro tam foede posteriorum commentis aucta atque depravata sunt, ut nonnunquam aegre vera a fictis discernere queas. Quod quamquam reliquis quoque Graecorum scriptoribus accidit, tamen in his ipsius auctoris verbis adiuti saepissime propius vero accedere possumus; quam viam in refingendis lyricorum vitis

*) V. Welcker. Kl. Schriften II p. 120 ann. 68.

**) Propter eandem causam iam antiquitus Valerio Maximo teste (V, 3) Spartani Archilochi carmina finibus suis prohibuerunt. Contra Pindari epinicia potissimum ethicae sententiae, quas poeta argumentis odarum intexuit, ab interitu servaverunt.

raro tantum inire licet; audacius autem procedenti evenit, ut in locum veterum errorum sua ipsius haud minus ambigua commenta restituat.

Inter ceteras lyricorum fragmentorum sedes latinae quoque litterae haud pauca auxilia ad restaurandam huius generis Graecorum poesis genuinam formam suppeditare solent, cum latini scriptores variis occasionibus oblatis Graecorum carmina converterint vel imitando expresserint. Quem fontem gravissimi momenti esse Bergkii Poetae lyriici Graeci passim satis superque testantur, cui et in corrigendis et in coniungendis lyricorum verbis ad latinos homines refugienti non semel contigit, ut summa cum veri similitudine locos difficiles expederit *).

- Quo magis mirandum est homines litteratos hucusque fere intactam reliquisse Sapphus ad Phaónem epistolam inter Ovidii Heroides decimum quintum locum obtinentem, quae ex CCXXII versibus constans **) miram quandam versuum sententiarum singularum vocum farraginem habet, quae latinus poeta ex Sapphicis carminibus mutuatus aut integra aut prout ei videbatur decurtata atque mutila in usum suum convertit. Quam rem priores Sapphus fragmentorum enarratores fugisse non est cur miremur; quomodo vero Bergkii diligentiam, duobus tantum locis illius epistolae versus cum Sapphus genuinis verbis comparantis latere potuerit, vix intellegi potest. In ipsius quoque Heroidis commentariis a nullo poetriae carminum reliquiae ita ut par erat comparandi causa allatae sunt, ne a Vriesio quidem Batavo, qui eam epistolam commentario

*) Sane est concedendum hoc adminiculum in lyricorum Graecorum verbis restaurandis non semper adhiberi posse, cum latini homines interdum non verbum e verbo expresserint, sed leviter tantum Graecorum mentem attigerint, alias ipsi eiusmodi versus panxerint, alias Graeca verba parum intellexerint vel perverse interpretati sint. Quae cuncta consideranti in hac lubrica via cautio adhibenda est quam diligentissima.

**) Cf. infra pp. 101—105.

critico atque exegetico copiosissimo instructam ante hos tres annos separatim edidit *). Si autem demonstratum erit—quoad id fieri potest—latinum poetam ex ipsis Sapphus carminibus hausisse, tum multa, quae imprimis de vita poetriae ab hominibus doctis illa epistula fretis tantum dubitanter prolata sunt, magis stabiliri poterunt.

Haec sunt quae me ad eam quaestionem accuratius tractandam permoverint. Itaque demonstrare conabor primum quae manifesta Sapphus carminum vestigia in illa epistula exstent, tum unde auctor eius alia sumpsisse videatur. Antequam vero ad id quod mihi propositum est accedam, pauca de epistulae auctore atque origine praemittere recentiorumque de ea sententias perlustrare non supervacaneum esse censeo.

Sapphus ad Phaonem epistolam quisnam scripsisset inter homines doctos iam in varias partes disputabatur. Ovidius Amor. II, 18 Heroides suas recensens Sapphus epistolae a se scriptae ipse his verbis mentionem facit (v. 26):

Scribimus . . quod . .

Dicat et Aeoliae Lesbis amica lyrae.

Cum vero ea Sapphus epistula quam nos habemus in vetustioribus Heroidum libris manuscriptis non exstet, in recentioribus autem aut ceteris Heroidibus annexa sit aut separatim circumferatur, suspicio orta est eam a posteriorum temporum versificatore quodam genuinis Ovidianis carminibus ad imitandum propositis compilatisque confectam et ceteris epistulis assutam esse. Ex titulis autem eius epistolae in libris manuscriptis exstantibus colligi potest eam Ovidio auctori plerumque assignatam esse; in multis codicibus titulo caret; alias vero, ut in codice Parisino 7989 Vriesio teste (l. l. p. 9)

*) «Epistula Sapphus ad Phaonem. Scripsit S. G. de Vries. Lugduni Batavorum, MDCCCLXXXV».

hoc modo inscripta est: „Sapphos Lesbica vates ad Phaonem. Ex Graecis in latinas litteras versa per Nasonem Sulmonensem, ut ferunt nonnulli, epistola aurea“. Itaque non mirandum est Domitium quoque Calderinum haesitasse, utrum eam epistolam ipsi poetriae, an Ovidio ascriberet *).

Hominum litteratorum longa series inde ab Egnatio, ut Heinsius, Ciofanus, Burmannus, Naugerus, Micyllus, quorum annotationes ad hanc Heroidem integras Jo. Chr. Wolfius collegit **), epistolam Ovidianam esse persuasum habebant. Primus, qui eam in suspicionem vocavit, Welckero teste (l. l. p. 118) Fr. Xav. Werferus fuit, cuius lectiones in Ovidii Heroides in Actorum philol. Monac. T. I impressae J. V. Franckium commoverunt, ut in Addendis ad librum, qui inscribitur „Callinus, sive de carm. eleg. origine“ Ovidium eius auctorem esse negaret. Quae sententia valde arrisit recentioribus imprimis Germaniae philologis, ut Schneidewino, Loersio, Mählyo, Diltheyo, Luciano Müllero, Merkelio, Bernhardy, Schoenio, Riesio, Wolfr. Zingerlio, aliis; imprimis vero Lachmanni illius *κρίτικαὶ ἀπορίαι* auctoritas plurimos retinuit, quominus eam opinionem respuerent. Welcker ipse eam epistolam genuinam esse putabat, cum Werferi sententiam incertam atque nimis artificiosam esse diceret (ibid. p. 119); locos autem, in quibus homines docti offendeabant, coniciendo atque corrigendo emendare studebat. Neue quoque in Sapphonis Mytilenaeae fragmentis singulari libro a. 1827 Berolini editis et Mure Anglosaxus illa epistula uti non dubitabant. Ex recentissimis autem Comparetti, nobilis Italiae classicorum

*) Cf. Welcker. Sappho von einem herrschenden Vorurtheil befreit. Göttingen, 1816, p. 129.

**) V. eius «Sapphus, poetriae Lesbiae, fragmenta et elogia». Londini. MDCCXXXIII, pp. 181—218.

studiorum propagator, a. 1876 illam Heroidem Ovidio restituere conatus est in disquisitione quae inscribitur: „Sulla epistola Ovidiana di Saffo a Faone“, vide Pubblicazioni del Instituto di Studi Superiori in Firenze, II, 1, a. Cui astipulatus est Bährens, qui in litteris ad Comparettium datis *) complures eius epistulae locos explicabat atque emendabat. In quam quaestionem denique Vries quoque quam sollertissime inquisivit, qui l. l. plurimis locis ex Ovidianis carminibus conquisitis, quibus Ovidianum dicendi genus fere singulis versibus deprehendi procul dubio demonstratum est, Nasoni illud 'breve opus' vindicavit. Quibus commotus Sedlmayer Vindobonensis, qui a. 1886 Heroides apparatu critico instructas edidit, Sapphus epistolam iam suo loco (XV) exprimendam curavit **); quem locum antiquissimis quoque temporibus eam obtinuisse Excerpta Parisina in lucem protracta testantur ***). Itaque hodie iam fere nulli nisi toti plumbei de Ovidio eius epistulae auctore dubitant, ut Ehwald Gothanus in censura eorum quae recentissime de Ovidio scripta sunt ****). Haec hactenus.

Quibus absolutis iam originem huius epistulae investigemus. Seneca patre teste *****) Ovidius iuvenis apud Arel-
lium Fuscum rhetoricis studiis operam navabat; qui ab alio quoque rhetore, Latronem dico, nonnullas sententias mutuat-
us in usum suum convertit, ut Metam. XIII, 121 sq., Amor. I, 2, 11 sq. Ex duobus autem dicendi generibus, quae tum in rhetorum scholis florebant, quorum alterum suasorias, alterum controversias amplectebatur, Ovidius eodem rhetore

*) V. Rivista di Filologia, a. 1884, pp. 1—21.—Itatorum opusculis uti mihi non contigisse valde doleo.

**) Cf. eius Praefat. p. XII.

***) V. Vries l. l. p. 2 sq.

****) V. Bursian's Jahresbericht T. XLIII pp. 125—282 coll. Ovidii T. I apud Teubnerum nuper edito.

*****) Cf. Controvers. l. II c. 8 sqq. (ed. Kiessling), coll. Teuffel. Geschichte der röm. Literatur (ed. 3) p. 523.

teste (ibid. c. 12) suasorias praeferebat, utpote cui omnis argumentatio molesta esset. Ad suasorias vero Quintilianus *prosopopoeas* quoque refert, cuius verba integra exscribam *). „Ideoque“, inquit, „longe mihi difficillimae videntur *prosopopoeae*, in quibus ad reliquum suasoriae laborem accedit etiam *personae difficultas*. Namque idem illud aliter Caesar aliter Cicero aliter Cato suadere debet. Utilissima vero haec exercitatio, vel quod duplicis est operis, vel quod poetis quoque aut historiarum futuris scriptoribus plurimum confert“. Itaque declamatori, priusquam ad componendam eiusmodi orationem accederet, ἡ θ ο ς h. e. *mores* eius quem loquentem faciebāt, penitus cognoscendi erant, ut ad eos totam orationem accommodaret. Quod rhetoricarum exercitationum genus Ovidius cum Sabino poeta ad eroticam poesin sese transtulisse ipse testatur **): noster scribebat epistulas, Sabinus autem responsa (cf. *Amor.* II, 18 vv. 21—34). Itaque ut ad Sapphus epistolam redeamus, Ovidio, cum sibi proposuisset epistolam amatoriam poetriae ad Phaonem amasium componere, si recte munere suo fungi voluit, ad Sapphus carmina penitus ediscenda confugiendum erat ***); quae amicissimo sibi C. Julio Hygino

*) *Instit. orat.* l. III c. 8 § 49. — *Prosopopoeam* autem Apsines rhetor ita definit (Spengel. *Rhett. gr.* I p. 386): ἔστι μὲν οὖν προσωποποιὰ παραγόμενον πρόσωπον τὸ οὐκ εἰς τὸ διναστήριον παρόν, ἀποδημῶν κτλ. Cf. Volkmann. *Die Rhetorik der Griechen u. Römer* (ed. 2) p. 280.

**) *V. Art. am.* l. III v. 346 coll. Teuffel. l. l. p. 527 ann. 3.

***) Simili modo posteriores Byzantini versificatores eroticorum carminum materiam ex antiquioribus poetis mutuabantur; cf. in Bergkii *Appendice Anacreont.* p. 351: *Κωνσταντίνου φιδάριον ἐρωτικὸν λαβόντος τῇ νύπιοθ' ἐσιν ἔκ με λωδίας τινός.* Totum autem eius poesis genus cf. cum Ioannis Gazaei cantiuncula quae inscribitur: *Τίνας εἶποι λόγους ἡ Ἀφροδίτη ξητοῦσα τὸν Ἀδωνιν*, ibid. p. 347.

Palatinae bibliothecae praefecto *) intercedente sibi comparare potuit. Poetam vero minime obiter Sapphus carmina perlustrasse, quod ex Teuffelii verbis l. l. de omnibus epistulis in universum prolatis concludere possis **), docebunt ea, quae infra afferemus.

Sane fieri potest ut ea quae supra de epistolae auctore collecta summatim exposuimus, nonnemo ad quaestionem a nobis institutam minus pertinere arbitretur. Quod tamen falsum esse statim monstrabimus. Nam quo quis minus de Ovidio epistolae auctore dubitabat, eo saepius atque libentius ex ea singula depromebat, quae imprimis ad Sapphus vitam describendam pertinerent. Ita Schoene in illis de poetriae vita lucubrationibus de industria se ea uti noluisse ait, cum sine ulla dubitatione non esset Ovidiana ***). Longe aliter facit Welcker, qui l. l. p. 117 ann. 66 subscribens Domitii Calderini atque Egnatii sententiam, qui eam epistolam omnium optimam esse censuerunt, haec addit: „Es ist nicht unwahrscheinlich, dass ausser einigen Lebensumständen auch ein paar andere Erinnerungen aus den Sapphischen Liedern darin vorkommen“ ****). Idem p. 138 ann. 73 Ovidium Sapphus carmina

*) Vide Sueton. de grammat. c. 20.

**) «Ovid hat sich das Versetzen in bestimmte Zeiten und Lagen ziemlich leicht gemacht».—Ceterum Teuffel Sapphus epistolam spuriam esse censuit.

***). V. Symbola philologorum Bonnensium in honorem Fr. Ritschelii, p. 760: «Mit Absicht habe ich eine der jüngeren Quellen für die Lebensgeschichte der Sappho... bei Seite gelassen, die vielberufene 15-e Heroide des Ovidius... sie ist mit Sicherheit dem Ovidius abgesprochen worden».

****) Ceterum similem sententiam iam Heinsius a. 1775 ita expressit: «Es sind einige Stellen darin, denen man ohngeachtet der Verunstaltung, die sie erlitten, noch ansehen kann, dass sie aus den Gedichten genommen sind, die Sappho an den Mann schrieb, aus Liebe für welchen sie starb». (V. Welcker. Kl. Schriften II p. 143).

ad verbum edidicisse haud improbabiler conicit. Ceterum praeter poetriae carmina Ovidium comoedias quoque Graecorum inspexisse atque inde quaedam deprompsisse l. l. pp. 107, 109, 124 sumit, ad quam opinionem infra revertemur.

Welckeri vestigiis quidam eorum institerunt, qui post eum eandem quaestionem tractabant, quamquam nemo in eam rem, quam ille solum ut ita dicam adumbravit, accuratius inquisivit. Quorum Neue primo loco nominandus est, qui l. l. saepius in Sapphus vita delineanda illam Heroidem laudavit, quamquam iam prima pagina ὑποθετικῶς addit: „Si fides debetur Ovidio“. Mure quoque, qui in libro qui inscribitur: „History of Grecian literature“, vol. III p. 272 sqq. et in Museo Rhenano (N. S. XII, a. 1857) poetriam nimis severa censura perstrinxit, invectivas suas argumentis ab Ovidio petitis sustentabat *).

Attamen ii quoque, qui epistulam spuriam esse persuasum habent, auctorem eius nonnulla ex ipsis Sapphus carminibus mutuatum esse concedunt, ut Kock, qui etiamsi in libro suo **) eam sordidam et plebeiam appellat, tamen ibid. hoc modo ratiocinatur: „Was sollte den Verfasser gehindert haben... eine Menge von Zügen zu benutzen, die ihrerseits wirklich den Gedichten der Sappho entlehnt waren? Denn dass solche in der Epistel, von wem immer sie herrühren mag, enthalten sind, ist nicht zu be-

Ipsam vero Heroidem idem famosum carmen (Pasquill) appellavit (v. ibidem), quod a lascivissimo Romanorum poetarum Ovidio prima inventute cum poetriae infamia editum esset.

*) Appono eius verba (Mus. Rhen. l. l. 589): «Ovid... in full possession of her works, and of all subsidiary aids to their interpretation... was singularly qualified to judge...» Et porro p. 592: «There can be no doubt that Ovid's letter to Phaon mentions every more prominent fact of her life transmitted on her own authority».

**) «Alkaios u. Sappho» (Berlin, 1862) p. 68 sq.

zweifeln“. Idem Bernhardy quoque concedit, quamquam ipsam Heroidem nihili facit; en eius verba *): „Die funfzehnte Heroide bei Ovid... bietet auch alte Notizen und Welcker hat ihr immer Vertrauen geschenkt; das Gedicht ist aber zu spät und mittelmässig um in Betracht zu kommen“.

Haec erant, quae nobis praemittenda esse viderentur; e quibus facile intellegi potest laborem a nobis pro virili parte susceptum haud supervacaneum fore, cum in tanta opinionum varietate et veterum de poetria testimoniorum inopia et fluctuatione quaedam a nobis reperta esse persuasum habeamus, quae in quaestione tot nominibus difficili atque contorta aliquid lucis afferre videantur.



*) In libro „Grundriss der griech. Literatur (ed. 3) II, 1, p. 675.

Caput I.

De Sapphus carminibus Ovidianae Sapphus epistulae fonte primario.

Nemo est quem fugiat Ovidium per multa saecula ingeniosissimum Romanorum poetarum habitum esse*). Quae opinio recentioribus temporibus, cum in fontes atque auxilia, quibus Naso utebatur, homines docti accuratius inquirere coepissent, magis magisque immutabatur, ita ut hodie haud quisquam reperiatur, qui eam sustentare audeat, et quidem iure: ubi enim est illud ingenium, quod summis laudibus efferri solebat, si in Ovidianis innumerabilia vestigia et Graecorum et Romanorum carminum ubique exstant? Transformationes, Fasti, Heroides, alia scatent eiusmodi exemplis, quorum numerus certe longe maior evaderet, si Graecorum Romanorumque scriptis fata pepercissent. Unde sequitur illam poetae ingenii laudem in maius auctam esse Ovidiumque potius in doctorum poetarum numerum redigendum esse, qui sollertissime fabulas argumentaque undique colligeret**) et quae collegisset apte venusteque in versus redigeret; qua facultate ceteros Romanorum poetas ab eo longe superatos esse non

*) Cf. iam Senecae (Quaest. nat. III, 27, 13) iudicium, qui Ovidium ingeniosissimum poetarum appellavit.

**) Cf. Ehwaldii sententiam l. l. p. 174: «Wir haben es vielfach, wo wir Ovidisches Eigenthum zu besitzen glauben, nur mit umgeprägter Münze zu thun».

est cur infitieris *). Ceterum Ovidius ipse de suo ingenio non aliter iudicabat, quod eius modesta verba Trist. III, 14, 33 sq. testantur:

Ingenium fregere meum mala, cuius et ante

Fons infecundus parvaque vena fuit.

Itaque Tomis exsulans gravissime ferebat se destitutum esse bibliothecis, ut ibid. v. 37 sq. legimus:

Non hic librorum, per quos inviter alar-
que,

Copia.

Et sane ea carmina, quae Ovidius in exsilio scripsit, fere omnium consensu plerumque taedium excitant nec digna sunt quae 'noctura diurna manu versentur', quod minime accidisset, si poeta a natura largiore ingenio praeditus esset.

Proximis annis homines litterati praecipue Ovidianarum Heroidum fontes scrutabantur, qui labor minime successu caruit. Ita in Phaedram (IV) et Laodamiam (XIII) Maximilianus Mayer accuratius inquisivit**), Medae autem (XII) et Hypermnestrae (XIV) fontes Birt sollerter examinavit***). Romanos quoque poetas haud pauca Ovidio suppeditas ad Heroides exornandas, ut Catullum ad Ariadnen (X), Vergilium ad Didonem (VII), docuit Zingerle ****).

*) Rohde de hac Ovidii facultate ita indicavit: «Die Stärke seines Talents liegt in der unvergleichlichen Leichtigkeit eines breiten und geistreichen Pinsels, in der Beweglichkeit und unversieglich strömenden Füllesicherer und sinnlich reicher Gestaltungskraft». Cf. Der griech. Roman. p. 126.

**) Vide eius «De Euripidis mythopoeia capita duo» (Berolini, a. 1883) p. 65 sqq. et Hermes XX (1885) p. 101 sqq.—Prioris libri notitiam Ehwaldio debeo.

***) V. Rhein. Mus. XXXII, pp. 401 sqq., 408 sqq.—In Medea Birtii sollertiam v. 162 fugit: «(Coniuge), qui nobis omnia solus erat». Qui pentameter imitando expressus est ex Eurip. Med. v. 228: ἐν ᾧ γὰρ ἦν μοι πᾶντα.

****) In libro «Ovid und sein Verhältniss» etc. I, p. 50; II, p. 54.

Itaque cum ceterarum Heroidum complures accuratissime cum iis carminibus, unde eas ductas esse verisimile videbatur, comparatae essent, in Sapphus epistolam ante Birtium nemo diligentius inquisivit; quae in commentariis, ut in Wolfianis notis variorum, apud Welckerum, Bergkium, Vriesium collata inveniuntur, paucissima sunt et solum tamquam in praetereundo annotata. Cuius primaria causa haec mihi esse videtur: recentiores cum eam Heroidem a genuinorum Ovidii carminum imitatore quodam conglutinatam esse putarent, ne dignam quidem arbitrabantur, cui operam atque oleum impenderent.

Birtii, qui primus, ut iam diximus, accuratius eam quaestionem tractavit, opinio eo inclinatur, ut auctorem huius epistolae Callimachi exemplum secutum esse statuatur, quem in Aetiis de Sapphus quoque erga Phaonem amore narrasse persuasum habet; quam sententiam in „Appendice“ sub finem „Animadversionum“ adiecta comparatis compluribus epistolae locis cum Callimacheis fragmentis demonstrare conatur. Quae opinio quam infirmis adminiculis nitatur primum ex eo sequitur, quod non solum de tali Callimacheo carmine in eius Aetia inserto nihil memoriae proditum est, sed ne de ipsorum quidem Aetiorum argumento in universum quidquam certi compertum habemus. Fragmentorum autem, quae vir doctus ad fulciendam sententiam attulit, plurima pars ex incertis desumpta est; at ea quoque, quorum Callimachea origo procul dubio est, ita comparata sunt, ut sana mente et sine studio ea perpendens similitudinem aut nullam aut valde dubiam statuas *). Attamen ne mea nimis amare videar,

*) Ceterum ipse auctor quamquam l. l. p. 400 in ann. sese «ex arena funem facere» negat, tamen in Appendice (p. 430 sqq.) epistolae versus cum Callimacheis plerumque dubitanter componit neque rem a se profligatam esse contendit.

infra aliquot exempla a Birtio comparandi causa protracta afferam, quo magis perspicui possit Romani poetae verba propius ad Sapphica quam ad Alexandrina fragmenta accedere *).

Sane mirandum est cuiquam in mentem venisse, ut in Callimacheis, non autem in Sapphicis primum epistolae fontem quaereret: si enim Ovidius Sapphus personam inducere atque eius ἡθὺς accuratissime describere volebat, nihil perversius fecisset, quam si ad Alexandrinorum poetarum quendam confugisset, praesertim cum et ipsius Sapphus carmina tum praesto essent et ab ipso poeta quam diligentissime edicerentur, quod luce clarius Rem. Amor. v. 761 ipse testatur, cum dicit:

„Me certo Sappho meliorem fecit amicae“.

Itaque his praemissis iam ad id quod promisimus accedamus.

Ovidiana Sapphus epistula cum opere musivo commode comparari potest, in quo gemmarum vice eae sententiae funguntur, quas poeta Romanus ex Sapphus carminibus in suam Heroidem transtulit; quarum amplexus et forma variat. Primum enim toti versus inveniuntur, non quidem ad verbum e Graeca lingua in latinam conversi, sed tam similes sententias exprimentes, ut in iis haud dubias poetriae verborum imagines reperiamus **).

*) Ehwald quoque l. l. p. 222 de Alexandrino huius epistolae fonte loquitur.

**) Eadem convertendi vel potius imitando exprimendi ratio alias quoque apud Ovidium deprehenditur, cuius saltem duo exempla hic afferam. Eurip. Med. v. 395 sqq.:

μὰ τὴν θέσπουναν, ἣν ἐγὼ σέβω
μάλιστα πάντων καὶ ξυνεργὸν εἰλόμην,
Ἐκ ά τ η ν

I.

Epist. vv. 9 in., 13—14 Sapph. frag. 90 respondent; utroque enim loco ostenditur puellam amore impediri, quominus solito opere fungatur:

Uror..

Nec mihi, dispositis quae iungam carmina nervis,
Proveniunt.

Γλύκεια υᾶτερ, οὕτοι δύναι κρέκην τὸν
ἔστον,

πόθῳ δάμεισα παῖδος βραδύναν δι' Ἀφροδίταν*).

Apud Ovidium enim Sapphus solitum opus sunt carmina pangenda, illius autem puellae, quam poetria in graeco fragmento amorem matri confitentem facit, tela texenda: utrumque puellis amore percussis minus prospere procedere contenditur.

II.

Eiusdem epistolae v. 18 idem expressum est, quod in Sapph. frag. 33 de praeterito poetriae in Atthidem amore legimus:

Non oculis grata est Atthis, ut ante, meis.

Ἡράμαν μὲν ἔγω σέθεν, Ἄτθι, πά-
λαι πότα.

apud Ovidium Metam. VII, 194 sq. haec vestigia exstant:

Tuque triceps Hecate, quae coeptis conscia nostris
Adiutrixque venis.

Porro ibid. v. 20 sq.:

Video meliora proboque;

Deteriora sequor,

cf. cum eiusdem Medae v. 1077 sq.:

καὶ μανθάνω μὲν οἷα δρῶν μέλλω κακὰ.

θυμὸς δὲ κρείσσων τῶν ἐμῶν βουλευμάτων.

*) Quae imprimis sibi respondere statuimus, ea diductis litteris describenda curavimus.

Utroque loco et sententia et verba sunt fere eadem; Sappho enim expressit, quod fuit, Ovidius vero, quod non est; quem exprimendi modum Romanum poetam in deliciis habuisse infra ostendemus.

III.

Ibid. v. 21 sq. Phaonis pulchra facies laudatur; poetria quoque frag. 29 amicum quendam pulchris oculis vel, si synecdochen statuis, pulchra facie insignem alloquitur. Iam Bergk ad h. l. et ad frag. 140 Sapphus verba ex carmine quodam ad Phaonis amorem spectante, quorum haud exiguum numerum fuisse ex frag. 140 concludi potest *), dubitanter coniecit; quae coniectura collatis locis fit verisimilis.

Est in te facies..

O facies oculis insidiosa meis!

Στᾶθι κᾶντα φίλος..

καὶ τὰν ἐπ' ὄσσοις ἀμπέτασον χάριν.

IV.

V. 27 sq. Ovidius fere idem indicavit, quod Sappho ipsa haud semel de sua poetica gloria praedicaverat, ut frag. 10: At mihi Pegasides blandissima carmina dic-
tant:

Iam canitur toto nomen in orbe meum.

Ἀἴ με τιμίαν ἐπόησαν ἔργα

τὰ σφ' ἀδοῖσαι **).

*) De Phaone, quem recentiorum plurimi nullum fuisse statuunt, infra plura disputabimus; complura Sapphus in eum carmina fuisse testatur Palaephatus, v. infra p. 54***) extr.

**) Birt l. l. p. 431 in latinis Callimachei frag. 242 vestigia indagavit:

Γράμματα δ' ἔλισσον ἀπόκρυφα.

Attamen quid similitudinis inter haec et Ovidiana verba intercedat, ne Lynceus quidem videbit.

Pronomen relativum αἱ ad Musas referri intellegitur ex Aristid. II, 508, quem Bergk ad h. l. citat: ὡς αὐτὴν (sc. τὴν Σαπφωὶ) αἱ Μοῦσαι (h. l. Pegasides) τῷ ὄντι ὀλβίαν καὶ ζήλωτὴν ἐποίησαν. Notio autem τιμίαν a Romano poeta expressa est per totum pentametrum; verba denique ἔργα τὰ σφὰ δοῖσαι a poetria in universum prolata ab Ovidio cum magis propriis commutata esse vix est quod moneam *). Simili modo frag. 68 poetria diviti cuidam, sed ἀμούσῳ feminae his verbis sese opponit:

.. οὐ γὰρ πεδέχεις βρόδων
τῶν ἐκ Πιερίας..

V.

Cum brevi oratione in unum distichon contracta, qua Sappho apud Ovidium Venerem compellans inducitur (v. 57 sq.), conferre potes primam Sapphus odam (frag. 1); imprimis novissima utriusque loci verba congruunt:

Vati consule, diva, tuae.
οὐ δ' αὔτα
σύμμαχος ἔσσο.

VI.

Sententia feminam aetate iam provectiore iuveni ad matrimonium minus aptam esse et v. 85 sq. et frag. 75 exstat:

Quid mirum, si me primae lanuginis aetas
Abstulit atque anni, quos vir amare potest?
Οὐ γὰρ τλάσομ' ἔγω ξυνοίκτην
νέω γ' ἔσσα γεραιτέρα.

Quod cum utroque loco concedatur, apud Ovidium Sappho nihilominus a Phaone suo petit, ut ipsam amet, cum illud

*) Cum hoc n. cf. infra p. 45.

aetatis damnum aliis iisque hand spernendis bonis quodammodo compensari ostendat, cf. v. 27 sqq.

VII.

V. 135 manifestum vestigium prioris versus frag. 95 deprehendimus; Ovidius tantum auroram cum Sole commutavit:

At cum se Titan ostendit et omnia secum.

Φέσπερε, πάντα φέρων, ὅσα φαίνολ' ἔσκέδασ'
αὐτῷς *).

VIII.

V. 105 Sappho queritur se Phaoni in Siciliam proficiscenti ne unicum quidem mandatum dare potuisse, scilicet ne se oblivioni traderet. Novissima verba frag. 21 recurrunt:

Neque enim mandata dedissem

Ulla, nisi ut nolles immemor esse mei.

Ἐμεθεν δ' ἔχελισθα
λάθως **).

IX.

Iam quod sequitur decurtatum frag. 22:

τιν' ἄλλον ***)

ἀνθράπων ἔμεθεν φίλησθα...

conferri potest cum epist. v. 51:

Nunc tibi Sicelides veniunt nova praeda
puellae.

*) Cf. infra p. 46.

**) Ex Bergkii coniectura; cod. λάθαν.

***) *H particulam, a qua hoc frag. apud Bergkium orditur, delevi; est enim Apollonii, non poetriae.

Itaque ea, de quibus poetria generatim atque universe locuta est (*τιν' ἄλλον*), ab Ovidio propius designata sunt.

Utrumque vero frag. (21 et 22), quamquam anonymum, Bergk Sapphoni vindicavit, nos autem ex poetriae in Phaonem carmine depromptum esse opinamur.

X.

Duobus epistulae locis Sappho de Phaonis rigido immobilique animo queritur; legimus enim v. 189:

O scopulis undaque ferocior illa!

Porro v. 207 sq.:

Ecquid ago precibus, pectusque agreste mo-
vetur,

An rigeť?

Eadem sententia in illis corruptissimis ab Herodiano *περὶ μου*. λέξ. 26, 21 (v. Sapphus frag. 110) servatis verbis expressa esse mihi videtur; quae ita scripta reperimus:

τι
ἄλλαν μὴ καμεστέραν φρένα.

Coniecturae, quibus Ahrens, Hartung, Bergk locum sanabant, et nimis a tradita scriptura recedunt neque aptam sententiam exprimunt. Quamobrem equidem aliam emendandi rationem proponam, quamquam, quod metrum in hoc frustulo restituendum sit, in dubio relinquo. En meam lectionem:

ἄλλα μὴν κάμπτε στερέα φρένα.

Locutiones vero *στερέα φρήν* et *κάμπτειν φρένα* graecae linguae consuetudini minime repugnare videbis, si compareris Od. XXIII, 103 (*κραδίη στερεωτέρη λίθοιο*) et Thuc. III, 58 in.: *ἀξιοῦμεν καυφθῆναι ὑμᾶς καὶ μεταγνώναι*.

Quae si recte disputavimus, hoc ipsum fragmentum epistula adiutrice non solum corrigere, sed etiam ex Sapphus ad Phaonem carmine ductum esse statuere poteris.

XI.

Initio frag. 2 vir quidam cum diis comparatur:

Φαίνεται μοι κῆνος ἴσος θεόισιν

ἔμμεν ὦνηρ.

Item in illo epithalamio (frag. 91 v. 3) sponsus cum Marte componitur:

Γαμβρος ἔρχεται ἴσος Ἀρενῖ).*

Quibus similes Phaonis cum diis comparationes apud Ovidium hae sunt (v. 22 sq.):

Sume fidem et pharetram, fies manifestus
Apollo:

Accedant capiti cornua, Bacchuseris.

Porro v. 188:

Et forma et meritis tu mihi Phoebuseris**).

Hic quoque iterum recurrit, quod iam supra observavimus; cum enim Sappho in priore fragmento in universum dixerit: *ἴσος θεόισιν*, Ovidius universalem notionem Apolline, Baccho, Phoebō nominatis accuratius expressit.

XII.

Pudenter fere eisdem verbis apud utrumque coitus mentionem fieri videbimus collato v. 133 cum frag. 28:

Ulteriora pudet narrare.

(αἰ) μή τι Φείπην γλώσσ' ἐκύκα κάκον,

αἰδώς κέ σ' οὐκίχανεν ὀππατ',

ἀλλ' ἔλεγες..

* V. iam apud Homerum (Od. VIII, 115):

βοητολογῶ ἴσος Ἀρηι.

** Ad frag. 2 propius accedunt Catulliana (c. LI, in.):

Ille mi par esse deo videtur,

XIII.

Et apud Ovidium v. 155 sq. et frag. 52 poetria amati desiderio confecta somnum capere nequit et desolata diu in noctem suam fortunam deplorat:

Sappho desertos cantat amores
Hactenus, ut media cetera nocte silent *).

.. μ έσαι δέ
νύκτες, παρὰ δ' ἔρχεται ὥρα,
ἔγω δὲ μόνα κατεύδω **).

XIV.

Propter eandem causam poetria v. 195 sqq. lamentatur se neque carmina pangere neque psallere posse; id quod posteriore loco positum est, Ovidius v. 198 his verbis expressit:

Plectra dolore tacent***), muta dolore lyra est.

*) Birt l. l. p. 431 Romano poetae Callim. frag. 150 obversatum esse statuit; quod quantum abhorreat a latinis, ipse videas:

Πολλάκι καὶ κανθῶν ἦλας' ἄσπον ἀπό.

Ceterum Birt ibid. pentametrum perperam interpretatur: «huc usque cetera silent quasi media nox sit»; voces hactenus ut idem valere videntur atque usque dum, donec, ut iam Domitius Calderinus vidit; cf. Vries. l. l. p. 94 med., qui cum Birtio facit.

**) Kock l. l. p. 34, cui haec verba Sapphonem minus decere visa sint, poetriam non de se ipsa, sed de alia quadam misera puella ea verba facere putat, quae in nocturna solitudine amati desiderio frustra enecetur; quam explicationem falsam esse iam ex Ovidii imitatione discimus, collato, quod ad rem attinet, Sapphus frag. 130.

***) Cum absurde dictum esse videatur: plectra tacent—plectrum enim ipsum minime sonum reddere, sed tantum efficere non est quod moneam—Vries l. l. p. 108 secundum edit. Ven. (a. 1558) ita legendum esse censuit: Plectra dolore iacent. Quae mutatio quamquam propterea quam maxime commendatur, quod traditam scripturam levissime corrigit, tamen reiicienda est. Ovidio enim, cum h. v. eandem sententiam rhetorice repetere vellet, idem accidit quod Suidae (s. v. Σαπφώ): ab utroque enim vocabula πλῆκτρον et πηκτις confusa esse videntur. De pectide autem cf. Athen. p. 635 B coll. Sapph. frag. 122.

Simili modo poetria affecta esse poterat, cum ad lyram conversa ea exclamavit, quae frag. 45 legimus:

Ἄγε δὴ χέ' λυ δῖά μοι
φωνάεσσα γένοιο.

XV.

In illa Naiadis nymphae sede describenda (v. 157 sqq.) Ovidio Sapphus carmen, cuius frustulum frag. 4 exstat, observatum esse iam Bergk ad h. l. monuit; Romanus poeta tantum arborem Punicam loto commutavit:

Est nitidus vitroque magis perlucidus omni

Fons sacer . . *)

Quem supra ramos extendit aquatica lotos

Una nemus.

Ἀμφὶ δὲ ψυχρον κελάδει δι' ὕσδων
μαλίνων, αἰθυσσομένων δὲ φυλλῶν
κῶμα καταρρεῖ **).

Si Hermogenis verba, qui de form. orat. II, 4 (apud Spengel. Rhett. gr. II p. 358) haec duo fragmenta servavit, urgere velis, tum fontem quoque et ψυχρον eadem esse statuas necesse erit: nam rhetor ille ψυχρον frigidam fontis

*) Birt l. l. p. 430 putat hunc versum expressum esse e Callim. frag. 298:

Κρήνη λευκὸν ὕδωρ ἀνέβαλλεν.

Idem porro p. 432 extr. nullo fragmento allato 'apud Callimachum poetriam adisse fontem numerosasque ibi querelas edidisse' fingit. Sane mirum est Bergkii annotationem viro sagaci ignotam fuisse; quae nisi eum fugisset, sine dubio eum prohibuisset, quominus in Callimacheis huius Heroidis similitudines aucuparetur.

**) Hanc descriptionem veteres imprimis in deliciis habebant, ut ex Demetr. de eloc. c. 132 (Spengel. Rhett. gr. III p. 291) patet, qui rhetor eam respexisse videtur, cum dicit: εἰσὶ δὲ αἱ ἐν τοῖς πράγμασι χάριτες, οἷον νυμφαῖοι καὶ παῖδες, ἑρῶτες, ὅλη ἡ Σοφοῦς ποιησις. Itaque Ovidius quoque facere non potuit, quin eum locum imitando exprimeret; praeeunte Horatio Epod. 2, 27; v. Bergk ad h. l.

aqua intellegere videtur, quae per ramos pomis onustos et ad terram demissos fluens strepitum edit; quod et ex eius verbis $\delta\epsilon\nu\mu\acute{\alpha}\tau\omega\nu\ \pi\omicron\iota\chi\iota\lambda\acute{\iota}\alpha$ et ad $\psi\tilde{\upsilon}\chi\rho\omicron\nu\ \tilde{\upsilon}\delta\omega\rho$ addito concludi potest. Attamen $\alpha\lambda\theta\nu\sigma\sigma\omicron\mu\acute{\epsilon}\nu\omega\nu$ quod sequitur satis superque ostendit sub $\psi\tilde{\upsilon}\chi\rho\omicron\nu$ voce auram intellegendam esse, (ut iam Neue l. l. p. 37 sq. vidit), quae circumstrepens frondes concutit. Quibus perpensis rhetorem in afferendis Sapphus verbis neglegentius egisse facile concedes.

XVI.

Ovidius mutato rerum statu sententias quoque ex Sapphus carminibus petitas immutabat *). Ita v. 201 sq. poetriam maerore afflicta Lesbias puellas a se arcentem facit, quibus ad se invitatis ipsa frag. 11 se cantaturam esse promisit:

*) Idem ab Ovidio alias quoque factitatum esse docuit Mayer, qui Hermae T. XX (a. 1885) p. 101 sqq. Ovidium in alio rerum statu ea quae in Euripideo Protesilao narrata erant, in XIII Heroide aptissime in usum suum convertisse demonstravit; cf. Ehwald. l. l. p. 156.

Quam viam ac rationem scribendorum carminum poeta imprimis in Metamorphosei saepissime iniit, ut I, 293—306 in terrarum inundatione describenda:

... cumba sedet alter adunca
et ducit remos illic ubi nuper ararat:
ille supra segetes aut mersae culmina villae
navigat: hic summa piscem deprendit in ulmo.
figitur in viridi, si fors tulit, ancora prato,
aut subiecta terunt curvae vineta carinae;
et, modo qua graciles gramen carpsere capellae,
nunc ibi deformes ponunt sua corpora phocae.
mirantur sub aqua lucos urbesque domosque
Nereides, silvasque tenent delphines et altis
incursant ramis agitataque robora pulsan.
nat lupus inter oves, fulvos vehit unda leones,
unda vehit tigres, nec vires fulminis apro,
crura nec ablato prosunt velocia cervo.

Quibuscum conferas huius epistulae vv. 73—76, de quibus v. infra p. 33.

Lesbides . .

Desinite ad citharas turba venire meas.

Τὸδε νῦν ἐπαίραις

ταῖς ἑμαῖσι τέρπνα κάλως αἰῖσω.

XVII.

Simili modo Romanus poeta imaginem Sapphicae descriptioni ex altera parte respondentem vv. 109—112 depingit fere eisdem verbis ad designandam Sapphus propter Phaonis fugam maestitiam usus, quibus illa frag. 2 vv. 7—12 vim amoris primum visae puellae delineavit.

Cum mihi nescio quis 'fugiunt tua gaudia' dixit,
Nec me flere diu, nec potuisse loqui.

Et lacrimae deerant oculis et lingua *) palato,
Adstrictum gelido frigore pectus erat.

ὥς γὰρ εὐιδὸν βροχέως σε, φώνας

οὐδὲν ἔτ' εἶκει.

*ἀλλὰ καμμὲν γλῶσσα ἔαγε **), λέπ-
τον δ'*

αὐτίκα χρωπύρ ὑπαδεδρόμακεν,

*) Ex Graecis «καμμὲν γλῶσσα ἔαγε» concludi potest lectionem lingua palato, quae imprimis codd. Fuldensi et Harleiano fulcitur, retinendam esse, alteramque illam cod. Francofurtani pro lingua verba exhibentis doctae correctioni deberi. Attamen et Vries et Sedlmayer hanc scripturam illi praetulerunt; iure defendit Ehwald l. l. p. 220 ann. 1, col. Trist. III, 3, 21.

**) Ex verbis «φώνας οὐδὲν ἔτ' εἶκει, ἀλλὰ καμμὲν γλῶσσα ἔαγε», quae delitescunt in latinis «me nec potuisse loqui.. deerat lingua palato» concludi potest poetriam, si sibi constare voluisset, τὸν Ἐρωτα minime μυθοπλόκον alibi appellare potuisse—quod apud Maximum Tyrium XXIV, 9 (v. frag. 125) legimus—sed potius μυθοκλέπον, verba furantem, linguam verbis spoliantem. Quae coniectura quominus admittatur Pausaniae verba obstant, qui IX, 27, 3 πολλὰ καὶ οὐχ ὁμολογοῦντα ἀλλήλοις poetriam de Cupidine cecinisse testis est; ad quae hoc quoque referendum esse videtur.

ὁππάτεσσι δ' οὐδὲν ὄρημ', ἐπιρρόμ—
βείσι δ' ἄχοναι *).

Haec fere sunt, quae iterum iterumque perlustrando et verbis utriusque poetae inter se comparandis a nobis inveniri potuerunt. Quorum haud exiguus numerus sine dubio maior esset, si poetriae carmina integra ad nos pervenissent, nec dubitamus, quin nova fragmenta in lucem protracta nostram coniecturam magis confirmatura sint. Attamen iam his satis superque demonstratur, quod a nobis supra in huius capitis titulo positum est, neque veremur, ne nostra quod ad verisimilitudinis speciem attinet, Birtianis postponas. Comparantes vero Ovidiana cum Sapphicis viam quoque ac rationem, qua Ovidius usus Graecorum poetarum verba et sententias in sua carmina transferebat, haud semel observavimus, ut cum ostendimus latinum poetam ea quae apud Sapphonem legerat, mutato rerum statu mutatis iisque contrariis coloribus depinxisse, ita ut eius verba Sapphicis ex altera parte respondeant, in quibus imprimis quae fuissent non esse saepius eum enumerasse et notiones a poetria generatim atque universaliter prolatas propius exposuisse animadvertimus. Quibus porro hoc quoque addi potest Ovidium flores tantum ex Sapphus carminibus decerpisse atque, prout ei visum est, frondes eorum reseculisse. Semel tantum poeta totum carmen a Sapphone

*) Cum Sapphicis et Ovidianis iuvat comparare Catulliana (LI, 6 sqq.), quae ad illud archetypum propius accedunt:

... nam simul te,
Lesbia, adspexi, nihil est super mi
lingua sed torpet, tenuis sub artus
flamma demanat, sonitu suo pte
tintinant aures, gemina teguntur
lumina nocte.

Praeter Catullum Lucretius quoque (III, 154 sqq.) in describendo timore hoc carmen imitatus est,

mutuatus esse videtur, ubi de Naiade poetriae suadente narravit, ut de Leucadio promunturio in mare se praecipitaret *); at accuratius enucleare, quomodo illa Ovidiana verba ad Sapphus carmen referantur, non possumus, cum initio excepto fragmentis destituti simus **).

*) Vv. 157—175:

Est nitidus vitroque magis perlucidus omni
Fons sacer. hunc multi numen habere putant:
Quem supra ramos extendit aquatica lotos,
Una nemus, tenero caespite terra viret.
Hic ego cum lassos posuissem fletibus artus,
Constitit ante oculos Naias una meos:
Constitit, et dixit 'quoniam non ignibus aequis
Ureris, Ambracia est terra petenda tibi.
Phoebus ab excelso, quantum patet, adspicit aequor:
Actaeum populi Leucadiumque vocant:
Hinc se Deucalion Pyrrhae succensus amore
Misit, et illaeso corpore pressit aquas:
Nec mora, versus amor tetigit lentissima mersi
Pectora, Deucalion igne levatus erat.
Hanc legem locus ille tenet. pete protinus altam
Leucada, nec saxo desiluisse time'.
Ut monuit, cum voce abiit. ego territa surgo,
Nec gravidae lacrimas continuere genae.
Ibimus, o nymphe, monstrataque saxa petemus.

Initium huius loci iam supra p. 24 n. XV cum Sapphus frag. 4 verbis contulimus. Quodsi nostra coniectura verum assecuti sumus, illud Graecum carmen, unde Ovidiana expressa sunt, facile posteriores commovere potuit, ut poetriam nymphae consilio obsecutam de Leucadio promunturio saltu sese demisisse finxerint, de quo infra plura.

**) Ad eam epistolae partem, ubi Sappho omnes calamitates atque miserrimas, quae in ipsam irruerunt, recenset (vv. 59—72), optime referri possit initium carminis e ionicis a minore compositi, quod Hephaestio servavit (p. 67 ed. Westphal.):

Ἔμε δέλαν, ἔμε πασῶν κακῶτάων πεδέχουσαν.

Quod tamen carmen ab illo metrico scriptore diserte Alcaeō tribuitur (frag. 59). Attamen quod ibi femina loquitur et argumentum lugubre, (quantum ex his primis verbis concludi licet), Alcaeō 'sonanti plenius' minime convenit, illud fragmentum potius Sapphoni tribuendum esse putaverim apud Hephaestionem in nominando auctore erratum esse statuens. Quod sane fieri potuisse concedes, si reputaveris Hephaestionis enchiridium ter in brevius redactum

Praeter ipsa Sapphus verba ad eius carminum fragmenta ii quoque antiquorum scriptorum loci asciscuntur, ubi eius sententiae in pedestrem orationem conversae aut sola testimonia ex eius carminibus sumpta occurrunt. Hinc quoque nonnulla afferri possunt, quibus Ovidium plurima ex Sapphus carminibus hausisse demonstretur. Fortasse obieceris Nasonem haec ex aliis scriptoribus, non ex ipsis eius carminibus mutuatum esse: at poetam recentiorum hominum doctorum more antiquos perscrutatum esse, ut de Sapphone testimonia magna cum temporis laborisque impensa conquireret, minime verisimile est, imprimis cum nihil impedimento esset, quominus ipsis eius carminibus uteretur. Huc igitur tres loci pertinere videntur.

I.

Vv. 63—67 narratur de Charaxi, poetriae fratris (cf. v. 117 sq.), in Rhodopidem vel Doricham meretricem amore, qui eius rei familiaris dissipatae causa fuit:

Arsit inops frater victus meretricis amore,

Mixtaque cum turpi damna pudore tulit.

Factus inops agili peragit freta caerula remo,

Quasque male amisit, nunc male quaerit opes*)

Me quoque, quod monui bene multa fideliter, odit.

Quae omnia in Sapphus carminibus fuisse luculente testantur

esse, primum ex duodequingenta libris ad undecim, tum ad tres, denique ad unum, qui aetatem tulit; cf. Longini verba apud Westphal. l. l. p. 2. Utcumque est, illorum quoque quattuordecim versuum argumentum ex ipsis poetriae carminibus haustum esse videtur; quod si mecum statueris, v. 61 sq. fontem ostendere poteris Sittlio, l. l. p. 324 ann. 5 haec interroganti: «Woher weiss Pseudo-ovid, dass Sappho 6 Jahre alt ihre Eltern verlor?»

*) Hic versus quodammodo respondet Sapphus sententiae in universum prolatae, quam Schöne l. l. p. 743 ex illo Charaxum carpente carmine depromptam esse recte statuisse videtur (frag. 80):

Ὁ πλοῦτος ἀνευσεύ γ' ἀρετά 'στ' οὐκ ἀσέλγης πάροικος.

plures loci, quos Bergk frag. 138 collegit, ex quibus ea, quae praecipue faciunt ad hunc Ovidianum locum, exscribam. Iam Herodotus I. II c. 135: 'Ροδῶπιδις, inquit, ἐλύθη χρομᾶτων μεγάλων ὑπὸ Χαρᾶξου. . Χάραξος δὲ ὥς ἀπενόστησε εἰς Μυτιλήνην, ἐν μέλει Σαπφῶ πολλὰ κατεκερτόμησέ μιν *). Porro Athenaei quoque verba (XIII, 596 B) haud parvi momenti sunt: (Δωρίχα), τὴν ἡ Σαπφῶ ἐρωμένην γενομένην Χαρᾶξον τοῦ ἀδελφοῦ αὐτῆς, διὰ τῆς ποιήσεως διαβάλλει ὥς πολλὰ τοῦ Χαρᾶξου νοσφισαμένην.

II.

V. 89 sq. Ovidius illam de Lunae in Endymionem amore fabulam respiciens Phaonem huic rivalem haud spernendum fieri posse his verbis docet:

Hunc si conspiciat, quae conspicit omnia, Phoebe,

Iussus erit somnos continuare Phaon.

Quam fabulam a Sapphone quoque tractatam esse scholia ad Apollonii Rhodii IV v. 57 testantur (v. frag. 134): Περὶ δὲ τοῦ τῆς Σελήνης ἔρωτος ἱστοροῦσι Σαπφῶ καὶ Νίκανδρος· λέγεται δὲ κατέρχεσθαι εἰς τοῦτο τὸ ἄντρον (sc. Latmi, Cariae montis) τὴν Σελήνην πρὸς Ἐνδυμίωνα **).

*) Quaeritur, quo illud μὲν referendum sit, utrum ad Rhodopidem, an ad Charaxum. Plerumque sub ea voce Rhodopidem intellegunt, ut Welcker (v. Jahn. Jahrb. T. I, p. 394), Stein (in ed. Herod. ad h. l.) alii; quae explicatio Athenaei verbis (v. l. supra l.) nititur. Attamen Ovidiana verba 'bene monui multa fideliter' documento esse possunt Charaxum quoque a sorore carmine vellicatum esse. Quamobrem μὲν vocem ad hunc referre licet, quod sententiarum Herodotearum nexui magis respondere videtur. Cf. Vries. l. l. p. 65.

**) Cf. infra quoque p. 46.

III.

Vv. 123—136 Sappho queritur somnia, in quibus solis sibi liceat cum Phaone versari atque maerorem suum oblivisci, tam cito praeterire. Prae ceteris cf. vv. 126 et 135 sq.:

Sed non longa satis gaudia somnus habet.

At cum se Titan ostendit et omnia secum,

Tam cito me somnos destituisse queror*).

Quam sententiam Libanius sophista ex eius carminibus desumpsit (v. Orat. T. I p. 402 ed. Reiske, vel frag. 130):

Σαπφώ, inquit, *τὴν Λεσβίαν οὐδὲν ἐκώλυσεν εὖ ξασθαί νύκτα αὐτῇ γενέσθαι διπλάσιαν**).*

Restant singula variarum rerum, de quibus poetria locuta est, nomina, quae inde in Ovidii carmen transmigraverunt. Huc primum rariores in lingua latina voces referuntur, quae ad designandam lyram adhibentur, ut v. 8 *barbitos* et v. 181 *chelys*. Prius vocabulum in Sapphus carminibus fuisse Athenaeus IV, 182 F (v. frag. 154) testatur: *Τὸν γὰρ βάρωμον καὶ βάρβιτον, ὧν Σαπφὼ καὶ Ἀνα-*

*) Cf. infra p. 46.—Exemplar huius distichi, cuius hexametrum iam supra p. 20 cum Sapphus frag. 95 composuimus, Birt l. l. p. 432 in anonymorum Callimacho ascriptorum frag. 93 videt:

*Ἦμος δ' ἠπεροπῆας ἀπεπτόλησεν δνείρους
ἥελιος ἀνοχών.*

**) Num frag. 87:

Ζὰ δ' ἐλεξάμαν ὄναρ Κοπρογενῆα

huc referendum sit, quod initium carminis fuisse Bergk ad h. l. conicit, decerni non potest. — Ceterum Bergk in Libanii verbis pro *διπλάσιαν* voce *τριπλασίαν* reponi iubet; quod non probandum est, cum et Sappho duplici nocte non contenta immodestior videatur et fabula de Hercule trium noctium Iovis cum Alcmena coitu procreato ad Sapphus verba non pertineat.

κρέων μνημονεύουσι, ... ἀρχαῖα εἶναι *). Posteriorem vero vocem eidem fonti deberi concludi potest e frag. 45:

Ἄγε δὴ χέλυ δῖά μοι
φωανάεσσα γένοιο.

Porro alia forma eiusdem verbi ab Orione 28, 15 citatur (v. frag. 169): Ὡς παρὰ Σαπφοῖ χελώνη χέλυ νη (vel χέλυνα corrigente Bergkio).

Sapphonem more tenero sexui proprio ad vestem, ornatum cultumque studium contulisse et in carminibus quoque de eo femineo apparatu saepius mentionem fecisse non est quod miremur. Ita frag. 155 βεῦδος verbum legitur a poetria usitatum, quod secundum Pollucem (VII, 49) pretiosam quandam pellucidam vestem significat; frag. 89 mollia lanea vestimenta, ὄβρα λάσια, nominantur; frag. 70 poetria „rusticam“ quandam feminam irridet, quae vestem gestare nesciat:

Τίς δ' ἀγροιώτις τοι θέλγει νόον,
οὐκ ἐπισταμένα τὰ βράχε' ἔλκην ἐπὶ τῶν σφύρων;

Porro coronae odoratae collo impositae frag. 46 memorantur:

Κάπαλαις ὑπαθύμιδας **)
πλέκταις ἀμπ' ἀπάλα δέρα.

Tum frag. 35 anulus commemoratur:

Ἄλλα, μὴ μεγαλύνεο δακτυλίῳ πέρι.

Denique pretiosa unguenta, ut βρένθειον (frag. 49), μύρρα (frag. 163) in eius carminibus nominata invenies, porro sa-

*) Flach in libro qui inscribitur Geschichte der griech. Lyrik, p. 108 βάρβιτος vocem ex Graecae linguae verborum copia non derivari posse statuere videtur, quod falsum est. Nam ex variis eius rei apud Athenaeum servatis nominibus, ut βάρωμος et βάρμος (XIV p. 636 C) sequitur alterum β per assimilationem pro μ positum esse; itaque genuina forma fuit βάρμιτος, cuius onomatopoeica radix βαρμ per metathesin e βραμ orta ad strepitum significandum saepe in graecis vocabulis adhibetur, ut in βρέμειν (cf. Pind. Nem. XI, 7: λύρα δέσσει βρέμεται καὶ δοιδά), ὑψιβρεμέτης (II. I, 354), βρόμος, βρόμος. Ab eadem radice sine dubio derivatum est vocabulum φόρμυξ, v. G. Curtius, Grundzüge (ed. 5), p. 530.

**) Ita legendum esse censeo collatis fragg. 2 v. 10: ὑπαδεδρόμακεν et 1 v. 9: ὑπαξεύχαισα.

ponem quoque (*πίτρον* frag. 165), et frag. 156 capsulam quoque quandam habes (*γρούτη*), ad unguenta servanda destinata. Cum vero poetria propter Phaonis repentinum discessum maestitia affecta esset, omnem illum femineum cultum, ut par erat, missum fecit. Quapropter Ovidius iterum ex altera parte eam describens vv. 73—76 haec loquentem facit:

Ecce, iacent collo sparsi sine lege capilli,
Nec premit articulos lucida gemma meos.
Veste tegor vili. Nullum est in crinibus aurum,
Non Arabum noster rore capillus olet.

Praeter easdem vel similes sententias et res apud Ovidium porro etiam dicendi generis poetriae vestigia quaedam inveniuntur. Sane concedendum est fieri potuisse, ut nonnulla casu tantum similia sint: nam cum uterque in erotico poesis genere versaretur, facere non potuit, quin eodem, ut ita dicam, erotico apparatu *) uteretur. Ita uterque de vehementi amoris impetu urendi verbo utitur, cf. v. 9: „uror“ et v. 163 sq.: „quoniam non ignibus aequis ureris“ cum frag. 115: *ὀπταίς ἄμμε* et frag. 2 v. 9 sq.:

*λέπτων δ'
αὐτίκα χρῶ πῦρ ὑπαδερόμακεν.*

Mihi vero imprimis in epithetis quae dicuntur ornantibus poetriae propriis Ovidius ad Sapphus dicendi genus accedere videtur, cui e. g. adiectiva nomina *ἄβρος*, *ἄπαλος*, *βράδι-*

*) Ita luscinae, perpetuae illius amantium comitis, in Sapphus carminibus partes fuisse docet frag. 39:

Ἦρος ἄγγελος ἐμερόφωνος ἀήδων.
Quibuscum cf. v. 152 sqq.:

..nullae dulce queruntur aves.
Sola virum non ulta pie maestissima mater
Concinit Ismarium Daulias ales Ilyn.

νος, λέπτος, μάλακος, μάλθακος in deliciis erant *). Ita apud Ovidium quoque scriptum legimus v. 79 „molle meum cor“, v. 84 „ingenium molle“, v. 179 „mollis Amor“, quod conferri potest cum frag. 62: ἄβρος Ἀδωνις. Porro v. 160 „tenero caespite“ cf. cum frag. 54: πῶας τέρεν ἄνθος μάλακον μάττεισαι; candida epitheton quod v. 17 exstat, recurrit frag. 112 et 122: ὦϊω πολὺ λευκότερον et γάλακτος λευκοτέρα (si hoc frag. non est Anacreontis); his adde frag. 1 v. 18 μαινόλας, quocum componi potest v. 176 „insanus“, vel v. 139 „furialis“. Exstat etiam eiusmodi exemplum, ubi notio a poetria breviter per epitheton expressa ab Ovidio per totum versum explicatur; cf. frag. 40 ἔρος ὁ λυσιμέλης cum v. 50:

Plurimus in lasso corpore languor erat.

Etiam quod ad syntaxin attinet, similis usus exempla apud utrumque exstant; compone frag. 2 v. 5 γελαίσας ἱμερόεν cum v. 152: dulce queruntur aves **). Venustum exemplum nominis abstracti pro concreto positi e Sapphicis carminibus depromptum Julianus epist. XVI (v. frag. 126) servavit: τὸ ἐμὸν μέλημα; ita Ovidius quoque v. 109 Phaonem „tua gaudia“ dixit; adde v. 123: „Tu mihi cura, Phaon“ ***).

*) Mahaffy Anglosaxus in praestantissimo libro, qui inscriptus est History of classical greek literature, vol. I p. 185 putat XXVIII idyllium Theocrito ascriptum ad Sapphici carminis cuiusdam exemplar compositum esse. Quam sententiam haud improbandam esse multa Sapphica epitheta docent, quae in illo idyllio recurrunt, ut ἄπαλος (v. 4), ἱμερόφωνοι (v. 7), μάλακοι (v. 12), ἐράνναν (v. 21).

**) Ceterum vide iam apud Homerum II. VI, 484: δακρυόεν γελάσασα; vel Od. XVIII, 35: ἡδὺ ἐκγελάσας. Ovidium Homeri quoque, ut par erat, studiosum fuisse, alia quoque docent, ut v. 89 colon cum II. III, 277 comparatum:

quae conspicit omnia, Phoebe.

Ἥ ἑλίοσ θ' ὅς πάντ' ἐφορᾷς.

***) Fieri potuit, ut verbis τὸ ἐμὸν μέλημα ipsa poetria Phaonem suum appellaverit.—Ad hunc Sapphus dicendi usum Lucianus quoque (Amor. c. 30)

His unum tantum addam. Sappho ad sententias illustrandas atque accuratius exprimendas saepissime similitudinibus imaginibusque a natura ductis utebatur; ita frag. 42 impetus amoris, qui in poetriam irruit, cum impetu venti montana querceta concutientis comparatur:

(*Ἔρος δαῦτ' ἐτίναξεν ἔμοι φρένας*),
ἀνεμος κατ' ὄρος δρύσιν ἐμπέσων.

Ad quam collationem prope accedit ea, quae apud Ovidium vv. 9—10 de eadem re usurpata est; Ovidius tantum montem agro et quercus Sapphicae comparationis igne frugum commutavit:

Uror, ut indomitis ignem exercentibus euris
 Fertilis accensis messibus ardet ager.

Jam restat, ut ad ultimum qui superest Sapphicorum verborum fontem recurramus. Antiqui scriptores celebratissimorum poetarum versus nonnunquam laudare solent non nominatis auctoribus; quibus nominatim afferendis supersedere poterant, cum eorum quisque qui legebant poetarum optimum quemque penitus cognitum haberet. At nos iniuria temporum perditis carminibus incerti haeremus et ambigimus, cuinam hoc vel illud fragmentum assignemus. Quod ad melicos poetas attinet, Bergk sub finem sui libri plus centum eiusmodi adespota fragmenta collegit, in quibus haud pauca Aeolicae poeseos frustula deprehenduntur. Quae cum perlustrarem, nonnulla ab hominibus doctis Sapphoni dubitanter ascripta ita

alludens dixisse videtur: τὸ μελιχρόν αὐχημα Λεσβίων Σαπφώ. Attamen Sappho non est prima, apud quam nomen abstractum pro concreto positum invenitur, cum huius quoque usus vestigia iam apud Homerum exstant; cf. Il. XXII, 432 sq., ubi Hecuba ad Hectoris cadaver conversa ita lamentatur:

ὦ μοι
εὖ χολῇ κατὰ ἄστυ πελίσσω, πᾶσι τ' ὄνειρα.

comparata esse animadverti, ut Ovidianae epistolae verbis respondere videantur. Ita cum v. 27:

At mihi Pegasides blandissima carmina dictant
53 fragmentum, a Plutarcho (de garrul. c. 5) servatum, mirifice congruit, quod Bergk l. l. p. 704 iure Sapphoni tribuit:

**Εγω φᾶμι ἰοπλοκάμων Μοισᾶν εὖ λαχεῖν **).

Porro frag. 76, ubi iuvenis quidam

Ναρκίσσου τερενώτερος

dicitur, commode ad Phaonem referri potest, quem poetria apud Ovidium ad eius teneram aetatem alludens v. 93 his verbis compellat:

O nec adhuc iuvenis, nec iam puer.

Ad eundem Phaonem mihi referenda esse videntur ea carmina, quorum reliquiae decurtatae nuper in Aegypto repertae et a Blassio editae sunt **); quas Bergkio haud annuente is qui edidit merito Sapphicas esse statuit: sententiae enim in iis expressae, quantum e singulis verbis divinari potest, mirum in modum cum iis consentiunt, quae in Ovidiana epistula exstant. Nam primum e frag. 56 *B* v. 9 sq. verbis

συ(ΓΧΡΟΪΣΘΕΙΣ

ἔται(ΡΟΣ

concludi potest de poetriae amico quodam in illo carmine agi, cuius amplexibus delectari solebat. Quibuscum conferas, quae Sappho epistolae vv. 46 sqq., 127, 142 sqq., 191 sqq. dicit. Porro eiusdem frag. vv. 5—7:

ΑΣΚΕΝΗΜΟΙ

ΣΑΝΤΙΛΑΜΠΗΝ

χα)ΛΟΝ ΠΡΟΣΩΠΟΝ

*) Cf. supra p. 18, IV, et infra p. 45.

**) V. Rhein. Mus. XXXV, 287—290 (a. 1880) coll. Bergk. l. l. fragg. 56 *A* et *B*, Wharton. l. l. pp. 174—181, qui illorum pannorum exemplar phototypicum libro suo inseruit.

amasii pulchra facies laudibus effertur. Egregiam Phaonis pulchritudinem multi Ovidiani loci praedicant, ut vv. 39, 94, 95 („formose“), imprimis vero 21 sq., quem locum iam supra p. 18 contulimus:

Est in te facies....

O facies oculis insidiosa meis.

In priore autem fragmento (56 A) e verbis v. 4 sq.:

Αἴνηστέμ

ΜΟΝΕΙΛΟΣ

enucleari potest poetriam de sua maestitia et opprobrio verba facere. Utrumque in epistula quoque recurrit; conferas imprimis vv. 109—122, ubi Sappho a Phaone relicta dolorem suum sibi opprobrio fuisse testatur.

Etiamsi praeter eos locos, quos enumeravimus, alii nobis in promptu sunt, tamen hic subsistemus, ne similitudines aucupantes longius iusto procedamus. Ex iis vero, quae contulimus, sequitur, cum easdem sententias et in epistula et in disiectis melicae poeseos fragmentis, quorum origo incerta est, reperiri viderimus, de communi earum fonte, Sapphus carmina dico, inde coniecturam fieri posse haud improbabilem.

Praeter eos quos iam recensuimus imitandi modos Ovidius etiam in componenda Heroide Sapphus vestigiis institit. Primum enim vv. 163—172 Naiadis, quae poetriae consilium dat, ut de Leucadio promunturio saltu demissa insano amoris medeatur, ipsa verba referuntur, quod Comparetti l. l. p. 52 Alexandrinorum poetarum exemplo factum esse opinatur: apud eos enim usu acceptum fuisse, ut deo alicui in carmine partes quaedam tribui solerent, ita ut poeta ipsius verbis res quasdam usu consecratas homines doceret. Comparetti coniecturam avide arripuerunt et Birt l. l. p. 399 et Vries l. l. p. 146. Cuius moris quamquam apud tragicos

quoque et in prologis et in exodis multa exempla inveniuntur, tamen Romanum poetam neque hos neque Alexandrinos ob oculos habuisse facile concedemus, si integrum superstes Sapphus carmen (frag. 1) attente perlegerimus. Nam ibi quoque Venus loquens inducitur, cuius primum (vv. 15—18) oratio obliqua refertur, quae inde a medio v. 18 in rectam transit Idem frag. 74 recurrit *). Itaque si exemplar eius moris ad imitandum Ovidio propositum quaerimus, poetae potius Sapphus carmina quam Alexandrinorum ob oculos versata esse ponendum est; sane fieri potuit, ut Ovidius non solum eum componendi morem, sed ut iam supra coniecimus, totam rem a Sapphone mutuatus sit.

Attamen ne his quidem quaestio absoluta est et longius procedere licet. Quaeritur enim, a quonam Ovidius carmina epistulas amatorias continentia scribere didicerit; quam quaestionem hoc loco attingere ab iis quae suscepi non alienum esse duxi. Birt putat Ovidium lectitatis Euripidis potissimum tragoediis, a quo poeta semel atque iterum codicilli in scenam inducti essent, commotum esse, ut ipse quoque epistularum forma carmina quaedam vestiret **). Quae opinio an accipienda sit, valde dubito: nam in tragoediis, ut Iphig. Taur. v. 584 sqq. (coll. Aristot. poet. c. 11), Hippol. v. 856 minime inveniuntur epistulae amatoriae et codicilli ibi obvii parum differunt ab illo *πίνακι πτυχῶ*, quem apud Homerum (Il. VI, 168 sqq.) Proetus Bellerophonti tradidit, ut eum ad socerum in Lyciam ferret. Ceterum iam

*) Cf. Maximi Tyrii testimonium illi fragmento praemissum: *Λέγει πού καὶ Σαπφῶ ἢ Ἀφροδίτῃ ἐν ᾧσματι* — Eundem poetriae morem Anthologiae Palatinae anonymus poeta imitatus est, qui IX, 521 Musas Sapphonen alloquentes inducit.

**) Cf. eius verba l. l. p. 401: «Atque—inquit—ipsam quoque *δέλτον* nonne frequentissime apud tragicos eosdem adplicatam legerat? modo memor sis Hippolyti utriusque; contra ab epicis ea fere aliena».

multo ante Euripidem Alcaeus carmine de scuto in pugna, cum Atheniensibus apud Sigeum a se abiecto Melanippum amicum certiozem fecerat, ut Herod. V, 95' testatur: ταῦτα δὲ Ἀλκαῖος ἐν μέλει ποιήσας ἐπιτιθεῖ ἐς Μυτιλήνην, ἐξαγγελλόμενος τὸ ἐωυτοῦ πάθος Μελα-νίππῳ ἀνδρὶ ἐταίρῳ; cf. Alcaeï frag. 32 apud Bergkium. Attamen ne huius quidem epistolae argumentum amatorium fuit. Itaque nisi alio modo rem expedire liceret, Diltheyi sententia praeferenda erat, qui initio „Observatt. in epistulas heroid. Ovid. p. I (Gottingae, 1884) Ovidium Alexandrinos poetas, in quorum carminibus epistolae amatoriae usu receptae erant, imitatum esse persuasum habet*). At rem altius repetere licet. Athenaeus enim X p. 450 E **) affert amplum fragmentum ex Antiphanis, mediae quae dicitur comoediae poetae, Sapphone sumptum, ubi poëtria griphum cuidam solvendum proponit; quod cum ille comice, non autem ex poëtriae sententia fecisset, Sappho ipsa docet illo aenigmate epistolam designari. Quaeritur autem, in quonam sententiarum nexu illud aenigma locum habuerit vel ad quam rem Sapphoni opus fuerit epistula. Quod mihi ita explicandum esse videtur: Sappho a Phaone deserta epistolam amatoriam ad absentem mittere gestiens a comico inducebatur; quin etiam fieri potuit, ut iam scriptam illo aenigmate soluto in scaena recitaverit. Qui comoediae locus Ovidium legentem sane commovere potuit, ut talem epistolam componeret eis sententiis usus, quae in Sapphus carminibus expressae erant et ad poëtriae ingenium describendum accommodatae esse videbantur; c o m i c u m enim Antiphaneae Sapphus epistolae argumentum ad genui-

*) Cf. Ehwald. I. I. p. 214.

**) V. Meinek. Fragg. com. graec. III, p. 112 sq.

num poetriae ἡθοῦς depingendum minime idoneum fuisse facile concedes *).

Attamen ne hoc quidem, quamquam per se verisimile est, tenendum esse videtur, quoniam vestigiis quibusdam ductus investigasse mihi videor Ovidium non ex comoedia, sed, ut Antiphanem quoque, a Sapphone ipsa imaginem suae epistulae mutuatum esse, cuius carmen alter irridebat, alter imitando exprimebat. Nam inter poetriae reliquias aliquot fragmenta ita conformata sunt, ut ea ex epistula Sapphicis strophis conscripta petita esse haud absurdum dicas. Huc spectare videntur fragg. 22, 21, 23 a Bergkio probabiliter Sapphoni ascripta, ubi poetria amatum sui oblitum alius hominis amore teneri seque desiderio eius enecari queritur:

*) Appono et propositum et solutum aenigma:

Ἔστι φύσις Θήλεια βρέφη σάξουσ' ὑπὸ κόλποις
αὐτῆς, ὄντα δ' ἄφωνα βοῇν ἰσθρῶν γεγωνόν
καὶ διὰ πόντιον οἶδμα καὶ ἡπείρου διὰ πάσης
οἷς ἐθέλει θνητῶν, τοῖς δ' οὐδὲ παροῦσιν ἀκούειν
ἔξεστιν· κωφὴν δ' ἀκοῆς αἰσθησὶν ἔχουσιν.

Θήλεια μὲν νῦν ἐστὶ φύσις ἐπιστολή,
βρέφη δ' ἐν αὐτῇ περιφέρει τὰ γράμματα·
ἄφωνα δ' ὄντα ταῦτα τοῖς πόρρω λαλεῖ
οἷς βούλεθ'· ἕτερος δ' ἂν τύχῃ τις πλησίον
ἐστὼς ἀναγινώσκοντος οὐκ ἀκούσεται.

Magna similitudo intercedit inter aenigmati verba: ταῦτα τοῖς πόρρω λαλεῖ et Ovid. epist. versum paenultimum:

Hoc saltem miserae crudelis epistula dicat.

Attamen ex hac similitudine vix quidquam concludi potest, quoniam similis locutio alibi quoque exstat, ut Eurip. Iphig. Taur. v. 641 sq.:

καὶ δέλεος αὐτῷ ξῶντας οἷς δοκεῖ θανεῖν
λέγουσα πιστὰς ἡδονὰς ἀπαγγελεῖ.

Ibid. 763: αὐτῇ (sc. ἡ γραφῇ) φράσει. Hippol. Coronif. 365: τὴν λέξιν δέλεος ἥδε μοι θέλει.

..... τιν' ἄλλον
 ... ἀνθρώπων ἔμεθεν φίλησθα
 ἔμεθεν δ' ἔχεισθα
 λαῖθος...

*Καὶ ποθῶ καὶ μάουαι ... *)*

Quae cuncta ad eiusmodi epistulae argumentum quadrare nemo negabit. Quae sententiae cum, ut iam supra ostendimus, in Ovidiana epistula imitando expressae sint, primum inde sequitur eas a Sapphone quoque in eiusmodi epistulae formam induto carmine adhibitae esse; porro autem, quoniam Ovidius Sapphonem ad Phaonem epistolam scribentem facit, poetriae quoque ipsum carmen ad Phaonem scriptum ponere poteris.

Attamen non solum ex poetriae fragmentis cum Ovidiana epistula collatis colligi potest a Sapphone eiusmodi epistolam scriptam esse: aliud quoque vestigium exstat, quod recte intellectum eodem pertinere mihi videatur. In aliquot enim huius Heroidis libris manuscriptis haec epistula ab Ovidio e Graeca lingua in latinam versa esse dicitur. Ita in codice Harleiano ipsi epistulae haec praefatio praemissa est (v. Vries. l. l. p. 7): „Circa lesbie Saphos mitilene epistolam ad phaonem dilectum suum scriptam. Magna extitit contencio quis hoc insigne opus e greco in latinum transtulerit quamvis aduc in dubio id volvatur coniecturis tum ad id ventum est, quod ovidius sulmonensis is siet qui transtulerit“. Idem in codice Parisino (p) legitur, v. supra p. 6 extr. sq. Quae ita mihi interpretanda esse videntur: Antiquioribus temporibus, cum Sapphus carmina

*) Sane miro modo factum est ut iam Bergk tamquam divinando prae-
 riens nostram coniecturam haec fragmenta fere ita enumeraverit, ut nobis
 Ovidiana epistula fretis coniungenda esse videantur,

nondum temporum iniuria consumpta essent, homines litterati, qui et Sapphus et Ovidii carmina lectitabant, ex magna similitudine inter Ovidii Heroidem et Sapphus in Phaonem carmen intercedente coniectando assecuti sunt hanc epistolam ab Ovidio e Graeco translatam esse, non quidem ad verbum, sed ut mos erat, liberius; unde illa a quibusdam servata opinio fluxisse videtur.

Fieri potuit, ut Sapphus epistula Ovidiana prima omnium ceterarum Heroidum a Nasone Sapphonem imitante scripta sit; quod poesis genus cum et ipsi et popularibus haud displiceret, — quod iam ex Sabini responsis *) concludi potest —, Ovidio in mentem venit, ut fabulosas quoque illas heroides absentibus viris aut amasiis eiusmodi epistulas scribentes faceret. Itaque ut in metamorphosei doctus poeta undique ea argumenta colligebat, ubi de mutatis formis sermo erat, ita hic absens coniux aut amatus ansam ad carmen componendum ei praebeuit. Quod vero Ovidius illo Amorum loco novem Heroides suas recensens Sapphonem novissimam nominavit (II, 18, 26), eo minime prohibemur, quominus hanc epistolam primam omnium scriptam esse ponamus, quoniam vix verisimile est poetam epistulas eo ipso ordine recensuisse, quo conscriptae atque in lucem editae erant**). Quibus positis multa menda, quae primitias illas deformant, facilius excusari possunt; quae poeta postea usu

*) V. Amor. II, 18, 27 sqq.

**) Non alienum ab hoc loco esse mihi videtur addere, quomodo explicandum esse censeam, cur haec epistula in libris manuscriptis separatim circumferatur. Cum epistolae Ovidianae in ordinem digererentur, is qui eum laborem susceperat, Sapphus epistolam a ceteris secludendam curavit, cum Sappho minime esset Herois. Posteriore autem tempore factum est, ut alius quidam epistularum digester illum Ovidianum locum (Amor. II, 18, 26) respiciens ceteris Heroidibus Sapphus quoque epistolam novissimo loco asserere e re esse censuerit.

atque exercitatione edoctus evitavit. Quae mihi gravissima causa videtur, quod in hac epistula non omnia ad unguem perpolita reperiantur.

Quaeritur autem, quid statuendum sit de Art. am. III v. 346, ubi Ovidius se ipsum 'illud opus aliis ignotum, novasse' testatur? Mihi quidem Nasonis verba non ita accipienda esse videntur, tamquam in universum valeant; Ovidius enim tantum in latinis litteras eiusmodi epistulas a se inductas esse gloriari videtur. Quae si recte disserui, in hac quoque re Romani poetae ingenii laus, qui illarum ut ita dicam nugarum inventor esse in vulgus creditur, restringenda atque imminuenda erit.

Haec fere sunt, quae ad id quod posuimus demonstrandum afferri posse videantur. Quorum messis praeter opinionem tam larga evasit, (imprimis si exiles Sapphus carminum reliquias respicis), ut racemantibus pauca tantum reliquisse videamur. Attamen etiamsi dimidiam partem eorum quae protulimus missam facias, quippe quasi nimis urgentes interdum similitudinem ibi indagasse nobis videamur, ubi tu nullam statues: nihilominus ea quoque dimidia pars, quae reliqua erit, sufficiet ad demonstrandum Ovidium non solum sententias, fabulas, imagines, singulas notiones ex ipsis poetriae carminibus mutuatum suae epistulae accommodasse, sed etiam totum carmen ad poetriae archetypum composuisse. Quamobrem poeta, si aequalium cuidam suam Heroidem dedicaverit, Graecis anonymi poetae (ap. Bergk. adespot. frag. 62) verbis usus recte ac merito dicere potuit:

Ἐν Σάπφῳς τόδ' ἀμελγόμενος μέλι τοι φέρω.

Appendix.

Praeter Sapphus carmina Ovidius alios quoque fontes adibat indeque sententias in suam epistulam transferebat*), ut imprimis Graecorum epigrammata, unde nonnullos locos esse haustos probabiliter contendere potest; quos hic subiungere liceat. Primum enim Kaibel, qui haud paucas sententias ex Philodemi Gadarensis epigrammatis a Nasone imitando expressas esse docuit**), huius epistulae v. 35 sq. cum Anthol. Pal. V, 132 extr. composuit; utrumque locum exscribimus:

Candida si non sum, placuit Cepheia Perseo

Andromede, patriae fusca colore suae.

Εἰ δ' ὀπι κῆ καὶ χλωρὰ καὶ οὐκ ἄδουσα τὰ
Σαπφούς,

καὶ Περσεύς Ἰνδῆς ἠράσατ' Ἀνδρο-
μέδης.

Ceterum Kaibel non primus eam similitudinem detexit; nam iam a Brodaeus eam erutam esse videre potes apud J. Chr. Wolfium l. l. p. 130 ann. 3, coll. p. 183, ann. 29.

Cui loco alios addimus, qui quamvis non tam prope ad Ovidiana verba accedant, tamen eandem sententiam exprimere videantur. Legimus enim apud Nasonem v. 5 sq.:

Forsitan et, quare mea sint alterna, requiris,

Carmina, cum lyricis sim magis apta mo-
dis?

Et apud anonymum poetam Anthol. Pal. IX, 190, v. 7 sq. haec:

Σαπφὼ δ' Ἡρίωνης ὅσσον μελέεσσιν ἀμεί-
νω,

Ἡρίων' αὖ Σαπφούς τόσσον ἐν ἐξαμέτροις.

*) Cf. infra p. 100.

**) In «Philodemi Gad. epigrammatis» quae inserta sunt Indici schol. Gryphiswald. 1885; cf. Ehwald. l. l. p. 174. — Philodemum autem Ciceronis aequalem fuisse constat.

Utroque enim loco Sapphoni in melica poesi palmam deferri vides: Ovidius tantum poetriam ipsam confitentem fecit, quae Graecus poeta de ea in medium protulerat *).

Porro autem cum Ovidianis vv. 33 et 35:

S u m b r e v i s , a t —

C a n d i d a s i n o n s u m —

comparare potes Philodemici epigrammatis initium (l. l. V, 121):

Μικκὴ καὶ μελανεῦσα Φιλαίνιον, ἀλλ' ἄ—

Porro illi quoque disticho, ubi poetria carmina sua Musarum dona appellans suam gloriam ostentat v. 27 sq.:

At mihi Pegasides blandissima carmina dic-
t a n t :

Iam canitur toto nomen in orbe meum,
complures epigrammatum in Sapphus honorem scriptorum
loci respondent, ut Antipatri Sidonii (l. l. VII, 14 extr.):

δοιδῶ,

*ἄφθιτα μῆσαμένα δῶρ' Ἑλικωνιάδων**);*
Tullii Laureae (ibid. 17):

Μουσάων... ὧν ἀφ' ἐκαστης

*δαίμονος ἄνθ' ὅς ἐμῇ θῆκα παρ' ἐννε-
άδι,*

anonymi (IX, 521 fin.):

*Μέλψαι ἐν πάντεσσιν ἀοιδίμος ἀμε-
ρίοισιν,*

οὐδὲ κλυτὰς φάμας ἔσσει ἡπεδανά.

*) Si Tullius Laurea epigrammatum poeta Ciceronis libertus fuit—
quod Brodaeus (apud J. Chr. Wolfium l. l. p. 128 ann. 3 dubitanter coniecit—
novissimi quoque Anthol. Pal. VII, 17 versus verba τῆς λυρικῆς Σαπφούς
huc referri possint.

**) Eiusdem epigrammatis verba:

ὅς μετὰ Πειθῶ

ἔπλεκ' ἀείζων Περίδων στέφανον

comparari possunt cum v. 195:

Nunc vellem facunda forem,

At ne hic quidem subsistendum est et longius procedere licet. Primum enim illud epigramma dedicatorium, quod apud Ovidium v. 183 sq. legitur:

'Grata lyram posui tibi, Phoebe, poetria Sappho:

Convenit illa mihi, convenit illa tibi'

ad exemplar eorum compositum est, quorum haud exiguus numerus Anthologiae Palatinae c. VI exstat. Complures autem res Romanus poeta ex amatoriiis Graecorum epigrammatis in suam epistolam transtulit, ut paucis demonstrabimus. Ita primum ea, quae vv. 129, 133 recensentur (oscula, ulteriora), cum Philodemi epigrammate (l. l. V, 4 fin.) conferri possunt:

*Καὶ σὺ φίλει Ξανθῶ, με· σὺ δ', ὦ φιλεράστρια
κοίτη,*

ἤδη τῆς Παφίης ἴσθι τὰ λειπόμενα.

Item v. 100:

Et modo dixisses 'Lesbi puella, vale'
cum eiusdem Philodemi verbis congruit (ibid. 308):

Οὐδ' „ὕγιαίνε“ λέγεις;

Noctem amantibus citius praeterire et apud Ovidium (v. 135 sq.) et in Meleagri epigrammate (ibid. 172) legimus:

At cum se Titan ostendit et omnia secum,

Tam cito me somnos destituisse queror.

*Ὅρθρε, τί μοι, δυσέραστε, ταχὺς περὶ
κοῖτον ἐπέσσης;*

Porro apud Ovidium v. 137 sq. antra nemusque conscia sunt Sapphus deliciarum; in epigrammatis vero (ibid. 4 in., 8 in.) nox et lucerna amantium *συνίστορες* nominantur.

Item de Lunae in Endymionem amore Ovidius mentionem fecit v. 89 sq., Philodemus vero epigr. 123:

Σελήνη,

*καὶ γὰρ σὴν ψυχὴν ἔφλεγεν Ἐνδυ-
μίων.*

Postremo autem Ovidii v. 213 colon:

Venus orta mari mare praestat amanti
quodammodo respondet initio exhortatorii epigrammatis eiusdem
Philodemi (l. l. X, 21):

Κύπρι γαλῆναιη, φιλονύμφιε.

Itaque hic quoque miro modo comprobatur, quod iam
in universum ab aliis de Ovidio Graecorum epigrammata
diligentissime perscrutato et imitato observatum est. Quodsi
quaedam ex iis, quae deprompsimus, iam supra in Sapphicis
quoque carminibus expressa esse reperimus*), non est quod
mireris, cum epigrammatum quoque poetae Sapphonem res
eroticas tractantem legentes inde haud pauca imitando expri-
mere potuerint.



*) V. p. 18, n. IV; p. 20, n. VII; p. 30 n. II; p. 31, n. III.

Caput II.

Ex quonam fonte Ovidius alias quasdam res ad Sapphus vitam pertinentes hausisse videatur.

Praeter Sapphus carmina Ovidio in componenda epistula alterum quendam fontem praesto fuisse ipsius poetae verba quaedam manifestum faciunt, quippe quae partim a ceteris discrepent, partim in Sapphus carminibus minime sedem habere potuerint. Ita ea, quae vv. 19 et 201 de poetria Lesbio crimini obnoxia atque inde orta eius infamia leguntur:

Atque aliae centum, quas non sine crimine
a m a v i.

Lesbides, infamem quae me fecistis amatae.

Porro ea quoque, quibus poetriae naturae menda atque defectus enumerantur, vv. 31, 33, 35:

Si mihi difficilis formam natura negavit.

Sum brevis..

Candida si non sum.

Recentiores Welckero praeunte*) haec et alia ex Atticorum

*) Cf. «Sappho von e. herrsch. Vorurth. befr.». pp. 104, 107, 124, imprimis p. 109: «Dass der Römer, der mit der verwirrten Fülle griechischer Sagen und Vorstellungen machte was ihm beliebte, sich an die Komödien gehalten, würde gar nicht auf-
fallen».

comoediis ab Ovidio sumpta esse persuasum habent; ita Neue*), Ulrici**), alii, quos recensere longum est. Quae opinio mihi quidem aut prorsus respuenda aut saltem restringenda esse videtur. Quod ita demonstrare conabor, ut primum ostendam, quisnam sit ille alter fons, quem Ovidius ex mea sententia adire potuerit, tum vero fragmenta comoediarum, quae huc referuntur, perlustrans investigem, quid inde ad recentiorum opinionem sustentandam afferri posse videatur.

Ea, quae supra exscripsimus, Ovidius multo commodius sibi comparare potuit, quam ut idcirco haud parvum Atticarum comoediarum numerum excuteret. Constat enim Alexandrinos grammaticos, a quibus Sapphonem quoque in illum canonem receptam eiusque carmina in novem libros distributa esse in vulgus notum est, et librorum in bibliothecis Alexandrinis asservatorum indicibus, qui *πίνακες* appellabantur, vitas scriptorum breviter enarratas inseruisse, et cum ipsis scriptis coniunctas edidisse, quas aut ex antiquioribus vitarum scriptoribus depromptas in breve redigebant, aut res ab auctoribus de ipsorum vitis relatas colligentes ipsi conficiebant***). Quae cum ita sint, quid est quod obstet, quominus Ovidium id genus Sapphus vita usum esse concedamus? Quod cum minime, si rem ipsam spectas, absurdum dicere possis, aliquot vestigiis insistentes verisimile efficere studebimus.

*) V. l. l. p. 5: «Iniquam de poetria opinionem, quam ex comoediis spectatis lectitatisque homines imbiberant, suo ingenio blandientem expressit Ovidius in Epistola».

**) In libro qui inscribitur: Geschichte der hellen. Dichtkunst. T. II, p. 361, ann. 117: «Aus ihnen—comicos poetas dicit—schöpfte Ovid unstreitig das Meiste, womit er in jener Epistel den Ruf der Sängerin befleckt».

***) Cf. Bergkii Griech. Literaturgeschichte T. I, p. 274, et D. Volkmanni de Suidae biographica dissertationem, quae exstat in Symbolis phil. Bon., imprimis haec verba (p. 729): «De vitis poetarum, quorum carmina grammaticis maxime curae fuerunt..., commentarios aut prologi aut epilogi instar libris ipsis insertos fuisse colligo».

Inter litteraria auxilia, quae nunc ad vitam Sapphus delineandam ascisci possunt, recentiores neglecta plerumque Ovidiana epistula aut tantum dubitanter adhibita primo loco Suidae s. v. *Σαπφῶ* testimonium ab Hesychio Milesio sumptum ponere solent, ubi haud pauca, quae ad poetriae parentes aequales fratres matrimonium amicas discipulas pertinent, collata sunt. Praeterea quaedam ex antiquiore fonte, Maximo Tyrio rhetore petuntur, qui secundo post Chr. n. saeculo exeunte vixit et cc. 7, 9 dissertationis XXIV, quae inscribitur: *Τίς ἡ Σωκράτους ἐρωτική*, etiam Sapphus carminum aliquot fragmenta servavit *).

Iam si Ovidii, Maximi Tyrii, Suidae de Sapphone testimonia inter se comparamus, quaedam ex uno atque eodem fonte, minime vero ex ipsis poetriae carminibus, fluxisse probabile fit. Ita, ut supra vidimus, Ovidius vv. 33, 35 Sapphonem brevi statura et fusco colore fuisse testatur; idem apud Maximum l. l. c. 7 recurrit: *Σαπφονὺς τῆς καλῆς (οὕτω γὰρ αὐτὴν ὀνομάζων χαίρει* (sc. Plato Phaedr. p. 235 C) *διὰ τὴν ὥραν τῶν μελῶν, καίτοι μικρὰν οὖσαν καὶ μέλαιναν*. Novissima verba potius ex vita quadam quam ex comoediis sumpta esse mihi concedes**). Porro inter Sapphus discipulas atque amicas ab Ovidio v. 17 Anactorie quoque numeratur, quod nomen apud Maximum l. l. c. 9 recurrit: *Ὅ-τι, inquit, ἐκείνω* (sc. τῷ Σωκράτει) *Ἀλκιβιάδης καὶ Χαρμίδης καὶ Φαῖδρος, τοῦτο τῇ Λεσβίᾳ Γύρινα καὶ Ἀτθίδι καὶ Ἀνακτορία*. Attamen

*) Vide apud Bergkium fragg. 34, 42, 74, 86, 125, 136.

**) Birt. l. l. p. 432 utrumque locum comparans Maximum Tyrium sua ex hac quidem epistula deprompsisse negat, quoniam vero fonte ille usus sit, accuratius non declarat, nisi forte ex iis, quae antecedunt, Callimachum a sophista compilatum esse statuet. — De ratione, quae inter Maximum Tyrium et Ovidium intercedit, accuratius disputavit Holland in «Leipziger Studien» VII p. 282; cuius disputationis notitiam solum Ehwaldio l. l. p. 219 debeo.

utrum hoc nomen ex vita, an ex ipsis carminibus ab utroque sumptum sit, in dubio relinquendum est.

Apud Suidam quoque duo saltem loci reperiuntur, qui huc referri possint. Primum enim Ovidius vv. 19, 201 poetriam de sua infamia ipsam loquentem facit; quorum versuum fontem poetriae carmina non fuisse luce clarius est. Attamen ne comoediis quidem lectitandis Romano poetae opus erat; nam eam rem a vitae scriptore eum percommode mutuari potuisse facile tibi persuadebis, si Suidae l. l. verba cum Ovidianis comparaveris: *ἐπαῖραι... πρὸς ᾧ καὶ διαβολῇν ἔσχευ αἰσχροῦς φιλίας* *). Quae cum illis ita congruunt, ut unum fontem prodere videantur **). Vitae autem ipsius scriptorem, ex quo uterque hausit, vel ex Atticis comoediis ea sumpsisse vel potius famam inde ortam divulgatamque pro vero accepisse non est quod infitiemur, quamquam iam ipsa poetriae carmina, quae 'amorem spirabant', antiquos ita afficiebant, ut ipse Horatius Epist. I, 19, 28 Sapphonem masculam, Ovidius autem A. a. III, v. 331 lascivissimam appellaverit ***).

Alter locus, quem ex vita desumptum esse puto, v. 29 exstat, ubi de Alcaeō haec dicta sunt:

Alcaeus, consors patriaeque lyraeque.

Quibuscum confer Suidae verba: *γεγονυῖα, ὅτε καὶ Ἀλκαῖος ἦν*. Nihil enim mirum, si in poetriae vita Alcaeī quoque, eius et popularis et aequalis, mentio facta est: veteres enim, quod iam saepius animadversum est, haud raro homi-

*) Birt l. l. p. 431 in Callim. fr. 235 *κηράδι σὺν γλώσση* latinorum versuum fontis particulam detexisse sibi visus est.

**) Cf. infra p. 111 sq.

***) Simili modo Ovidius Anacreontis quoque carminibus lectitatis commotus esse videtur, ut Teium poetam vinosum senem vocaverit, v. ibid. v. 330.

nes quocumque modo insignes vinculo quodam, nonnunquam temporum rationibus neglectis, coniungere studebant.

Quaedam eorum, quae de Sapphone comperta habemus, omnibus fontibus communia sunt: ita *Atthidis* nomen et apud poetriam (fragg. 33, 41) et apud Ovidium (v. 18) et apud Maximum Tyrium (l. l. c. 9) et apud Suidam legitur; *Cleidis* filiae, cuius nomen apud Suidam quoque exstat*), ipsa frag. 85 mentionem facit; etiam Ovidius vv. 70, 120 et Maximus Tyrius l. l. (cf. frag. 136) filiam poetriae memorant nomine omisso**). *Charaxi* denique poetriae fratris Rhodopidem perditae amantis in Sapphus carminibus nomen exstabat (cf. frag. 138), quod Ovidius quoque (v. 117) et Suidas l. l. memoriae prodiderunt.

Iam ex iis quae exposuimus concludi potest Ovidium praeter ipsa Sapphus carmina non Atticorum comoedias, sed tantum poetriae vitam quandam ab Alexandrino grammatico, fortasse a Callimacho, conglutinatam adire atque inde quaedam delibare potuisse, quae ab iis, quae a Maximo Tyrio atque Suida relata sunt, propterea non discrepant, quod hi quoque ex eodem fonte hausisse videantur.

Restat ut perscrutemur, quid Ovidio *Graecae comoediae* suppeditaverint, quantum ex reliquiis earum cum epistulae verbis compositis cum verisimilitudinis specie quadam concludi potest. Sane concedendum est comoedias quoque multa, quae ad poetriae ingenium illus-

*) *Θυγατέρα ἐποίησατο ἐξ αὐτοῦ* (sc. τοῦ *Κερκύλα*), ἡ *Κλεῖς* ὀνομάσθη.

**) Minus probabiliter Sittl in libro qui inscribitur *Geschichte der griechischen Literatur* T. I, pp. 326, 329 Cleidem non filiam, sed amicam Sapphus fuisse contendit; cf. infra p. 87.

trandum pertinerent, Ovidio praestare potuisse; at quaeritur, num ea, quae a comicis cachinni commovendi causa prolata essent, poetae popularibus suis non depravatam, sed veram poëtriae imaginem genuinumque eius ἦθος depicturo, usui fuerint? Minime. Quod non minus absurdum esset, quam si quis Socratis ingenium vitamque descripturus ad Aristophanis Nubes converteretur indeque hauriret. Quod recentiores homines docti non ut par erat recordati comicorum commentis tantas partes inter Ovidianae epistulae fontes assignare non gravati sunt. Cum vero omnium quae huc referri possunt comoediarum aut soli tituli*), aut ubi plurimum, panni quidam ad nos pervenerint, ex quibus rarissime aliquid certi de totius dramatis argumento enucleari potest, recentiores coniciendo atque fingendo ex illis frustulis totas fabulas comminiscentes credulis pro veris venditant. In quorum numero unum est, quod notandum esse censeo: Lesbii criminis, quod Ovidium comoediis usum vv. 19, 201 poëtriae obiecissee credunt, in omnibus comicorum Graecorum fragmentis, qui Sapphus personam induxerunt, ne uno quidem verbo mentio facta est. Quibus praemissis iam ad singula convertamur**).

Ex sex comoediis, quae Sapphus nomine inscriptae erant, Amipsiae, Amphidis, Ephippi dramatum reliquiae tam ieiunae sunt, ut inde de comoediarum argumentis nihil concludi possit***). De Antiphaneae Sapphus fragmento, quod primo aspectu Ovidium imitatum esse suspicari potes, iam supra disseruimus****). Restant Diphili et Timoclis fabulae, quae a

*) Tituli eorum dramatum sunt tres: Sappho, Phaon, Leucadia.

**) Valde doleo, quod mihi Ribbeckii commentatione «Die Parodien bei den attischen Komikern. 2. Theil», in annalibus Zeitschrift für das Gymnasialwesen XVII (1863) pp. 321—348 impressae, uti non licuit.

***) Vide Meinekii Fragg. Com. Gr. II, p. 707; III, pp. 315, 338,

****) Cf. p. 39 sq.

Sapphone nomen habuerunt: ad alterius comoediae fragmentum infra revertemur*); inter Diphili vero duo fragmenta (v. apud Meinek. l. l. vol. IV, p. 409) et Ovidianam epistulam nulla similitudo intercedit.

Sequitur Platonis comici Phaon**). Cuius fabulae si et argumentum et fragmenta perscrutabimur, ab Ovidio inde Phaonem desumptum esse vix statuemus, cum Phaon, quem Sappho epistulae v. 145 dominum silvae appellat, in comoedia pauper navicularius fuisse videatur***). In duodecim vero eius comoediae reliquiis a Meinekio l. l. II pp. 672—678 collectis data opera nihil eiusmodi indagari potest, quod apud Ovidium recurrat.

Praeter has fabulas sub finem inspiciamus fragmenta earum, quibus Leucadiae nomen inditum erat. Equarum

*) V. p. 82 sq.

**) Antiphanis Phaon huc referri non potest, quoniam in illa comoedia non hic noster Phaon, sed ieiunus Pythagoreus in scaenam inductus esse videtur; cf. Meinek. l. l. vol. I p. 323 et Kock. Comiorum gr. fragg. II, 1, p. 104. Quod animadvertere non supervacaneum esse censui, cum homines litterati, ut Flach l. l. p. 490, Sittl l. l. p. 326, Wharton l. l. p. 38 nostrum Phaonem a comico irrisum esse credere videantur.

***) Argumentum eius comoediae videtur servatum esse a Palaephato de Incred. c. 49 (v. Bergk. frag. 140), vel in brevius redactum a Servio (ad Verg. Aen. III, 279): «Phaon»—inquit hic—«cum esset navicularius, solitus a Lesbo in continentem proximos quosque mercede transvehere, Venerem mutatam in anus formam gratis transvexit; quapropter ab ea donatus unguenti alabastro, cum se in dies inde tum ungeret, feminas in sui amorem trahebat». Quod argumentum minime antiquam fabulam quandam Lesbi insulae propriam redolere, sed a comico fictum esse mihi videtur. Simili modo a Cratino quoque ipso fictum esse puto, quod de Phaone a Venere in lactuca occultato narravit (v. Athen. II p. 69 D, coll. Meinek. l. l. II, p. 178): ut enim in Platonis Phaone (v. Meinek. l. l. II p. 672 sq.) ὑποβιητικῶν τὰ βρώματα recensebantur, ita ex contrario a Cratino Venus Phaonem in iis herbis occultans inducebatur, quibus viri ad coitum enervari antiquitus credebantur.

Palaephato autem accidit idem atque plurimis recentiorum, ut Phaonem illum, qualis a comicis fictus erat, cum vero confuderit: nam ad illud ex comoedia desumptum argumentum ex suo haec addidit: οὗτος δὲ Φάων ἰσθλὴν, ἐφ' ᾧ τὸν ἔρωτα αὐτῆς ἡ Σαπφὼ πολλάκις ἄσμα ἐποίησεν.

numero Alexidis Amphidisque comoediarum fragmenta ita comparata sunt, ut ex iis de fabularum argumentis nullam coniecturam facere possis*). Superest sola Menandri Leucadia, quo fonte Ovidium in compingenda epistula usum esse opinantur. Quae opinio quam futilibus argumentis nitatur, statim videbimus. Ex Menandri fragmento a Strabone X, c. 452 servato (v. Meinek. l. l. vol. IV, p. 158) summa cum verisimilitudine concludi potest in illo dramate Sapphus nullas partes fuisse et tantum tamquam in praeter-eundo initio comoediae post prologum famae de poetria de Leucadio promunturio saltu demissa mentionem factam esse. En illa Menandri de Sapphone verba sexcenties decantata:

Οὐδ' ἄν λ' ἐγὼ τὰ προῶτα Σαπφῶ
τὸν ὑπέροκτον θηρώσα Φάων
οἰστρώωντι πόθῳ ὄψαι πέτρας
ἀπὸ τηλεφανοῦς.

Quae verba si in prologo posita essent, tum sane concedi posset poetam eos qui spectabant de fabulae argumento, quod tractaturus erat, edocere voluisse; cui tamen adversari videtur scholion in Hephaestionem (v. Westphal. Scriptt. metr. gr. p. 223), ubi scholiasta hos anapaestos εἰςβολὴν τῆς Λευκαδίας Μενάνδρου appellasse videtur, quam vocem Meineke l. l. Ip. 443 'proximum locum post prologum', itaque iam ipsius dramatis initium significare testis est; cf. ibid. vol. IV, p. 159.

Ad argumentum huius fabulae restituendum a recentioribus plerumque Servii locus supra allatus accitur, ubi haec sequuntur: „In quēis (sc. feminis amore in Phaonem flagrantibus) fuit una, quae de monte Leucate, cum potiri eius

* V. Meinek. l. l. III pp. 311, 442.

nequiret, abiecis se dicitur“. Itaque illam u n a m Sappho-
nem fuisse coniciunt. At hoc non dictum est, neque verisi-
mile esse puto Servium, cui poetria minime ignota erat, ita
locuturum fuisse, ut id in incerto reliquerit, si illa ‘una’ Sap-
pho fuisset; tum vero ex illis verbis *πρώτη Σαπφώ* potius
concludi posse videtur de a l i a femina in hoc dramate sermonem
esse, quae Sapphus exemplum secuta sit. Porro [autem Turpilii
fragmenta, a quo Menandri Leucadia latine reddita est, non
feminae, sed v i r i cuiusdam insano amore perculsi primas
partes in ea fabula fuisse docent; cf. Cic. Tusc. disp. IV, 34,
72 sq. Quae cuncta documento sunt et argumentum Menan-
drae Leucadiae aliud fuisse quam quod ei vulgo substituitur,
neque Ovidium quidquam ad epistulam componendam inde
haurire potuisse*).

Haec fere sunt, quae nobis comicorum poetarum fragmen-
ta perscrutantibus ad quaestionem de rerum ad Sapphus vitam
pertinentium fontibus solvendam spectare videantur. Quibus
perpensis facere non poteris, quin illam pervulgatam opini-
onem de Ovidiana epistula ineptiarum a comicis fictarum
referta missam facias ipsique epistulae auctori, utpote qui ex
fonte commentorum limo minime inquinato hauserit, plus
fidei, quam hucusque fiebat, habere audeas.

Iam igitur absoluta hac priore nostrae commentationis
parte, qua in Sapphus epistulae Ovidianae fontes accuratius
inquirere nobis propositum erat, paucis repetere liceat, quae in
Romani poetae epistulam Sapphus scribentis *φροντιστήριο*
protervius inspicientes didicerimus. Itaque vidimus Ovidium

*) Iam Meineke l. l. p. 159 de illa Serviana narratione haec: «Num
vero—inquit—omnia ista, quae de Phaone tradit Servius, ex Menandri fabula
adumbrata sint, dubitare licet».

in Sapphus carminibus ediscendis occupatum in ceterorum numero unum epistolae quodammodo simile, ubi poetria maestitia afflicta absentem Phaonem alloqueretur, ita adamasse, ut id ad imitandum sibi proposuerit; quem tamen, quo propius atque verius Sapphus ingenium describeret, non solum illud carmen, sed etiam alia perscrutatum inde plurimas res sententias locutiones decerptas latine vertisse atque in suum carmen transtulisse, alia mutato poetriae rerum statu ipsa quoque commutata e contrario descripsisse, ita ut legentibus ut ita dicam Sapphonem ipsam latine loquentem induxerit. Porro autem praeter Sapphus carmina Ovidium brevem quandam poetriae vitam, ab Alexandrino grammatico conglutinatam, quae ipsis carminum libris praemissa erat, in compingenda epistula adiisse coniecimus; postremo autem loco epigrammatum Graecorum imprimis amatoriorum complura vestigia in epistula deprehendi posse planum fecimus. Quae cuncta a Romano poeta in rhetorum scholis versato in brevius contracta aut aucta amplificataque sunt. Cum vero recentiores homines docti aliis fontibus auxiliisque in illa epistula scribenda Ovidium usum esse contendunt, ne incerti haereremus, eorum sententiae nobis examinandae erant. Quo officio ita functi sumus, ut primum Birtii compluribus locis allatis, qui Ovidium Callimachi Aetia compilasse coniecerat, et cum Romani poetae verbis compositis Ovidiana propius ad Sapphica quam ad Callimachea accedere ostenderimus. Postremo autem divulgatissima eorum opinio nobis ponderanda fuit, qui Ovidium nonnullas Graecorum comoedias, quae ad Sapphus historiam pertinebant, diligentissime lectitasse indeque plurimas res ad poetriae ingenium describendum facientes deprompsisse persuasum habent. Attamen ne his quidem commoti sumus, ut nostram opinionem missam faciamus: in omnibus enim Graecorum

comicorum fragmentis, quae huc referuntur, nihil a nobis investigari potuit, quo illa opinio hominum litteratorum mentibus insita fulciri sustentarique posset. In qua re nobiscum unumquemque facturum esse putamus, qui incertis certiora praeponere satius ducit.

Firmissimo autem documento ad demonstrandum Ovidium sua neque ipsum finxisse neque e comoediis hausisse id esse putamus, quod ne unum quidem nomen, ne una quidem res apud Romanum poetam a quoquam inveniri potuit, quae eum mendacii convinceret vel temporum rationibus quodammodo adversaretur. Quod minime accidisset, si poeta aut ipse finxisset aut eiusmodi fontem in componenda epistula adiisset.

Cum igitur a nobis demonstratum sit, quomodo epistula Ovidiana orta et concinnata esset, restat ut doceamus, quid emolumenti ex hac nostra minutissima lucubratione percipi posse opinemur. Primum igitur inde sequitur Sapphus epistulam Ovidianam, quippe quae pretiosissimas Sapphicae poeseos reliquias multasque res ad poetriae vitam pertinentes amplexa sit, plurimi faciendam esse. Itaque iam supersedebis illud quaerere, unde Ovidius sciat, quae aliunde nobis ignota unus narret*), bonaque fide Sapphus vitam describens inde haurire poteris. Porro autem ad Ovidii ipsius carminum pangendorum viam atque rationem subtilius cognoscendam et poeticam indolem accuratius aestimandam nostram disquisitionem aliquid afferre et illius latissime patentis quaestionis de Romanorum litteris e Graecis pendentibus nos quoque particulam solvisse benevole largieris. Quae gravissima esse censemus. Ut vero ii qui antiquitati studentes saepissime in effodiendis aedium fundamentis tamquam in praetereundo

*) Cf. v. 17 (de Cydnone); v. 61 sq. (de Sapphus patre); v. 167 sqq. (de Deucalione).

alias quoque res, quas minime quaerebant, in lucem proferre solent, ita nobis quoque contigit, ut quaedam observaverimus, quae nullius momenti esse minime dices: ita epistula freti Sapphoni adespota fragmenta quaedam vindicabamus, alia corripiebamus vel explicabamus, cum Ovidiana verba imitando expressa ad sententiarum nexum in Sapphus carminibus divinandum tamquam ansas nobis dedissent *). Cum denique in hac epistula eadem poetae imitandi ratio reperiatur atque in ceteris Heroidibus, quarum Ovidiana origo procul dubio est, consentaneum erit, ut Sapphus quoque epistulam genuinum Nasonis opus esse agnoscas.

Quamobrem non est, cur vereamur, ne laborem a nobis susceptum ubere fructu carentem supervacaneumque statuas.

A p p e n d i x.

Cum supra ne unum quidem satis certum vestigium comoediarum ab Ovidio in componenda epistula adhibiturum reperire potuerimus, apud alios scriptores nonnulla exstare, quae ex illo fonte fluxisse videantur, minime

**) In hac re opiniones recentiorum valde fluctuant, qui ea verba, quae ex ipsorum sententiis Sapphonem minus decere videantur, plerumque ita explicare conentur, ut poetriam non suos, sed alius cuiusdam puellae affectus describere statuunt. Quod quam perversum sit, hoc loco paucis expediam. Constat enim inter duo illa melicae poesis genera id discriminis intercedere, ut in choricis quidem carminibus, qualia sunt Alcmanis, Stesichori, aliorum, multa argumenta ex epica poesi desumpta occurrant, ubi poetae, quae alii homines senserint, in medium proferant; earum autem odarum, quae lyricaе κατ' ἔξοχον appellantur, proprium est ea versibus amplecti, quibus ipsius poetae animus imbutus sit, quae ipsum laetitia aut maerore afficiant. Itaque cum Sappho (carminibus nuptialibus exceptis) non choricis odas, sed tantum monodias scripsisset, illa argumenta in eius carminibus sedem habere non potuerunt. Quod optime C. O. Müller (GdgL. p. 296) perspexit atque his verbis expressit: «Bei der Sappho ist die Poesie ganz Sache des Innern und sie spricht keine Gefühle aus als wirklich erlebte und erfahrene». Quae cum ita sint, illam recentiorum interpretandi rationem a vero longissime recedere mihi concedes.

est negandum. Huc imprimis duo Suidae loci referendi sunt, e quibus ab antiquorum quibusdam non unam Sapphonem, sed duas fuisse memoriae proditum esse discimus. Quorum locorum priore, assuto iis quae Suidas s. v. *Σαπφώ* de poetria narravit, haec legimus: *Σαπφά, Λεσβία ἐκ Μιτυλήνης, ψάλτρια. αὕτη δι' ἔρωτα Φάωνος τοῦ Μιτυληναίου ἐκ τοῦ Λευκάτου κατεπόντωσεν ἑαυτήν. τινὲς δὲ καὶ ταύτης εἶναι λυρικήν ἀνέγραψαν ποιήσιν*. Altero autem loco (s. v. *Φάων*) exstant haec: *Τοῦ Φάωνος ἔρασθῆναί φασι σὺν πολλοῖς καὶ Σαπφῶ, οὐ τὴν ποιήτριαν ἀλλὰ Λεσβίαν, καὶ ἀποτυγχάνουσαν ᾄψαι ἑαυτήν ἀπὸ τῆς Λευκάδος πέτρας*. Priusquam ad explicandam de Sapphus persona controversiam accingamur, quae ex utroque loco nascitur, non supervacaneum esse putamus posterioris loci mendum corrigere, quod nondum sublatum esse opinamur: vocabula enim *ποιήτριαν* et *Λεσβίαν* inter se non sunt contraria, cum poetria quoque, Fresno oriunda, *Λεσβία* fuerit. Quapropter posteriorem vocem corruptam esse non est quod infitieris. Itaque priorem locum respiciens pro *Λεσβίαν* scribendum esse *ψάλτριαν* proposuerim, qua lectione accepta omnia recte sese habent.


Iam quaeritur, quid de hac altera Sapphone—psaltriam dico—statuendum sit? Ex prioris Suidae loci verbis: *τινὲς δὲ καὶ ταύτης εἶναι λυρικήν ἀνέγραψαν ποιήσιν* sequitur iam antiquitus de Sapphone psaltria dubitatum esse; recentiorum vero plerique hanc Sapphonem a Graecis litterarum historiae scriptoribus fictam esse persuasum habent, cui omnia, quae poetriam minus decere viderentur, assignari possent*). Quae opinio an accipienda sit, dubito: non enim ab hominibus litteratis, sed a comicis poetis

*) Cf. e. g. Schöne l. l. p. 760.

hanc Sapphonem fictam, ab illis vero e comoediis desumptam esse a veritate non abhorreere mihi videtur. Supra enim planum fecimus inter Sapphus carmina, quae ad Phaonem pertinebant, unum fuisse, ubi Naias poetriae suaderet, ut saltu de Leucade tentato insano amoris mederetur; cuius carminis et particulam inter poetriae fragmenta servatam et argumentum ab Ovidio vv. 157—175 imitando expressum epistulaeque intextum esse ostendimus. Ex hoc ipso carmine fama illa oriri potuit Sapphonem re vera Naiadis consilio obsecutam de illo promunturio in mare se praecipitasse *); porro autem idem carmen comicis quoque ansam dedit, qua arrepta Sapphonem psaltriae personam indutam profugum amasium sectantem in scaenam inducerent desperatoque successu illud periculum subeuntem facerent**). Ita simplicissime illa quaestio solvi potest. Illam enim de poetriae Leucadii saltu narrationem minime veritate niti multis argumentis iam ante nos ab aliis prolatis demonstrari potest: primum enim mirum est neminem veterum memoriae prodidisse, qualis eventus illud audax Sapphus facinus secutus esset; porro in indice eorum, quos illud periculum subiisse antiqui referebant, Sapphus

*) Cf. Neue I. I. p. 6.

**) Quodsi in universum clarius designatum habere velis, quae ut ita dicam necessitudo inter Sapphus carmina (A), Atticorum comoedias (M), et Ovidianam Sapphus epistulam (a) intercedat, duo stemmata tibi apponimus, quorum priore plurimorum e recentioribus sententia, posteriore autem nostra propius declaratur:



nomen deerat *); postremo autem epigrammatum scriptores poetriam in Lesbo insula humatam esse testantur **). Quod autem Servius Leucade templum a Phaone Apollini Leucadio dedicatum esse testatur ***), non magni faciendum est; fieri enim potuit, ut incolae eius loci, imprimis Apollinis sacerdotes, quo templum sub antiquitatis specie magis reverendum efficerent, illa fama de Sapphone avide arrepta et in usum suum conversa a Phaone conditum esse ipsi finxerint. Quae si nobiscum posueris, non erit, cur non assentiaris Paulidi, poetriae populari, qui suam de Sapphone dissertationem ****) ita exorsus est: *Μία καὶ μόνη ἐγένετο Σαπφώ.*

*) V. apud Wharton. l. l. p. 18.

**) Cf. Antipatr. Sid. (Anthol. Pal. VII, 14); Tull. Laur. (ibid. 17).

***) Ad Verg. Aen. III, v. 279: «Menander et Turpilius comici a Phaone Lesbio id templum conditum dicunt».

****) Σαπφὼ ἡ Μυτιληναία. (Lipsiae, a. 1885).

PARS POSTERIOR.

SAPPHUS NOTITIAE COMPLENDAE

CORRIGENDAEQUE EXPERIMENTUM.

Ἡμεῖς δὲ κλέος ὅλον ἀκούομεν οὐδέ τι ἔμεν.

Hom. II. II, 486.

Cum tanto locorum ex Sapphus carminibus desumptorum numero collecto penitus perspexerimus planeque cognoverimus Ovidium Sapphus epistulam compositurum ad poetriae carmina accurate ediscenda sese convertisse, ipsa epistula longe maximi momenti inter testimonia ad poetriam spectantia habenda est. Itaque iecimus haud infirmum fundamentum, in quo insistentes salva ratione in multis iisque gravissimis de poetria quaestionibus solvendis multo verisimilius iudicium ferre possimus, quam adhuc fiebat, cum homines litterati, imprimis recentiores, falsis opinionibus seducti eo quod gravissimum erat testimonio resputo certatim coniciendo et ex silentio auctorum concludendo ad veritatem propius accedere conarentur *). Iam igitur ad singula accedamus. Sane non habemus in animo totam de poetria opinionum farraginem recensere—(sunt enim quaedam eiusmodi, ut ne his quidem auxiliis adhibitis quidquam profici posse videatur)—; at volumus imprimis ea seligere, quae ex Ovidiana epistula ducta

*) Facere non possum, quin Welckeri illius ingeniosissimi poetriae patroni sententiam apponam, quae in universum dicta hac quoque nostra disquisitione optime probatur; cuius verba sunt (v. Kl. Schriften II p. 129): «Auf jede grössere und tiefer begründete Wahrheit beziehen sich immer viele untergeordnete Dinge... Es ist der Nebenvortheil der einfach richtigen Wahrnehmung, dass sie zur sicheren Berichtigung vieler andern Umstände und Beziehungen Veranlassung giebt».

recentiorum de poetria sententiis ut ita dicam recta fronte repugnant; quas ipsas spectatas novis argumentis refellere conabimur.

Itaque primo loco ad illam de Phaone controversiam dirimendam convertemur, quem ab Ovidio ex Sapphus carminibus desumptum esse statuimus. At recentiorum plurimi Phaonem unquam fuisse negant eiusque personam tantum ab Atticis comoediarum scriptoribus fictam esse persuasum habent *). Quae opinio eo facilius in hominum doctorum mentibus radices egit, quod Phaonis nomen in Sapphus fragmentis nusquam legitur, Palaephathi autem de eo testimonium, utpote qui auctor aetate inferior sit, leve nec satis fidum putatur (v. p. 54 extr.). Ubi vero poetria pulchrum quendam iuvenem alloquitur, ea verba ad alium quendam ab hominibus litteratis referuntur, ut frag. 29, quod supra cum Bergkio de Phaone dictum et ab Ovidio imitando expressum esse ostendimus, Schoene l. l. p. 742 ad Larichum poetriae fratrem spectare putat **).

Quae recentiorum sententia multis nominibus impugnari et labefactari posse nobis videtur. Primum enim quod ad id attinet Phaonis nomen in Sapphus fragmentis hodie non exstare, hoc forte accidere potuit; nam Bathylli quoque, pueri ab Anacreonte amati, nomen in huius fragmentis non exstans ab antiquissimo teste Horatio Epod. XIV, 9 servatum est ***), neque quisquam unquam de eo dubitavit. Porro Lycus quoque Alcaei, quem a poeta celebratum esse Horatius Carm.

*) V. C. O. Mülleri Geschichte der griech. Litt. ed. 4, t. I p. 291 sq., Kock. l. l. passim, Flach., qui Chron. Par. p. 18 ann. ad v. 51 haec: «Phaoni—inquit—nullum apud antiquiores locum fuisse constat», alios; cf. infra p. 93. Comparettili lucubrationem «Saffo e Faone dinanzi alla critica storia» (Firenze, 1876) non inspeximus.

**) Bergk hoc unum frag. 29 (coll. 140) ad Phaonem spectare statuit; nos autem Ovidianam epistolam potissimum secuti haec frustula e carminibus, quae ad Phaonem referebantur, ducta esse censemus: fragg. 21—23; 110; 115; 126; ex adespotis vero 56 A, B; 76. De frag. 75 v. infra p. 73*).

***) «Non aliter Samio dicunt arsisse Bathyllo
Anacreonta Teium».

I, 32, 11 testatur *), semel tantum frag. 58 ab ipso commemoratur, ubi lectio ne certa quidem esse videtur. Itaque quam fidem Horatio habemus, in simili quaestione cur Ovidium ea non dignum ducamus, non video. Quamobrem Bergk iure mihi videtur illud fragmentum ad Phaonem retulisse. Porro autem non est verisimile comicos poetas Phaonis personam ipsos finxisse; quod si fecissent, eorum commentum omni ironica vi careret, quam non tam in fingendo, quam in veris pestringendis atque satirico sale perfricandis constare nemo est qui nesciat **). Ita e. g. Aristophanes in Equitibus Paphlagonis nomine non fictam personam quandam, sed Cleonem demagogum, in Nubibus Socratem, in Ranis Euripidem irridebat. Et sane, comicis poetis argumentum haud contemnendum offerebatur: poëtria enim, quam iam

„primae lanuginis aetas

abstulit atque anni, quos vir amare potest“
cedens vi Amoris, quem ipsa ἀμάχανον ὄρπετον esse fate-
tur ***), Phaonis, iuvenis eximiae pulchritudinis, amore capitur,
qui amore mutuo ei respondet. Iniquo autem casu fit, ut iu-
venis ille Lesbo insula repente relicta in Siciliam profugerit.
Cuius repentino neque opinato discessu poëtria gravissimo mae-

*) «Et Lycum nigris oculis nigroque

Crine decorum».

**) Cf. Horat. Satir. I. 4, vv. 1—5.

***) Cf. frag. 40:

Ἐρὸς δ' αὖτε μ' ὁ λυσιμέλης δόνει,
γλυκύπικρον ἀμάχανον ὄρπετον.

Mihi imprimis hoc frag. ad maturiorem poëtriae aetatem referendum esse videtur, qua amoris impetui sese iterum succubuisse ipsa fatetur. Quod primum e δ' αὖτε voce quodammodo sequitur coll. Horat. Carm. IV, 1 in:

Intermissa, Venus, diu

Rursus bella moves?

Tum ipsum illud ἀμάχανον epitheton significare videtur Sapphonem contra illum impetum luctari quidem velle, cum ἔσαν γεραitéραν minime deceat amare, attamen frustra: amoris enim vim esse insuperabilem.

rore affecta et luget et in somniis eum videt osculaturque et in Siciliam eum sequi vult et consilium capit amoris sanandi causa de Leucadio promunturio in mare sese praecipitandi. Quae cuncta et per se minime absurda sunt et in Sapphus carminibus descripta legebantur, ut ex Ovidiana imitatione concludi potest *), et a comicis poetis in maius aucta depravataque in scaenam induci poterant. Non autem obliviscendum est Ovidium carminibus Sapphus usum ea referre, quae poetria sese facturam esse cecinerat; comici vero et posteriores ab iisdem carminibus profecti poetriam revera et in Siciliam fugisse et de Leucadio promunturio saltu se demisisse finxerunt**). Utrumque commentum iam antiquitus pro vero accipiebatur atque propagabatur, ut multi veterum loci testantur; recentiores autem homines docti posteriore narratione reiecta priorem de Sapphus in Siciliam fuga nihilominus amplexi pro vero constare hucusque persuasum habent. Attamen ne hanc quidem tenendam esse ipsis eorum rationibus perpensis demonstrare tentabimus.

Itaque primo loco gravissimum de poetriae fuga testimonium examinandum erit, quod in Chronico Pario exstat, ubi v. 51 olim haec legebantur ***):

*ΑΦΟΥΣΑΠΦΩΕΓΜΙΤΥΛΗΝΗΣΕΙΣΣΙΚΕΛΙΑΝΕ-
ΠΑΕΥΣΕΦΥΓΟΥΣΑ*

..... ΟΛ Θ

*) Cf. vv. 9 sq.; 20 sqq.; 45 sq.; 99 sqq.; 123 sqq.; 52: Sicelis esse volo; 157—175.

**) Ad eiusmodi fabularum de antiquis poetis fontem veteres nonnunquam recurrisse documento est illa de Hipponactis iambographi morte narratio: cum enim saepius in carminibus de inopia conquestus esset, eum fame mortuum esse concluderunt (cf. Ovid. Ibid. v. 521). Simili modo Bergk illius de Stesichori caecitate fabulae originem ad frag. 26 (ed. tertiae) explicabat.

***) Nunc haec verba in marmore Pario iam evanuerunt.

Ultima verba ita corrupta sunt, ut iam Boeckh de eorum restitutione desperaverit *); Carolus quoque Mueller in *Fragg. histor. gr.* T. I p. 581 lacunam probabiliter expleri posse negavit. Attamen recentiores nihilominus certatim coniciendo loco mederi conantur Barthélemyi sententiam iam ante hos centum annos prolatam secuti, qui Sapphonem cum Alcaeo ceterisque Mitylenaeis nobilibus a Pittaco pulsam in Siciliam fugisse primus coniecit **). Ita nuper Flach l. l. p. 18 novissimam Θ litteram ex O corruptam esse statuens locum resarciri posse arbitratur, si legas: [σὺν ἀλλοις] ὁλ [ιγαρχι- x]o[ις]. Quod minime est verisimile; nam et in Sapphus carminibus et in veterum testimoniis ne unum quidem verbum exstat, quo doceamur poetriam Lesbiorum intestinis bellis se immiscuisse vel *στασιωτικά* quaedam scripsisse; itaque non erat, cur a Pittaco patria pelleretur, quem cum in Alcaeum captum potius magnanimum quam ulciscendi cupidum se praestitisse constet ignoscere melius ulciscendo ducentem ***), eo secius credendum est in teneram****) patre orbam poetriam,

*) V. CIG. vol. II, p. 317: «Lacuna vs. 51 expleri nequit... Fortasse aliquid de Phaone dictum erat».

**) V. eius annotationem ad «Voyage du jeune Anacharsis en Grèce» T. I, p. 442 sq. (ed. Hachette, Par. 1881): «L'endroit—inquit—où la chronique de Paros parle de Sapho, est presque entièrement effacé sur le marbre; mais on y lit distinctement qu'elle prit la fuite, et s'embarqua pour la Sicile. Ce ne fut donc pas, comme on l'a dit, pour suivre Phaon, qu'elle alla dans cette île. Il est à présumer qu' Alcée l'engagea dans la conspiration contre Pittacus, et qu'elle fut bannie de Mitylène en même temps que lui et ses partisans».

***). Cf. Heracliti testimonium apud Diogen. Laërt. I, 76: «Συγγνώμη τιμωρίας κρείττων».

****) Schoene l. l. p. 759 mittit Sapphonem viginti annos natam in Siciliam; ex Ovidii vero verbis supra allatis (v. 85 sq.) sequitur eam iam maturioris aetatis fuisse, cum illam fugam pararet, quod Mure quoque l. l. verbis, «a middle aged woman» statuere videtur; Kock denique l. l. p. 71, quo magis Sapphus in Phaonem amorem a fide abhorrentem efficeret, poetriam anum plus sexaginta annorum Phaonis amore ardentem finxit. Iam ipsa haec opinionum varietas illam de Sapphus in Siciliam fuga famam dubiam reddit.

studiis suis fundamenta Mitylenaeorum reipublicae minime labefactantem tam crudeliter consuluisse*). Denique Sappho apud Ovidium omnes suas calamitates v. 61 sqq. percensens ne uno quidem verbo exsilii sui mentionem facit; quod si viginti annos natae accidisset, Nasonem omissurum fuisse non est verisimile. Quibus de causis Barthélemyi coniecturam reiciendam esse censeo**). Quidsi nihilominus coniciendo assequi velimus, quae ibi antiquitus scripta fuerint, potius Boeckhium secuti Phaonis mentionem ibi factam esse ponemus et in ολ litteris Cercolae Sapphus mariti vestigia exstare cum Baumgartenio (v. apud Schoenium l. l.) statuentes ita legemus: *φυγοῦσα [ἄνδρα Κερκ] ὀλ [ἀν πό] θ [ω τοῦ Φάωνος ***]*. Quibus verbis si eam annorum Marmoris Parii definitionem addemus, quae ex Schoenii docta computatione ad hanc epocham optime quadrare videtur (ἔτη ΗΗΗΔΔΠΙΙΙ), neque litterarum numerus redundabit et vestigiis eorum, quae scripta erant, insistentes locum restituemus. Ceterum non magni refert, quid ibi scriptum fuerit, quoniam tota illa de poetriae in

*) Cf. Neue l. l. p. 8.

**) Schoenii quoque lectio respuenda esse videtur, qui l. l. p. 759 haec proposuit: *φυγοῦσα [καὶ Ἀλκαῖος] ὁ Λ[έσβιος ἐξέ]θ[ηκε τὰ στασι-στικὰ ἔτη ΗΗΗΔΔΠΙΙΙ]*. Nam ex ea minime apparet et quem et quae de causa Sappho in Siciliam fugerit et addita verba ὁ Λέσβιος supervacanea sunt, quoniam hoc loco, ubi de Sapphone agitur, nemo de altero illo Alcaeo Messenio, epigrammatum auctore, cogitabit, (de quo v. Bernhardy l. l. II, 2, p. 760). Porro autem homo doctus multo plures litteras inculcavit, quam quot lacunae amplecti posse videntur: apud Boeckhium enim θ litteram quinque tantum puncta praecedunt, post eam autem ad finem v. 51 fere viginti litterarum spatium vacuum exstat, quantum collatis ceteris versibus, qui aetatem tulerunt, concludi potest; at Schoene priorem lacunam novem litteris, posteriorem autem viginti sex explevit.

***) Forsitan ante ἄνδρα vocem articulum desideras; at cf. Kruegeri «Griech. Sprachlehre» I, § 50, 3, 8. De Cercola infra plura dicemus. Desiderium vero absentis Phaonis πόθου voce optime exprimi testis est Plat. Cratyl. p. 420 A: πόθος καλεῖται σημαίνων οὐ τοῦ παρόντος εἶναι, ἀλλὰ τοῦ ἄλλοθι πον ὄντος καὶ ἀπόντος. Item in Menandreae Leucadiae fragmento supra p. 55 allato dictum est de Sapphone: *θηρῶσα Φάων' οἰστρῶντι πόθῳ*.

Siciliam itinere narratio non iam propterea, quod in Marmore Pario legitur, necessario pro vera accipienda est. Cuius Marmoris auctoritas non tanta est, ut ei semper fidem habeamus, cum inter veras res commenta quoque illuc relata sint, ut ab hominibus doctis iam non semel animadversum est*); quibus hoc quoque de Sapphus in Siciliam fuga et causa eius a nobis suppleta testimonium annumerandum esse puto.

Porro etiam ex Sapphus frag. 6:

**Η σε Κύπρος καὶ Πάφος ἢ Πάνορος*

de poetriae in Siciliam itinere coniecturam faciunt; ita Bergk ad hoc frag. poetriam 'Sicularum rerum non expertem' fuisse ait. At obici potest Sapphoni non fuisse opus itinere, ut Panormi Veneris cultum tum floruisse sciret. Quodsi vero eo argumento utamur, tum eam Cyprum quoque insulam visitasse concedendum erit. Itaque hoc argumentum ne nauci quidem faciendum esse contendo originemque geographicorum nominum in Sapphico carmine e communi poetarum usu explicandam esse conseo. Menandro enim rhetore teste invocatorum hymnorum auctoribus usu acceptum stabilitumque erat, ut deos, ad quos converterentur, variis nominibus ab iis locis, quae invocatis diis deabusque imprimis placebant, ductis invocarent, quod rhetor ille in universum his verbis praecepit: *Μέλλων δὲ πληροῦν τὴν ὑπόθεσιν χρῆσθαι ἀνακλιτικοῖς ὀνόμασι τοῦ θεοῦ οὕτως, ἀλλ'*

*) Huc referri potest v. 65 sq. fabula de Stesichori poetae in Graeciam itinere, de quo cf. Flach. l. l. p. 24 et Geschichte d. gr. Lyr. p. 321, ubi haec legimus: «Die in der Marmorchronik darüber erhaltene Notiz verdient nicht den geringsten Glauben, da sie gänzlich auf Erfindung zu beruhen scheint»; porro cf. ibid. p. 326 ann. 1. Ceterum iam Boeckh l. l. p. 303 Marmoris Parii auctorem «mediocriter doctum hominem fuisse omnisque generis errores et vitia ab eo commissa esse» ait. Quamobrem non supervacanea sunt, quae Bergk GLG. I p. 277 monuit: «Die Angaben (sc. des M. P.) sind nur mit Vorsicht zu benutzen».

ὦ Σμίνθιε καὶ Πύθιε, ἀπὸ σοῦ γὰρ ἀρξάμενος ὁ λόγος εἰς σέ καὶ καταντήσῃ, ποίαις σέ προσηγορίαις προσφθέγομαι; οἱ μὲν σέ *Ἀύκειον* λέγουσιν, οἱ δὲ *Ἀήλιον*, οἱ δὲ *Ἀσκραῖον*, ἄλλοι δὲ *Ἄκτιον*, *Λακεδαιμόνιοι* δὲ *Ἀμυκλαῖον*, *Ἀθηναῖοι* *πατρῴον*, *Βραγχιδότην* *Μιλήσιοι* *). Quem usum a Sapphone quoque non alienum fuisse apud eundem rhetorem legimus **): *Μέτρον μέντοι τῶν κλητικῶν ὕμνων ἐν μὲν ποιήσῃ ἐπιμηκέστερον. ἅμα μὲν γὰρ πολλῶν τόπων ἐκείνοις ἐξεστὶν ὡς παρὰ τῇ Σαπφοῖ καὶ τῷ Ἀλκυᾶνι πολλαχοῦ εὐρίσχομεν. τὴν μὲν γὰρ Ἄρτεμιν ἐκ μυρίων ὀρέων, μυρίων δὲ πόλεων, ἔτι δὲ ποταμῶν ἀνακαλεῖ, τὴν δὲ Ἀφροδίτην *Κύπρου*, *Κνίδου*, *Συρίας*, πολλαχόθεν ἀλλαχόθεν ἀνακαλεῖ. Fieri potuit, ut Ovidio quoque Sapphus invocatorium carmen quoddam obversaretur, cum v. 57 scriberet:*

„Tu quoque, quae montes celebras, Erycina, Sicanos“.

Cum igitur, ut vidimus, narratio de poetriae in Siciliam fuga ad alia eiusmodi veterum commenta referri posse videatur, Phaonem ipsum in Siciliam profugisse, quod nobis Sapphus epistula testatur, non est negandum. Iam quaeritur, quatenus causa eum ad fugiendum permoverit? Ex epistulae v. 145 cognoscimus silvam quae amantibus refugium praebere solebat, Phaonis fuisse; ex quo concludere licet eum unum ex divitibus Mitylenensibus civibus fuisse. Intestinorum autem bellorum tempore, quibus iam tum Lesbias urbes laborasse ex Alcaei vita cognitum habemus, rerum statu repente mutato fieri potuit, ut Phaon propter imminens

*) Vide Spengel. Rhett. graec. T. III p. 445.

**) Ibid. p. 334.

sibi periculum fuga salutem quaesierit; quod urgente tempore tam rapide fecit, ut Sapphoni ne vale quidem dicere potuerit (cf. vv. 99 sq., 109). Itaque quod recentiores de Sapphus fugae causa suspicati sunt, id potius in Phaonem quadrare videtur *).

Nunc videndum est, quomodo ii, qui Phaonem nullum fuisse statuunt, illam de Sapphus erga Phaonem amore fabulam interpretentur. Qui cum fere omnes a Kockio pendeant, nos quoque ab eius sententia proficiscemur. Cui a nomine ipso exorso $\Phi\acute{\alpha}\omega\nu$ a radice $\varphi\alpha$ lumen significante derivatum idem significare videtur atque $\Phi\alpha\acute{\epsilon}\theta\omega\nu$ **); quae explicatio ansam ei praebet ad illam fabulam interpretandam. Constat enim Phaethontis nomen non solum Solis Clymenaeque filio illi imperito Solis equorum aurigae fuisse, sed etiam interdum ipsum solem eo nomine designari ***). Itaque Kock pro illo nomine hoc substituto Phaonem Solem intellegendum esse statuit, ad cuius cotidianum cursum narratione de Phaone naviculario alludatur. Sapphus autem nomen a $\sigma\alpha\varphi\eta\varsigma$ adiectivo derivatum lunam significare ei videtur, quae solis (h. e. Phaonis) splendorem admirata amoreque erga eum capta fugientem ab oriente occidentem versus persequatur usque adeo, donec spe frustrata de Leucadiae monte in fluctus delapsa (h. e. occidens) insani amoris flammam restinguat.

*) Fieri potuit, ut Phaon seditionibus in Lesbo insula sedatis post longum temporis spatium in patriam reversus Sapphonem in matrimonium ducere voluerit: at illa, iam aetate provector, nuptias recusans solam eius amicitiam petivit eo carmine, e quo frag. 75 depromptum est:

$\text{'\text{Α}\lambda\lambda\text{'}} \text{'\text{Ε}\omega\nu \varphi\acute{\iota}\lambda\omicron\varsigma \acute{\alpha}\mu\mu\iota . .$

$\text{\text{λ}\acute{\epsilon}\chi\omicron\varsigma \acute{\alpha}\rho\nu\nu\sigma\omicron \nu\epsilon\acute{\omega}\tau\epsilon\rho\omicron\nu$

$\text{\text{o}\text{ι} \gamma\acute{\alpha}\rho \tau\lambda\acute{\alpha}\sigma\omicron\mu\text{'}} \text{'\text{Ε}\gamma\omega \xi\nu\nu\acute{\omicron}\lambda\eta\nu$

$\text{\text{ν}\acute{\epsilon}\varphi \gamma\text{'}} \text{'\text{Ε}\sigma\sigma\alpha \gamma\epsilon\rho\alpha\iota\tau\acute{\epsilon}\rho\alpha.$

**) Utrumque nomen idem significare iam C. O. Müller l. l. p. 292 censuit, Adonidem intellegens.

***) Cf. Verg. Aen. V, 105.

Quae cuncta cum sagacius quam verius a Kockio excogitata esse nemo non videat, nos aliam eamque simpliciore utriusque nominis proprii explicandi rationem atque viam ingrediemur. Fieri omnino potuit, ut *Φάων* non genuinum, sed tantum a Sapphone illi pulchro superboque iuveni inditum cognomen esset, in quo pavonis notionem inesse hac ratiocinatione verisimile esse monstrabo. Tryphone grammatico teste apud Graecos pavonis nomen *ταῶς* vel *ταῶν* fuit *); quam vocem onomatopoeicam a cantu illi avi inditam esse haud est quod infitieris **). Apud Aeolenses vero, quos et *βαρυντικόν* fuisse et *ψίλωσιν* illam quae dicitur admisisse constat, secundum dialecti leges ex *ταῶν* factum est *τάων*. At in ceteris linguis graecae cognatis prima eius avis nominis littera non dentalis, sed labialis est, ut pavo, pav, pfau ***). Quam litteram Aeolenses quoque ita adamasse, ut eam nonnunquam pro dentali in ceteris Graeciae dialectis exstante posuerint, testantur nomina ut *πέσσυρες*, *πήλυι*, *σπόλα*, *πέμπε*, v. Meister. DgD. p. 114 sq. Quibus comparatis **πάων* quoque admitti potest et tenui *π* per illam Graecorum 'vulgarem aspirationem' in *φ* mutata, cuius exempla sunt *Φερσεφόνη*, *Φίπτακος* (cf. Meister. ibid. p. 120), id quod quaerimus nomen obtinemus****). Ab amantibus vero haud

*) V. Athen. IX, 397 E: *ταῶς δὲ λέγουσιν Ἀθηναῖοι, ὥς φησι Τρύφων, τὴν τελευταίαν συλλαβὴν περισπῶντες καὶ δασύνοντες... λέγουσι δὲ καὶ τὴν δοτικὴν ταῶν.*

**) Perversam eius vocabuli derivationem apud Athen. l. l. legimus: *ὀνόμασται δὲ ταῶς ἀπὸ τ᾽ ἄσεως τῶν πτερῶν.*

***). Cf. Curt. Grundzüge p. 495 et Miklosich. Etymol. Wörterbuch der slav. Spr. s. v. pavu. Idem testatur apud recentiores quoque Graecos pavoni nomen esse *πάβονι*, *πάγονι*.

****) Hehn (Kulturpflanzen u. Haustiere p. 292) pavonem ex Italia, non e Graecia vel Oriente in Europam advectum esse inde sequi statuit, quod in omnibus Europae linguis pavonis nomen a latino *p*, non a Graeco *τ*

raro ὑποκοριστικῶς animalium nomina amatis indita esse multa exempla testantur, ut Αἴκος, puer ab Alcaeo amatus, vel Φρύνη, quod bufonem, vel Λεόντιον *), quod leonis catulum significat **). Itaque Sappho quoque amatum a se iuvenem propter eius pulchritudinem ***) superbi-
amque pavonem appellasse videtur, quod nomen Graeci tamquam appellativum de eius modi hominibus teste Suida ****) usurpabant. Quae si recte disputavimus, fundamento, in quo Kockianae argumentationis cardo vertitur, subtracto ipsa eius ratiocinatio concidat necesse est.

Quaeritur autem, num iam Sapphus temporibus illa 'rara avis' Graecis nota fuerit. Quod quamquam certis veterum testimoniis stabiliri non potest, tamen a verisimilitudinis spe-

incipiat. Quam ratiocinationem missam facias necesse erit, si reputaveris in Aeolica dialecto graecam dentalem haud raro labiali commutari. Itaque hic quoque inter Aeolicam dialectum et linguam latinam, quam veterum quidam tamquam filiam Aeolicae dialecti esse suspicabantur, similitudo quaedam intercedere videtur. Eiusmodi vero consonantium mutationem nonnunquam reperiri docent e. g. verba: populus, pappel, monopoly.

*) Hoc nomen Epicuri amatae fuisse testatur Cic. de nat. deor. I, 33, 93, Hermesianactis Athen. XIII, 597 A, alii.

**) Cf. Aristophan. Plut. v. 1011, ubi vetula ab amasio se anaticulam et columbulam appellatam esse narrat:

νητάριον ἂν καὶ φάτιον ὑπεκορίζετο.

***) Pavonem antiqui pulcherrimum esse omnium avium persuasum habebant, quod Varro de re rust. III, 6, 2 his verbis testatur: Huic enim natura formae e volucribus dedit palmam (cf. Hehn. l. I. p. 286).

****) S. v. Φάων· φασὶν ἐπὶ τῶν ἐρασμίων καὶ ὑπερηφάνων. Sapphus Phaon etiam a Menandro (v. Strabon. X, 452) ὑπερκομπος appellatus est.—Ceterum Phaonis nomen apud Graecos non inusitatum fuisse Aeolensium inscriptiones perscrutantes discere possumus; quas si Kock adiisset, illud nomen non mythicum, sed verum esse facile videre potuit. Ita e. g. primum in vico Xeronomi qui vocatur in Boeotia haud procul a Thespiis sito Stamatakis columnam invenit, ubi inter cetera aeolica nomina Φάων quoque legitur; v. Collitz. Sammlung der griech. Dialekt-inschriften T. I p. 401 n. 791d; porro ibidem n. 791e Καλλιφάων exstat, quod idem atque καλὸς Φάων valere videtur. Apud Romanos quoque Pavonis et Pavi nomen reperimus, ut apud Varronem (de re rust. III, 2, 2: Fircellius Pavo) et apud Lucilium (Sat. XIV: Publiu' Pavo' Tuditanus). Cf. Hehn. l. I. p. 291.

cie quadam non abhorre videtur. Iis enim, quae Hehn in illo praestantissimo libro, qui „Kulturpflanzen und Hausthiere“ inscriptus est, de pavone quam sollertissime collegit *), docemur Salomoni, Iudaeorum regi, inter ceteras Ophirias merces pavonem quoque nave advectum esse, plurimum autem Phoenices ad notitiam illius avis ex India apportatae divulgandam contulisse. Cum vero Lesbus antiquioribus temporibus ab ipsis Phoenicibus possessa fuerit, quod iam ex Homero colligi potest **), et postea quoque Mitylenaeorum portus inter celeberrimos numerati sint, Sapphonem non solum fando audivisse de pavone, sed ipsum oculis intuitam et admiratam esse facile concedes ***).

Ut igitur Phaonis nomen e cotidiano usu simplicius veriusque quam ex mythologia duci potest, ita ad poetriae quoque nomen explicandum eadem ratione mihi progrediendum esse videtur. Omnes autem, qui hanc quaestionem attigerunt, Σαπφὸς nomen a Σαφρῖς adiectivo ductum esse recte monuerunt, quae derivatio iam in Etymologico Magno s. h. v. exstat. At quaeritur, quatenus vis ei verbo attribuenda sit. Kock l. l. p. 85 sqq. statuit in eo nomine claritudinis vel

*) V. pp. 286—294.

**) Cf. Iliad. XXIV, 544: Λέσβος, Μάκαρος ἔδος. Nomen proprium Μάκαρ idem esse atque Melkart Peppmüller his verbis docuit: „Dieser Makar ist mit dem phöniciſchen Melkart, welchen die Griechen mit ihrem Herakles identificierten, dieselbe Person und als Sohn des Helios wie dieser ein Sonnengott“. V. eius Commentarium ad Il. XXIV, p. 260.

***) Non me fugit Hehnum l. l. p. 288 dubitare, num iam Polycrate tyranno in illo Samiorum Ἡράτω, quod antiquitus pavonibus Iunoni sacris celebre erat, pavones fuerint; cuius dubitationis eam causam affert, quod neque Ibycus neque Anacreon Iunoniae avis mentionem fecerit. Quod tamen pro certo affirmare equidem non ausim, cum utriusque poetae paucissima fragmenta ad nos pervenerint, Athenaeus vero pavonem in illis carminibus non memoratum non laudare aut memoratum omittere potuerit. Si denique (id quod certum est) quinto ante Christum n. saeculo illa avis Athenis cognita fuit, non est, cur sexto saeculo Lesbiis notam fuisse negemus. Ceterum ipse auctor p. 494 annot. 75 Polycratis temporibus pavonem Sami iam fuisse concedere videtur.

splendoris notionem inesse; quae explicatio ei transitum prae-
bet, ut iam monuimus, ad illud commentum, quo per Sapphus
nomen genuine lunam designari, postea vero idem ad poetriam
translatum esse persuadere conatur. Quae opinio cum nullis
veterum testimoniis innitatur, cum aliis eius hominis docti
ingeniosis lusibus reicienda est. Multo magis sobria G. Curtii
sententia est, qui l. l. p. 699 id nomen idem quod σοφή
significare censet *). Cui etiamsi concedendum est σαφής et
σοφός adiectiva ab eadem radice ΣΑΠ derivata esse, tamen
alterum pro altero ita usurpari posse, ut Σαπφώ pro Σοπφώ
dictum sit, non est verisimile **). Porro doctae epitheton
non ad Sapphonem, sed ad Alexandrinarum vel Romanarum
poetiarum quandam, e. g. Balbillam, magis quadraret, ut Ho-
ratus Carm. I, 1, 29 de 'hederis, doctarum frontium prae-
miis' loquitur ***). Quibus haud ex omnibus partibus probatis
sententiis quominus meam Sapphus nominis explicationem
opponam, nihil obstat: mihi enim eo nomine ad vocis vel
cantus poetriae claritatem alludi videtur ita ut Σαπφώ
sonora vel clara voce praeditam significet; quod ad poetriam
odas suas canentem ****) optime quadrare videtur. Quam
vim in eo vocabulo statui posse docet imprimis Pindarus, qui ad

*) Cf. eius haec verba: Es ist mir wahrscheinlich, dass dieser Name
(Σαπφώ) soviel wie σοφή, docta puella, bedeutet, also zu σαφής, σοφός
gehört.

**) A σοφός adiectivo Aeolicum nomen proprium feminini generis
Σύφω expectandum erat, comparato Hom. Il. VI, v. 153: Σίσυφος
Αιολίδης.

***) Si ea nominis poetriae derivatio, quam Curtius proposuit, vera esset,
Σοφώ significare possit musicae et poesis peritam, ut Pind.
Pyth. IV, 295 Cyrenaei cives propter musicae et poesis peritiam σοφοί
dicuntur.

****) Cf. frag. 11:

Τάδε νῦν ἑταίραις
ταῖς ἔμειν τέρπνα κάλως δέλω.

vocis claritatem designandam φασενός adiectivum adhibuit; v. Pyth. IV, v. 283:

ὀρφανίζει μὲν κακὰν γλῶσσαν φασεννᾶς ὀπός.

De quo poetarum usu Buchholz (Anthol. II, ed. 3 p. 216) haec monet: „Die auf Licht, Ton und Farbe bezüglichen Ausdrücke werden oft vertauscht“. Ähnl. φωνή λαμπρά (vox clara), φωνή ἀλαμπής, μέλαινα und λευκή u. a. Porro apud Platonem quoque Legg. p. 812 D σαφήνεια τῶν χορδῶν claritatem chordarum, h. e. claros earum sonos designat. Eandem significationem habent adiectiva λιγύς, λιγυρός, λιγύφθογγος *). Simili modo iam apud Homerum (Il. V, 785 sq.) Stentori, magna voce praedito, a στένειν verbo nomen inditum est:

Στέντορι . . . χαλκεοφώνῳ,

ὅς τόσον ἀνδήσασχ', ὅσον ἄλλοι πεντήκοντα.

Cf. Curt. I. I. p. 213. Ita Ibyco quoque poetae a voce nomen inditum esse videtur, quod, ut ἰβυξ avis nomen, cum ἰνίζειν verbo cohaeret; cf. Curt. I. I. p. 585; Sittl., I. I. I p. 312. Porro Demosthenici quoque cognominis Βάτταλος ea explicatio plurimum arridet, qua id cognomen cum βάττος, βαττοίζειν, quod balbutire significat, componitur; cf. A. Schäferi „Demosthenes u. s. Zeit“ ed. 2, I p. 340. Fortasse Corinnae quoque Μυίας cognomen a susurrante voce inditum est, quod Statii Silv. V, 3, 158 verba (tenuis arcana Corinnae) confirmare videntur.

Quae Sapphus nominis origo cum iam hoc modo optime explicari possit, tamen aliud depromere non supervacaneum

*) Ita Corin. fr. 21: λιγουράν Μουρτίδα legimus et in epigrammate, Pindari vitae inserto, Protomache et Eumetis poetae filiae λιγύφωνοι appellantur; v. Westermann. Vitt. Script. 98. Ipsa denique Sappho a Christodoro epigrammatum poeta λιγύθροος appellata est, v. Anthol. Pal. T. I. p. 25 v. 69 (ed. Dübner).

esse arbitramur, quo nostram coniecturam undique confirmatam eoque fide digniorem reddamus. Constat enim poetriam non solum verborum, sed etiam harmoniae novatricem fuisse, et mixolydium quod dicitur (τὸ μιξολυδιστὶ) harmoniae genus invenisse, quod Aristoxenus ille musicus scriptor apud Plutarchum de mus. c. 16 testatur *). Quam harmoniam quamquam idem scriptor ibidem. c. 15 a Pythoclide inventam esse statuisset videbatur, tamen Westphalii docta diquisitione **) Sapphonem illa laude non privandam esse edocti sumus. Mixolydiae autem harmoniae proprium πάθος fuit, ut e verbis infra allatis, quibus alia veterum testimonia addi possunt ***), satis superque cognitum habemus. Cum vero ad affectus concitados turbidosque exprimendos non sedata gravi-que, sed acuta et clara voce uti soleamus, poetriae ita, i. e. σαφῶς, canenti Σαπφoῦς nomen inditum est****). Quocum commodè conferri potest Stesichorum quoque a χόρους ἰστά-ναι nomen accepisse.

Quibus Sapphus nominis ea vis atque significatio, quam nos statuimus, nonnihil defendi potest.

*) Ἀριστόξενος δέφει Σαπφὴν πρῶτην εὔρασθαι τὴν μιξολυδιστὶ, παρ' ἧς τοὺς τραγθοποιούς μαθεῖν λαβόντας γοῦν αὐτοὺς συζεύξαι τῇ θωριστὶ ἐπεὶ ἡ μὲν τὸ μεγαλοπρεπὲς καὶ ἀξιωματικόν, ἡ δὲ τὸ παθητικόν μέμικται δὲ διὰ τούτων τραγῳδία.

**) V. eius «Die Musik des griech. Alterthums» pp. 152, 175.

***) Ita iam Plato de republ. III p. 398 D: *Τίνας οὖν, inquit, θορηνώ-δεις ἀρμονίας; Μιξολυδιστὶ.* Et Aristoteles Polit. V, 5 (p. 1340 a): *ἀκούοντας διατρίβειν... πρὸς μὲν ἑνίας (ἀρμονίας) ὀδυρτικῶτέ-ρως καὶ συνεστηκότως μᾶλλον, οἷον πρὸς τὴν μιξολυ-διστὶ καλουμένην.* Itaque Horatius optime de Sapphone dicere potuit (Carm. II, 13, 14):

Querentem Sappho puellis de popularibus.

****) Itaque recte Chappell Anglosaxus a Whartonio l. c. p. 43 laudatus haec: «She, inquit, sang softly and plaintively and at a higher pitch than any of her predecessors».

Cum igitur Phaonem revera exstitisse non ita absurdum sit, ut recentioribus videtur, explicandae illius S a n m a r t i n e n s i s v a s c u l i p i c t u r a e simplicissimam viam, quam Panofka iniit, optimam esse concedendum erit *). Quid enim mirum, si Sappho, quam ab antiquis, ut ab Hermesianacte **), Lesbiam l u s c i n i a m appellatam esse constat, in illa amphora aureae P h i l o m e l a e nomine poetice designatur? Phaonis vero epitheton constans quod dicitur καλός fuisse iam pp. 37, 75 docuimus; locis ibi enumeratis adde Nymphidem apud Athenaeum XIII p. 596 E: καὶ ἡ ἐξ Ἑρέσου δὲ τῆς ἐτέρας ὁμώνυμος Σαπφῶ τοῦ καλοῦ Φάωνος ἐρασθεῖσα περιβόητος ἦν, ὥς φησι Νύμφις ἐν περιπλῶ Ἀσίας. Bacchium vero illud ἡθός, quod ea pictura exprimitur, ad Sapphus erga Phaonem amoris ardorem declarandum optime quadrare nemo non videt.

Praeter Phaonem C e r c o l a m quoque, quem Sapphus maritum fuisse Suidas l. l. tradit ***) et cuius nomen in Marmore Pario cum Baumgartenio supra p. 70 reposuimus, nullum fuisse, sed tantum a comoediarum auctoribus fictum esse in vulgus creditur; putant enim id nomen a κέρκος voce originem ducere, quae, ut latinum cauda, partem virilem significare potest ****); itaque iam ipsum nomen obscenum atque indecentissimum comoediam suum fontem fuisse mani-

*) In altera huius vasculi parte duae imagines depictae sunt, quarum alteri ascriptum est: ΦΛΩΝ ΚΑΛΟΣ, alteri autem: ΧΡΥΣΗ ΦΙΛΟΜΗΛΑ. In interpretandis his figuris homines docti ea ratione, quae simplicissima erat, reiecta valde laborant. Vide Schoen. l. l. p. 761.

**) Cf. Hermesian. frag. 3 v. 49 (apud Hartung. p. 126):

δ δ' αἰδοῦς ἀνδρὶ οὐκ ἠράσαθ' ὕμνων.

***), Ἐγαμήθη δὲ ἀνδρὶ Κερκύλᾳ πλουσιωτάτῳ, ὁρμωμένῳ ἀπὸ Ἀνδρου.— Quod ad varietatem scriptionis eius nominis attinet,—invenitur enim et Κερκύλας et Κερκόλας—, in priore scriptione Aeolismum statuendum esse censeo, cuius plurima exempla vide apud Meister. l. l. p. 52 sqq.

****) Cf. Aristoph. Thesmoph. v. 239 et Horat. Sat. I, 2, 45.

festo prodere. Nos autem alio eoque verisimili modo illud nomen interpretati nullam obscenitatem in eo inesse docebimus. Nam vox *Κερκόλας* ex duabus partibus, *κερκο* et *λας* composita esse videtur, quarum prior ab onomatopoeico verbo *κρέκειν*, quod fidibus canere significat, derivari potest *), ita ut per metathesin ex *κερκο* factum sit *κερκο*. Exemplum vero eiusdem vocalis litterae transpositae in eodem verbo obviae Zonaras p. 1190 servavit, cuius verba sunt: *κερκόλυρα, οὕτως ὁ Ἀλκμάν ἐχρήσατο ἀντὶ τοῦ κερκόλυρα· τὸ δὲ κερκόλυρα ἡχητικὴ λύρα· τὸ γὰρ κρέκε, κρέκε ἡχὸς ἐστὶ τῆς κιθάρας **).* Posterior autem eius nominis proprii pars *λας* idem valet atque *λαός*, ut in nominibus propriis *Μενέλας*, e. g. apud Pindarum: *ξανθῶ Μενέλα δάμαρτα κομίσαι* (Nem. VII, 28), *Τιμόλας* (Dem. de cor. § 295, quae lectio codd. S et L est), alia. Itaque genuinam eius nominis proprii formam *Κρεκόλαος* vel *Κρεκόλας* fuisse statuimus ***), quod nihil aliud significat nissi *τὸν κρέκοντα τῶ λαῶ*, cytharistam. Quod vero ad significationem eius nominis attinet, optime *Τερπανδρί* nomen, a *τέρπειν ἄνδρας* ductum, huc facere videtur. Itaque hoc modo illo nomine proprio explicato non erit, cur de ipsa persona dubitemus. Quodsi Sapphoni a clara voce, Cercolae marito a psallendo, Cleidi denique filiae a canendo nomen inditum est, quod Bergk l. l. p. 117 statuit, tota Sapphus

*) Similia onomatopoeica verba in aliis quoque linguis reperiuntur, ut in rossica *кряк*; cf. Curt. Grundzüge, p. 534. Quod ad metathesin e vocalis attinet, Hesychianum quoque *κερκός· κρέξ* huc referri potest.

**) Cf. Alemanis frag. 142 (apud Bergkium).

***) Eodem modo Misgolae nominis, (de quo vide infra), variae scripturae exstant, ut *Μισγόλας* (apud comicos et Aeschinem oratorem), *Μισγόλαος* (apud Suidam s. v.), *Μισγέλαος* (apud Libanium pro Saltat. p. 500 D); cf. Meinek. l. l. vol. I p. 386 sq.; item *Νικόλεως*, *Νικόλας*, alia; cf. Fick. die griech. Personennamen, pp. 123, 87, 85, 50, passim.

domus a poetria frag. 136 *μ ο υ σ ο π ό λ ω ν οἰκία* optimo iure appellari potuit.

Ceterum Cercolae nomen ne semel quidem in comoedi-
arum, quae ad Sapphonem pertinent, fragmentis invenitur;
at uno loco mea quidem sententia comicus poeta ad id allu-
dere videtur. In unico enim fragmento ex Timoclea Sapphone
ab Athenaeo VIII p. 339 A servato (v. Meinek. l. l. vol. III
p. 610) haec legimus:

*‘Ο Μισγόλας οὐ προσιέναι σοι φαίνεται
ἀνθοῦσι τοῖς νέοισιν ἡρεθισμένους.*

Quae verba ad Sapphonem dicta esse videntur, ut iam Mei-
neke l. l. recte intellexit. Attamen quaeritur, quid commercii
Misgolae Colyttensi cum Sapphone fuerit, quem Aeschinis
oratoris aequalem fuisse ex pluribus locis eiusdem contra
Timarchum orationis compertum habemus? *) Diphilus sane
Athenaeo teste (XIII p. 599 D, v. Meinek. l. l. vol. IV p.
409) in comoedia, quae Sapphus nomine inscripta erat, Ar-
chilochum Hipponactemque tamquam poetriae amatores indu-
xerat, quem anachronismum Athenienses facile ei condonave-
runt, cum in eius generis iocis calculorum chronologicorum
acribiam minime exigenter et uterque poeta cum temporibus
tum patria non tantum a Sapphone remotus esset, ut Mis-
golas. Constat autem comicos poetas nonnunquam pro veris
nominibus alia substituisse, quae similiter incipiebant vel
similiter desinebant, ut Aristophanes Ran. v. 429 pro *‘Ιππο-
βίχου* eadem vocis mensura servata *‘Ιπποβίνου* posuit **).

*) Cf. § 49: *τυγχάνει ἡλικιώτης ὧν ἐμός καὶ συνέφηβος*. De Misgola,
Timarchi amatore, agit Aeschin. ibid. §§ 41—53; eum praeter Timoclem ab
aliis quoque comicis perfricari solitum esse, ut ab Antiphane, docet Meinek.
l. l. vol. I p. 386; III, p. 13.

**) Alia eiusmodi Aristophanea exempla sunt: Nub. v. 710, ubi *κ ό ρ εις*
appellati sunt *Κορίνθιοι*:

δάκνουσέ μ' ἐξέρποντες οἱ Κορίνθιοι.

Porro Ran. v. 85 *μ α κ α ρ ες* dictum est pro: *Μ α κ εδόνες*.

Itaque hic quoque quendam Sapphonem hoc modo alloqui voluisse ponere potes: *Ὁ Κερκόλας οὐ προσιέναι σοι φαίνεται*, h. e. Cercolas tecum coire non videtur; attamen pro Cercolae coniugis voce comice *Μισγόλαν* posuit, quo facto comica vis duplicatur: primum enim eo nomine ad *μίσγεσθαι* verbum alluditur, quod iam inde ab Homero frequentissime de coitu usurpabatur; porro autem, quod gravius est, eo nomine adhibito comicus occasionem nactus est infamem illum Misgolam paederastam, aequalem suum, velli-candi additis verbis: *ἀνθοῦσι τοῖς νέοισιν ἡρεθισμένος*. Itaque ex hoc Timoclis fragmento concludi potest *Κερκόλας* nomen non a comicis fictum, sed verum Sapphus mariti fuisse*), neque antiquos eam significationem ei tribuisse, quam ex recentiorum sententiis in eo inesse in vulgus creditur**).

Iam igitur cum Sapphus mariti nominis interpretandi aliam rationem ostenderimus, qua comprobata recentiores homines doctos ipsis antiquis in obscenitatibus inveniendis palmam praeripuisse non immerito dixeris, restat, ut de *Cercolae patria* nostram sententiam proponamus, de qua Suidas l. l. haec memoriae tradidit: *ἐγαμήθη δὲ ἀνδρὶ Κερκύλῃ πλουσιωτάτῳ, ὁ ῥωμέων ἀπὸ Ἀνδρόν.*

*) Mure l. l. p. 592 ex Ovidiana epistula, ubi de poetriae matrimonio nihil dictum est, Sapphonem innuptam fuisse concludit. «It seems», inquit, «incredible, that a poet of Ovid's taste and discernment... should have omitted the part of her history best calculated to enhance the effect of his elegy, by pathetic apostrophes of the afflicted fair one, to her part days of peace in the enjoyment of an innocent love, or to her widowhood as the primary source of her present crime and sorrow». Quod tamen vix quisquam ei credet: nam si poetria amissum maritum tamquam causam sui in Phaonem amoris praetulisset, incaute, ne dicam stulte, causam egisset. Quamobrem longe optimum erat in illa epistula maritum silentio praetermittere, quod Ovidius fecit.

**) Si Cercolae nomen obscenum esset, tum in Cercidae quoque Megalopolitani iambographi nomine, de quo v. Flach. GdgL. p. 574, eadem obscenitas inesset: at nemini unquam in mentem venit, ut id nomen in dubium vocaret vel a comicis poetis fictum esse affirmaret.

Ultima verba homines litterati usque ad Welckeri tempora simplicissima atque optima ratione interpretabantur his verbis: Maritum habuit Cercolam, virum ditissimum, ex Andro, (insula maris Aegei, una Cycladum), oriundum *). Recentiores vero inde a Welckero usque ad Whartonium hoc quoque Cercolae patriae nomen a comicis fictum esse, quo ad eius virilitatem (*ἀνδρίαν*) alluderetur, sibi persuaserunt. Ita Neue, qui hoc modo argumentatur: „Neque enim—inquit—illa significare possunt, qui ex Andro immigravit; nec omnino veteres solebant nisi gravissimis de causis solum vertere; et inepte dicta essent, si hoc scriptor vellet, qui in insula Andro sede fortunarum statuta mercaturam factitabat, Andro quasi *ὀρυθη-ροίω* quodam utebatur: saltem necesse ita erat, ut Sappho patria excederet, qua de re nihil relatum reperimus. Immo velut praesentem ea ostendunt hominem cum maxime Andro advectum, planeque in eum conveniunt, quem inductum in scenam suspicamur. Huic potissimum ob virtutem propriam nupsit Sappho, nempe in comoedia“ **). In qua ratiocinatione unum errorem tamquam fontem atque originem aliorum errorum esse videmus: cui enim in mentem venisset, ut in illa simplicissima locutione *ὀρυμμένω ἀπὸ Ἀνδρου* obscenam illusionem latentem investigaret, nisi ipsum Cercolae nomen tam perverse acceptum explicatumque esset?

*) Vide J. Chr. Wolfii l. l. p. VII.—Locutio autem *ὀρυμμένω ἐκ τινος* oriendi vim habens legitur e. g. apud Platonem Legg. p. 682 B: *ποταμὸς ἀνωθεν ἐκ τῆς Ἰδῆς ὀρυμμένους*.

**) V. l. l. p. 3, coll. Wharton. l. l. p. 7: „The name (Penifer) and that of his country (Virilia) are conjectured to have been invented in ribaldry by the Comic poets“.

Attamen nihilominus unum quin recentioribus concedamus, facere non possumus. Sane haud verisimile est Sapphonem Aeolensem Lesbiam viro e Ionica insula procul a Lesbo sita oriundo in matrimonium datam esse. Quae recordatus aliam huius quaestionis solvendae viam ingressus sum; puto enim traditam nominis proprii scripturam in libris Suidae manuscriptis corruptam esse, quod imprimis in his nominibus saepissime factum esse nemo ignorat*). Itaque conicio pro *Ἀνδρῶν* voce substituendum esse *Ἀντάνδροῦ*. Cum enim in codice archetypo *ΑΝΑΝΤΑΝΔΡΟΥ* scriptum esset, facillime accidere potuit, ut scribae oculi *ANT* litteris omisis ad tertium *A* aberraverint, cuius erroris in libris mss. haud raro deprehensi exempla hoc loco recensere supersedebimus. Iam hac levi medela adhibita omnes difficultates tolluntur: Antandrus enim fuit Troadis urbs ad sinum Adramyttenum exadversum Mytilenas sita, quam urbem non solum Aeolicam fuisse**), sed ab ipsis Lesbiis conditam esse concludi potest ex iis, quae Strabo XIII, c. 616 de urbibus in ora maritima a Lecto promunturio usque ad Canas ***) sitis refert: *καὶ γὰρ ταῦτά ἐστιν Αἰολικὰ, σχεδὸν δὲ τι καὶ μητροπόλις ἡ Λέσβος ὑπάρχει τῶν Αἰολικῶν πόλεων*. Et iam antea c. 599: *τοῦτο δὲ (τὸ Σίγειον) κατέσχον μὲν Ἀθηναῖοι . . . Λεσβίων ἐπιδικαζομένων σχεδὸν τι*

) Cf. e. g. infra pp. 89, 98).

**) Minime me fugit Antandrum ab Alcaeo frag. 65 *Λελέων πόλιν* appellatam esse, ubi tamen poeta antiquos eius incolas respicere videtur: nam graecam fuisse vel a Graecis conditam esse iam graecum eius nomen testatur, cf. *Ἀντήνωρ* (Iliad. III, 262; ibid. 189: *Ἀμαζόνες ἀντιάνειραι* — De bello Mytilenaeorum cum Atheniensibus apud Sigeum, ubi Pittacus Phrynonem Atheniensium ducem certamine singulari interfecit, v. Strabon. XIII, c. 599 sq., Suid.: s. v. *Πιττακός*, Schöne l. l. p. 746 sqq. — Quodsi Troas antiquitus Aeolensium fuit, optimo iure Fick antiquissimas Odysseae et Iliadis partes in Aeolicam dialectum vertisse videtur.

***) Strabone teste (XIII, 615) Canarum vetus nomen *Αἶγά* exstabat apud Sapphonem, nisi verba *ὡς Σαπφῶ (φησιν)* ab aliena manu addita sunt; v. frag. 131.

τῆς συμπάσης Τρωάδος ὧν δὴ καὶ κτίσματά εἰσιν αἱ
πλεῖσται τῶν κατοικιῶν. Quamobrem si nobiscum locum
suspectum correxeris, non erit, cur poetriam homini e vicina
urbe, fortasse colonia Mytilenaeorum, oriundo nupsisse neges.

Ad nostrae coniecturae verisimilitudinem augendam hoc
quoque nonnihil facere videtur, quod vestigia quaedam re-
stant, e quibus ipsius poetriae genus non e Lesbo insula, sed
e Troade originem duxisse apparet; ita Columbanus Abbas
Sapphonem „Troiukenarum vatem“ appellavit *). Si igitur
verum est Sapphus avos olim in Troade degisse, quae opi-
nio Scamandronymi quoque Sapphus patris nomine a
Troadis fluvio ducto **) comprobatur, facile explicatur, quo-
modo evenierit, ut Antandro oriundus homo poetriam uxorem
duceret.

Quae cuncta si perpenderis, non erit, cur nobiscum to-
tam illam fabulam de Cercolae patriaeque eius nominum ori-
gine, quae a recentioribus excogitata et per longam hominum
doctorum seriem propagata est, tandem missam facere grave-
ris, cum hic quoque Suidam non ‘ex infimae aetatis scriptore,
omnia undique corridente’, sed ex optimae notae fonte sua
hausisse tibi persuadeas.

*) Vide apud J. Chr. Wolfium l. l. p. VII:

Sed tamen illa
Troiukenarum
Inclita Vates
Nomine Sappho
Versibus istis
Dulce solebat
Edere carmen.

Quibus addas Wharton. l. l. p. 7: „Some authorities... state that Sap-
pho's family belonged to an Aeolian colony in the Troad.“

**) Ab eodem fluvio Hectoris quoque filio nomen inditum esse testatur
Homerus Il. VI, v. 402:

Τόν ὃ' Ἐκτωρ καλέεσκε Σκαμάνδριον, αὐτὰρ οἱ ἄλλοι
Ἀστυάνακτα).

Itaque dubitandi causa de poetriae marito sublata ad aliam quaestionem accedamus, num Cleis poetriae filia ex illegitimo cum Phaone coniugio orta sit, quod Murio (History of Gr. lit. v. III, p. 278) visum est; recentiores vero et Sapphone Cercola marito privata et Murii opinione reiecta de Cleide filia merito haesitant, quid sint facturi: ita Sittl, ut supra p. 52**) vidimus, ne filia ab incerto patre procreata poetriae famam ignominia aspergeret, Cleidem non filiam, sed amicam poetriae fuisse coniecit. Murii sententiam falsam esse ex Ovidiana epistula aperte concludi potest: nam si poetria filiam ex Phaone conceptam habuisset, Ovidius eam ad Phaonem minime fecisset sic scribentem (v. 103):

Nil de te mecum est,
cum amoris pignus, quod semper intueretur et quo consolaretur, ei praesto esset. Utrum vero poetria eo tempore, quo Phaonis amore capta erat, divortio a marito separata, an vidua fuerit, an Cercolae vivo Phaonem praetulerit*), haec omnia quamquam vix certo dirimi poterunt, tamen quibusdam indiciis ansam praebentibus coniectura solvere tentabimus. Maximus Tyrius l. l. c. 9 (v. Sapph. frag. 136) Socratis morituri verba Xanthippae uxori luctum exprobrantis cum Sapphus verbis confert, quae simili modo filiam hortatur. *Μέμφεται*, inquit, *τῇ Φανθίππῃ ὀδυρομένη, ὅτι ἀπέθνησκεν ἡ δὲ τῇ θυγατρὶ· Οὐ γὰρ θέμις ἐν μουσολῶν οἰκίᾳ θοῆνον εἶναι, οὐκ ἄμμι πρόπει τὰδε*. Dolendum est, quod sophista non exposuit, cur filia lamentata esset; attamen si ex iis quae praecedunt concludere licet, mors carissimi cuiusdam lugendi causam praebuit. Quid est autem parvae filiolae carius quam parentes? Itaque sane fieri potuit, ut Cleis Cercolam patrem morte abreptum tam vehementer defleret. Cui minime adversatur Ovidianae epistulae v. 70:

Accumulat curas filia parva meas,

*) Cf. supra p. 70 M. P. locum a nobis restitutum.

unde filiam poetriae uni curae esse nec iam patrem in vivis versari conicere poteris. Itaque sane fieri potuit, ut Sappho vidua iam aetate proveciore amore in Phaonem inflammata sit.

Iam igitur his absolutis ad duas Sapphus amicas convertamur. V. 17 duae puellae nominantur, quarum nomina suspecta esse videntur:

Vilis Anactorie, vilis mihi candida Cydno.

Quod ad priorem attinet, quaestio paucis absolvi potest. Ἀνακτορίη enim antiquitus Miletus Ioniae urbs appellabatur, ut Plinius (hist. nat. V, 29, 112), Stephanus Byzantius (s. v. Μίλητος), alii testantur. Itaque Ἀνακτορίη idem valere potest atque Μιλησία significatque puellam Mileto oriundam, ut Ἀτθίδος nomine Attica virgo designatur *). A Suida vero l. l. inter poetriae discipulas Ἀναγόρα quoque Μιλησία numeratur, quam Ovidius hoc loco respexisse videtur; cum vero proprium puellae nomen dactylici hexametri legibus adaptari nequiret, poetae id nomen adhibendum fuit, quod dactylico numero optime responderet. Itaque puellae illi genuinum Anagorae nomen, quod Suidas servavit, fuisse videtur **).

Cum prioris puellae unus saltem auctor, Maximus Tyrius, mentionem fecerit ***), de Cydnone tota antiquitas quam pertinacissime tacet. Quid igitur? An Ovidium ipsum hoc nomen finxisse ponendum est? Minime. Immo vero id gravis-

*) Advenas haud raro ethnico nomine tamquam proprio appellatos esse docet Meister in Collitz. l. l. T. I, p. 401, ann. ad n. 791 d.

**) Itaque non audiendus est Flach, qui GdgL. p. 498 ann. 2 in Suidae verbis Ἀναγόραν in Ἀνακτορίαν mutari iubet. Quocum si facies, duo nomina adiectiva idem significantia (Ἀνακτορία, Μιλησία), nullum vero nomen proprium habebis; quod quam perversum sit, nemo non videt.

***) l. l. c. 9: ὅ-τι γὰρ ἐκείνῳ (sc. τῷ Σωκράτει) Ἀλκιβιάδης καὶ Χαρμίδης καὶ Φαῖδρος, τοῦτο τῇ Λεσβῇ Γύρυννα καὶ Ἀτθὶς καὶ Ἀνακτορία.

simo testimonio est Romanum poetam diligentissime Sapphus scrinia perscrutatum inde hoc quoque nomen deprompsisse. Quod ad ipsam vocem attinet, *Κυδνώ* a *κυδνώς* adiectivo derivatum est, quod idem significat atque celeber. Itaque de ipso nomine non esset, cur dubitares, nisi libri manuscripti hoc epistulae loco magnopere fluctuarent. Vriesio enim teste l. l. p. 22 optimi codices exhibent: *C y d r o*; in libris autem inferioris notae hae variae lectiones exstant: *Cidno*, *Clio*, *Cidnolle*, *Cidrio*, *Ca d r o*, *S y d r o*, *Cathno*, *Credo*; Bentleius vero nimis audacter coniecit: Vilis mihi crede Gyrinno. Attamen lectionem optimorum codicum unice veram esse et in deterioribus quoque libris eius vestigia exstare procul dubio demonstrari potest. Nam in Ald. Cornu Cop. 268 B mutilatum Aeolici poetae cuiusdam fragmentum exstat, quod Bergk Sapphoni probabiliter vindicavit (v. frag. 71):

*ἡρώων ἐξεδίδαξε γυάρων * τὴν ἀννοδρομόν.*

In voce, quam appictus asteriscus sequitur, haud dubie nomen proprium inest, quod iam Hartung vidit ita corrigens:

** Ἡρώων ἐξεδίδαξε Γυάρω τὴν παναύδρομον.*

Alii alias coniecturas proposuerunt, quas v. apud Bergk. l. l. *) Equidem vero eam vocem corruptam esse et in illa scriptura huius quam Ovidius commemorat *C y d r u s* nomen delitescere censeo. Quod litteris maiusculis exaratum apertius fiet:

ΓΥΑΡΩ

ΚΥΑΡΩ

Versus autem est neque asclepiadeus maior, quod Bergk et

*) Flach GdGL. p. 499 et Sittl l. l. p. 329 ann. 3 cum Bergkio ** Ἡρώων ἐν Γυάρων* legentes hanc vocem Herus patriam significare putant, cum verunt: *Hero von* vel *aus Gyaros*; attamen sane mirum esset puellam Gyaro insula oriundam, ubi Strabone teste (c. 485) pauperrimi piscatores incolebant, ad Sapphonem profectam esse, ut apud eam studiis humanioribus operam navaret,

Hartung statuunt, neque pentameter aeolicus, quod Ahrensis placuit, sed Sapphicus hoc modo procedens:

... *Ἡρώων ἐξεδίδαξε Κύδρω.*

Novissima autem eius fragmenti verba et ad corrigendum difficilia sunt neque ad nostram rem quidquam faciunt. Nomen vero ipsum *Κύδρω* ab adiectivo *κυδρός* derivatum cum Sapphus nomine comparari potest *).

Quae cum ita sint, et optimorum codicum scripturam in epistula restituendam et in Sapphus discipularum numerum Cydronem quoque referendam esse demonstrasse nobis videmur **).

Praeter ea, quae ad Sapphus familiam atque amicas accuratius designandas ab Ovidiana epistula profecti protulimus, etiam de uno carminum genere poetriae ascripto certius quoddam inde concludi potest. Suidas enim l. l. praeter carmina melica epigrammata quoque atque elegias poetriae assignat: *Ἐγραψε δὲ, inquit, καὶ ἐπιγράμματα καὶ ἐλεγεία καὶ ἰάμβους καὶ μονωδίας* ***). Sane tria epigrammata, quae in Anthologia Palatina Sapphus nomine appicto reperiuntur (VI, 269; VII, 489; ibid. 505; cf. apud Bergk. fragg. 118—120), Suidae verba confirmare possint: attamen iam dorica dialectus, qua Sapphonem minime usam esse verisimile est,

*) Cf. Hesych. 2 p. 368: *κυδρός· ἐνδοξός καὶ τὰ ὄμνια*, et Fick., qui l. l. p. 48 nomina propria collegit, quae huc spectant, ut *Κυδραγόρα*, *Κύδρος*, alia.

**) Itaque respuenda est Bentlei illa coniectura, quam Vries quoque l. l. p. 44 probavit; Ehwaldium vero optimos codices iure secutum esse video.

***) Totum illud colon ex posteriore quodam fonte additum esse iam ex ordine narrationis turbato concludi potest: primum enim in hac vitae parte de carminibus melicis dictum est: *Ἐγραψε δὲ μελῶν λυρικῶν βιβλία θ'*; tum iis quae sequuntur de plectro a Sapphone invento refertur; quo facto Suidas verbis supra allatis iterum ad poesin eius revertitur. Novissima verba ad subditiua carmina referri videntur, quae sub Sapphus nomine circumferbantur, nisi Suidam auctoribus confusis errorem commisisse verisimilius statueris.

primo aspectu illa epigrammata suspecta reddit. Bergk ad frag. 120 tantum hoc epigramma tamquam novicium a poetria abiudicat: nos vero Ovidiana epistula innisi cetera quoque spuria esse censemus: in illa enim Sapphus carminum editione, qua Ovidius utebatur, metrum elegiacum vix exstittisse ex epist. v. 5 sq. concludi potest, ubi legimus:

Forsitan et, quare mea sint alterna, requiris,

Carmina, cum lyricis sim magis apta modis?

Ex verbis enim 'sum magis apta lyricis modis' ex Ovidii sententia sequi videtur Sapphonem elegiaco numero, qui illis alternis carminibus designatur, minus aptam fuisse itaque eum in scribendis carminibus non adhibuisse; quod Ovidius non inventis in eius libris carminibus elegiaco numero conscriptis illo disticho indicavit *).

Iam restat ut colligamus, quae a nobis enucleata a recentiorum Sapphus vitae descriptionibus differant, quo facilius synopsi proposita intellegi possit, quid emolumenti e nostra lucubratione ad poetriae notitiam corrigendam vel complendam redundare statuamus **).

Primum igitur, ut a Sapphus familia exordiamur, poetriae Cercolam maritum reddidimus, cui tantum in Atticorum comœdiis locum fuisse in vulgus creditur, patriamque eius non Andrum insulam, sed Antandrum urbem fuisse docuimus.

*) Ceterum iam apud Neuium l. l. p. 10 haec legimus: Addunt Suidas et Eudocia *ἐπιγράμματα καὶ ἐλεγεία*. Epigrammata quaedam supersunt, sed fidei dubiae. Cf. Sittl. l. l. p. 329, qui haec quattuor carminum genera a Sapphone abiudicare non gravatus est; alii vero, ut Flach l. l. p. 511 sq. et nuperrime Guil. Christ in Iw. Mülleri Handbuch der klass. Altertumswissenschaft T. VII p. 113 contrariam sententiam sequuntur.

**) Ad quaestionem Sapphicam accuratius cognoscendam haud spernendum adminiculum Carolus Riedel suppeditavit in commentatione, quae inscripta est: Der gegenwärtige Stand der Sapphografie. (Iglaviae, a. 1881).

Quibus demonstratis Cleidi quoque, Sapphus filiolar, patrem reduximus, ne immerito adulterino sanguine nata diceretur. Porro autem poetriam viduatam Phaonis, fronte et vultu bel-
lissimi Mytilenaeorum optimatis, amore captam esse vidimus; qui cum intestinis bellis in Lesbo insula flagrantibus in Sici-
liam fugisset, poetriam in carminibus quidem sese eum secu-
turam esse cecinisse, ipsam vero nunquam in Sicilia exsulasse
ostendimus. Itaque eodem modo, quo iam ante nos homines
docti divulgatissimam de Sapphus Leucadio saltu famam in-
terpretati sunt, nos quoque illam alteram de poetriae exsilio
fabulam explicabamus. Quod autem ad Sapphus amicas atti-
net, Anactoriam et Anagoram eandem atque unam esse de-
monstravimus numerumque earum Cydrus nomine e corrup-
tis scripturis eruto auximus. Iam sub finem commentationis
Sapphonem nunquam epigrammata scripsisse non primi anim-
advertimus.

En tibi fructum laboris a nobis pro viribus suscepti;
quem etsi non largum esse statueris, tamen nullum dicere
non audebis. Unum autem est, quod maxime timeamus, ne
quis propterea a nostris avertatur, quod non novas quasdam
opiniones de Sapphus vita sagaciter excogitatas proposueri-
mus, sed plerumque tradita sustentare atque tueri studueri-
mus, quod fortasse nonnemo regressum, non progressum dixe-
rit. Quod imprimis in ea cadit, quae Suidas de Sapphus fa-
milia memoriae prodidit; quae omnia ex optimae notae fonte
a Suida vel potius Hesychio hausta esse contra recentiorum
commenta plerisque applaudentibus prolata optime defendi posse
ostendimus. Itaque hic quoque novum argumentum protulimus
contra eos, qui omnia, quae apud posterioris aetatis scripto-
res reperiuntur, suspecta fictaque esse persuasum habent *).

*) Subscribo sententiam anonymi iudicis Sittliani libri in Neue philol.
Bundschau n. 16 (a. 1886), p. 244 his verbis expressam: «Unkritisch und un-

Porro ne id quidem nos fugit non omnia, quae investigavimus, ad amussim esse elaborata; quod in tam lubrica materia vix aliter fieri potest. Attamen nihilominus nos propius ad verum accessisse omnes concessuros speramus, quorum mentes praeiudicatis opinionibus non imbutae sunt. Imprimis autem nostram commentationem eo quam maxime commendari opinamur, quod si nobiscum facies, multas difficultates, quibus recentiorum de Sapphus vita narrationes laborare solent, facile te evitare posse persuasum habemus. Nam hominum litteratorum opiniones in singulis ita comparatae sunt, ut non solum inter se discrepent, sed etiam nonnunquam idem homo doctus fere eodem tempore duas sibi contrarias opiniones proferre non vereatur; ut Flach, qui, ut supra p. 66*) vidimus, ad Chron. Par. v. 51 Phaoni 'ullum apud antiquiores locum fuisse' negans libri de Graecorum poesi lyrica eodem anno (1884) editi p. 491 ann. 1 haec censet: „So ist kein Zweifel, dass der Name Phaon in den Gedichten gelesen wurde. Zu sicher sagt also Lehrs: „In den Liedern der Sappho scheint Phaon gar nicht vorgekommen zu sein“. Derselbe Vorwurf trifft O. Müller“. Quin etiam ubi diserte scriptum legitur $\Phi\Lambda\Omega N$ $K\Lambda\Lambda O\Sigma$, non Phaonem, sed Dionysum, ut Stephani *), vel Pana, ut Welcker **), intellegi iubent. Credat Iudaeus Apella!

methodisch ist es, eine Nachricht schon deshalb für falsch zu halten, weil sie Diogenes, Suidas u. a. m. überliefern, oder eben gerade deshalb für wahr, weil sie bei Platon, Aristoteles u. a. m. steht. Auch Platon und Aristoteles können irren, ebenso wie die Späteren gute Quellen benutzt haben können. Ich glaube daher, dass keiner Überlieferung die Glaubwürdigkeit abgesprochen werden darf, mag sie stammen, von wem sie will, wenn man nicht beweisen kann, dass dieselbe nach der ganzen Lage der Dinge unmöglich ist.

*) Vide eius Parerga archaeologica in Bulletin historico-philol. de l'acad. de St. Pétersbourg, XII, 268 sq., ann. 39.

**) Cf. Götterlehre I, p. 453 sqq.


At nostrae explicationes quo sunt simpliciores, eo minus a veritate abhorrrere videntur. Itaque hac quoque, quantulacunque est, disquisitione illi duo aurei versus Euripidei (Phoen. 469 sq.) probantur:

Ἀπλοῦς ὁ μῦθος τῆς ἀληθείας ἔφν,
κοῦ ποικίλων δεῖ τᾶνδιχ' ἐρμηνευμάτων.


COROLLARIUM
CRITICUM ATQUE EXEGETICUM
AD
OVIDIANAM SAPPHUS EPISTULAM.



Σύν τε δὺ' ἐρχομένω, καὶ τε πρό θ' τοῦ ἐνόησεν.
Hom. Il. X, 224.



Cum Ovidiana Sapphus epistula tamquam veteretum quodam inde a Naugerio Egnatio Ciofano Heinsio per longum spatium requiescens nuperrime demum ab hominibus doctis renovari coepta sit, minime mirum est, si usque ad hunc diem nonnullos locos exhibeat, qui arte critica adhibita emendari aut accuratius explicando defendi possint. E quorum numero ea quae nobis in tractanda epistula occurrerunt nec veri similitudine prorsus destituta esse videantur, ad finem libelli reiecta addere non supervacaneum esse censuimus, imprimis cum iis allatis scrupuli quidam recentioribus de epistulae origine iniecti magnam partem eximi posse videantur. Iam igitur ad id quod suscepimus aggrediamur.



I.

V. 139 sq. Sappho collatione adhibita sui in Phaonem insani amoris ardorem describens cum femina a furiali Erichthone quadam acta esse comparat:

„Illuc mentis inops, ut quam furialis Erichtho*)

Attigit, in collo crine iacente feror“.

Quod Erichthonis nomen cum hoc loco excepto in Latinis litteris primum apud Lucanum (Phars. VI, 508) legatur, ubi veneficam quandam Thessalam ita appellatam esse comperimus, recentiones Lachmannum secuti**) eo tamquam firmissimo argumento utebantur, quo nisi epistulam spuriam et Latinis litteris iam senescentibus aut decrepitis ab imitatore quodam confectam esse contenderent, qui id nomen a Lucano mutuatus ipse sagacibus eorum animis ad fraudem detegendam manifestam ansam praeuisse videbatur. Inter quos Lucianus Müller***) tantam vim ei nomini tribuit, ut ex eius sententia ceteris integris propter id solum de Ovidio epistulae auctore addubitandum sit. Contra Lachmannum quaedam pro-

*) Nomen proprium in fine hexametri positum ne unus quidem liber ms. integrum servavit. Vriesio teste (Epist. Sapph. ad Phaon. p. 29) optimi codd. Harleianus (H) Fuldensisque (F) habent eritho, Francofurtanus (f) Enyo; in libris autem inferioris notae exstant hae variae lectiones: ericto (plerumque), herecto, erypto, ericta, enio, Erinnis, erinis.

**) V. Ind. lectt. univers. Berol. 1848 aest., p. 3, coll. Vries. l. l. p. 135.

***) De re metrica p. 49.

lata sunt a Comparettio *) et Vriesio **), quamquam hic quoque illud nomen potius removendum esse ex epistula libere fatetur. Quapropter de codicis f scriptura recipienda collatoque Petronii (CXX 6 sq.) loco de epitheto furialis in feralis mutando cogitabat; attamen proposita coniectura ne ipsi quidem auctori arrisit, quamobrem quaestio in suspensio ab eo relicta est***). Itaque 'grammatici certant et adhuc sub iudice lis est'.

Attamen nihilo secius mihi levi medela adhibita dubius locus optime sanari posse videtur. Quis enim est, qui nesciat, quanto opere imprimis nomina propria in optimis quoque libris mss. depravata sint? Quod hoc quoque loco statuendum est ita, ut ne una quidem codicum scriptura accipienda sit, quamquam in duabus in CTO desinentibus alterius partis nominis a poeta scripti vestigia exstare videntur. Persuasum enim habeo ab Ovidio hoc loco unam e Furiarum numero, ALECTOnem, prima syllaba correpta nominatam eiusque nomen in corrupta lectione latens reponendum esse. Nam si rationem palaeographicam spectas, depravata scriptura in quinque illis variis lectionibus non tam longe a proposita emendatione recedit; En y o vero coniecturae debetur, Er i n n i s autem pro genuinae scripturae explicatione accipiendum esse videtur. Porro sententia quoque optime procedit; Furiam illam Romanorum poetis haud ignotam fuisse docet illa Vergiliana de Amata ab Alectone in furorem acta narratio, quam

*) V. eius disquisitionem, quae inscribitur: «Sull' autenticità della epistola Ovidiana di Saffo a Faone» in Pubblicazioni del R. Istituto di studi superiori in Firenze, vol. II, 1 (1876) p. 19.

**) l. l. pp. 136—138.

***) Cf. l. l. p. 138: «Cum tamen nullum aliud talis Enyus vestigium apud antiquos scriptores repererim, hanc quidem rem in incerto relinquere tutius videtur».

Aen. VII 341 sqq. legimus *), unde etiam perspicui potest furialis epitheton in eam deam optime quadrare neque mutando opus esse **). Ovidius, cui hoc loco Vergilianae Aleetus descriptionem ante oculos obversatam esse haud improbabilius conici potest, ipse Heroid. II 119 his verbis eius Furiae mentionem facit: 'Adfuit Allecto'. Quomodo autem corruptela orta sit, optime hoc modo explicari potest. In codice quodam antiquo scriptum erat illud genuinum *Alecto*, ad quam vocem explicandam haec glossa appicta erat: *Erinyes*. Librarius autem contaminata scriptura ex utroque verbo novum conglutinavit, cuius priorem partem *ERI* e glossa, posteriorem autem *CTO* e nomine in epistulae contextu exstante sumpserat. Ita nata esse videtur monstruosa illa plurimorum codd. lectio *ERICTO*, quae postea, prout cuique visum est, corrumpebatur aut emendabatur.

Unum tantum est, quod primo aspectu nostrae coniecturae adversari videatur. Et apud Vergilium et apud Ovidium haec vox geminata l littera scripta reperitur; quod a lingua Graeca profecti ita explicabimus. Nomen *Ἀλκτω* derivatum est a verbo *ἀλγειν* α privativo quod dicitur praefixo, significatque non cessantem, indefessam, quo nomine Furia sine ulla intermissione victimam suam exagitans aptissime designata est***). Itaque, quod ad originem nominis attinet, *Ἀλκτω* simplici l littera exarata bacchium efficit. Apud Graecos

*) Cf. imprimis v. 405:

Reginam Allecto stimulis agit undique Bacchi.

**) Furiae ipsae Pausania teste (VIII 24, 1) circa Megalopolin *Μανίαι* appellabantur et apud Aeschylum quoque (Eumen. v. 499) *μανιάδες* vocantur, cum id quod efficiebant, ut in furem conicerent, sollemni usu ipsis ascriberetur. Cf. Roscheri Lexicon der griech. u. röm. Mythol. p. 1325.

***). Cf. Etym. M. p. 62, 44: *Ἀλκτων, ἀκατάπαυστον· καὶ ὄλητος δ ἀκατάπαυστος καὶ πολὺς*.—Minus recte Pott Aleetus nomen per adiectiva *implacata, implacabilis* interpretatus est, v. Kuhns Zeitschrift. T. V. (1856) p. 270.

autem poetas iam inde ab Homero brevem vocalem ante l litteram produci, ubi „metri causa“ longa syllaba opus erat, in vulgus notum est *); quae productio nonnunquam in libris mss. duplicata littera indicatur. Itaque Graecus poeta scribere potuit Ἀλγκτω vel Ἀλλγκτω, quam licentiam ne a Romano quidem poeta alienam fuisse manifesto exemplo planum faciam. Chiron, cuius matri Philyrae nomen fuit, ab Ovidio Met. II 676, Fast. V 391 Philyreius heros prima syllaba correpta nominatur: attamen ab eodem matris nomine Ovidius aliis locis alterum nomen derivavit, ut Fast. V 383, A. A. I 11, Phillyridem dico, prima syllaba producta. Quodsi poeta in eodem carmine intra novem versuum spatium ea licentia usus est, in Alectionis quoque nomine admittendum esse videtur **).

Quae si recte disputavimus, non est, cur nobiscum locum corrigere dubites.

II.

Supra p. 5 nostram Heroidem CCXXII versus amplecti monuimus; nunc ad illud distichon, quo numerus versuum in omnibus fere editionibus obvius augetur, revertimur. Versum 32 in solo Harleiano codice haec duo disticha excipiunt:

*) Cf. Hom. II. v. 1: Ἀχιλλῶς cum v. 7: Ἀχιλλεύς; alia exempla supeditabit La Roche in Iliad. tertium ed. prooem. p. XXVI. Verbum ἀπολήγειν tum per unam (II. VI 149), tum per geminam l litteram (Od. XII 224) scriptum reperitur. Sane in Alectus nomine molossus bacchio longe frequentior est, cum ita ipso nominis numero gravitas quaedam apte describatur; in adiectivo quoque ἄλγκτος in hexametro rarissime primam syllabam non produci docet Thesaur. s. v., ubi hoc epigramma (Anth. gr. App. 136) allatum est:

Ἰλιχετο δ' ἐν νεκύεσσιν, λιπὼν πατρὶ πένθος ἄλγκτον.

**) Ceterum fluctuatio id genus saepius occurrit; ita apud Horatium (Carm. III, 4, 9) vox Apulo creticum efficit, proximo autem versu Apuliae iambicam dipodiam (nisi mendum subest). De illis decantatis: relligio, reliquiae, cet. non est quod moneam; v. Christ. Metrik. (ed. 2) p. 25.

33a Nec me despicias, si sim tibi corpore parva

34a Mensuramque brevis nominis ipsa fero.

33 Sum brevis, at nomen quod terras impleat omnes

34 Est mihi: mensuram nominis ipsa fero.

Ceteri autem libri mss. omittunt aut prius, aut quod in longe plurimis factum est, posterius distichon *); utrumque retinendum esse demonstrabat Baehrens **), cuius tamen ratiocinatio neque Sedlmayero, qui a. 1886 *Heroides* accuratissimo apparatu critico instructas Vindobonae edidit, neque Ehwaldio ***) satisfecit; Vries denique quamquam in universum Baehrensii sententiam amplexus est, tamen pentametrum prioris distichi 'foede corruptum esse' statuit, quippe qui cum proximis non concordet, totamque rem tam misere perturbatam esse lamentatur, ut de restituendo loco desperandum sit ****).

Mihi quoque utrumque distichon Ovidio vindicari posse videtur, modo sententiarum nexus accuratius perpendatur. Ovidius enim vv. 34a, 33, 34 $\Sigma \alpha \pi \varphi \omicron \upsilon \varsigma$ nomine lepidissime ludit, quem lusum haud scio an nemo omnibus numeris cogitatione assecutus sit. Mihi enim sententia hoc modo procedere videtur: Sappho Phaonem orat, ne ipsam propter humilem staturam contemnat (v. 33 a); notio autem humilis staturae proximo v. pentametro comparatione addita repetitur, ubi, ut Baehrens recte vidit, poetria exigua corporis sui mensuram cum brevi suo nomine componit, quod e duabus tantum syllabis constat. In quo nihil inest

*) En tibi Vriesii de hoc loco testimonium (l. l. p. 23 coll. p. 50 sq.): «Vss. 33a—34. duo haec disticha exhibet unus H. vss. 33a—34a omittit f (et vss. 33—34 statim post 32 sunt in codd. exc. Paris. 7647 et 17903). Omnes ll. praeter H et f habent 33a—34a, omittunt 33—34».

**) V. Rivista di Filologia anno XIII fasc. I^o (1884) p. 16.

***) V. Bursian's Jahresbericht T. XLIII p. 218 coll. novissima ed. Teubneriana.

****) Cf. l. l. p. 51: «Quomodo autem v. 34a a poeta fuerit scriptus, nulla unquam conjectura quisquam assequetur».

‘nimis insulsi et inficeti poetaeque ingenio prorsus indigni’ (Vriesii sunt verba), si poetria breve nomen pusillae suae staturae respondere contendit: tantum enim abest, ut Ovidius a u s t e r o ingenio fuerit, ut ludibundas sententias eum in deliciis habuisse constet *). Porro tertio versu ineunte verbis „sum brevis“ poetria concedit quidem se illo vitio affectam esse (quae concessio s a n e praefixo planius exprimi possit); in iis vero, quae sequuntur, illi vitio poetriae fama opponitur, qua illud naturae damnum quodammodo compensatur: „Sane“, inquit, „sum brevis, at c l a r a“. Cum autem Σαπφοῦς nomen, quod ab adiectivo σαφής derivatum esse alio loco (p. 77) ostendimus, in linguam latinam conversum C l a r a m significet, poetria ab eiusdem nominis latina significatione exorsa tale nomen sibi esse ait, quod totum mundum implere possit **); verbis denique, quae alterum distichon claudunt, Sappho testatur a se revera id possideri, quod nomine sibi indito exprimatur, h. e. claritatem. Ita nodus quamvis implicatus mihi solvendus esse videtur ***). Quod autem colon „mensuram

*) Hanc quaestionem tractavit Mercurino Sappa in Rivista di Fil. XI (1883) p. 347 sqq.; v. Bursian. l. l. p. 149 sqq.

**) Cf. v. 28: iam canitur toto nomen in orbe meum.

***) Non me fugit mihi difficilem locum ita explicanti obici posse Σαπφοῦς vocem significare quidem Claram, in graeco autem adiectivo σαφής non inesse eam vim atque significationem, quam latini homines suo adiectivo tribuerint. In qua re Ovidium errasse sumendum est: Romanis enim nonnunquam accidisse, ut graeca verba perverse interpretarentur, multa exempla docent; ita illud Homericum (Il. I 470) κρητῆρας ἐπεστεψαντο ποτοῖο a Vergilio ita expressum est (Aen. I 724): creteras magnos statuunt et vina coronant.—Sane concedendum est ad eiusmodi lusum melius quadraturum fuisse Κυθροῦς nomen, quod supra restituimus. Ceterum tales lusus, ubi ‘nomen omen’ est, apud antiquos saepissime reperiuntur, ut apud Homerum (Od. XVII 292, 308, 315 de Argo cane), apud Euripidem (Phoen. 1495 de Polydice), apud epigrammatum auctores, ut in illo Simonideo propter σὺν κίβδαλον memorabili epigrammate (fr. 168 apud Bergkium):

Σῶσος καὶ Σωσώ, σῶτερ, σοὶ τόνδ’ ἀνέθηκαν,

Σῶσος μὲν σωθείς, Σωσώ δ’ ὅτι Σῶσος ἐσώθη.

nominis ipsa fero“ uno hexametro intermisso repetitur, in eo non est offendendum, quoniam tantum verba sunt utroque loco eadem, sensus autem immutatur, cum mensurae vocabulum priore loco proprie positum *M a a s s* significet, posteriore autem translate usurpatum per verbum *B e d e u t u n g* converti possit; utramque autem significationem vimque in ea voce inesse lexica satis superque docent. Itaque si lectio codicis Harleiani commode explicari potest, quod nos fecisse nobis videmur, non est, quod in illo codice genuina Nasonis verba servata esse infitias eamus. Quod autem omnes fere libri mss. posterius, non prius distichon omittunt, cum Baehrensio ita explicandum esse mihi videtur: librarii oculi, novissima v. 34a verba *n o m i n i s i p s a f e r o* exarantis ad eadem verba v. 34 repetita aberraverunt, unde factum est, ut in eo libro, ex quo vulgata fluxit, posterius distichon prorsus omissum sit. Itaque hoc casu accidisse concedendum est; in cod. autem Francofurtano excerptisque Parisinis prius disti-

Quibus Philodemi quoque iocantis epigramma addi potest, quo nominis sibi inditi haud insulsam explicationem affert (Anthol. Pal. V, 115):

*Αὐτὰς πού μοιρά με κατωνόμασαν Φιλόδημον,
ὥς αἰεὶ Δημόδους θερμοῦς ἔχει με πόθος.*

Ovidius, cuius elegiam epigrammatico lusu plenam esse iam Birt recte observavit (v. Rhein. Mus. N. F. T. XXXII p. 428), et epigrammatis legendis et in rhetorum scholis ita ludere addidicisse potuit. Iam Aristoteles (Rhet. II 23) multa eius generis exempla afferens talem ratiocinandi locum a nomine ductum *τόπον ἀπὸ τοῦ ὀνόματος* appellat. Quintilianus quoque Instit. or. IX 3, 69 sq. traductionis exempla docens haec habet: «Aliter quoque, inquit, voces eaedem diversa in significatione ponuntur; quod etiam in iocis frigidum equidem tradi inter praecepta miror eorumque exempla vitandi potius quam imitandi gratia pono». Ex exemplis vero, quae ibid. sequuntur, ad nostram rem novissimum facit: «Et apud Ovidium ludentem:

Cur ego non dicam, Furia, te furiam?»

Alia Ovidiana exempla Vries l. l. collegit, e quibus imprimis ex Ponto I 2, 1 cum hoc epistolae loco conferri potest:

M a x i m e, qui tanti mensuram nominis imples.

Ut igitur poeta alias lusit, ita hoc loco ad eandem rem *S a p p h u s* nomine usus est.

chon non casu, sed de industria omissum esse videtur: cum enim scriba Nasonis nitidum lusum non comprehenderet, prius distichon dittographiam quandam esse arbitratus missum fecit.

Haec fere sunt, quibus additis Baehrensii sententia sustentari posse mihi videatur,

III.

Iam ad singula quaedam epistolae verba convertamur videamusque, num homines docti iure in iis offenderint. Huc referuntur primum duo graeca verba, chelys v. 181 et barbitos v. 8, quae lyram valent *); utrumque Birtio inter alia in causa fuit, quare hanc epistolam spuriam et a versificatore quodam aetatis Neroneae confectam esse contenderet **). Attamen si demonstrari potest utrumque vocabulum in Sapphus carminibus exstitisse, illa suspicio ad nihilum recidat necesse est. Et revera, apud poetriam et χέλυνα (v. fr. 169, corr. Bergk.) legebatur et ipsum χέλυσ nunc quoque legimus fr. 45:

Ἄγε δὴ χέλυν διὰ μοι
φωνάεσσα γένοιο.

Alterius quoque vocabuli usum a Sapphone haud alienum fuisse fr. 154 ex Athenaeo (IV 182 F) sumptum docet, ubi legimus: Τὸν γὰρ βάρωμον καὶ βάριτον, ὧν Σαπφῶ καὶ Ἀνακρέων μνημονεύουσιν... ἀρχαῖα εἶναι. Itaque haec quoque duo vocabula ex illo fonte, ut multa alia,

*) Cf. Bekk. Anecd. p. 1431: χέλυσ χέλυσ σημαίνει δὲ τὴν κιθάραν. De utraque voce v. quae diximus supra p. 31 sq.

**) Cf. l. l. p. 388 ann. 2: «Chelyn—inquit—poeta Romanus nullus applicavit ante Senecam... Silium... Panegyricum in Pisonem; frequenter Statius». Porro ibid.: «Barbitos aliena ab Ovidio poetisque his omnibus praeter meļe Horati (recurrīt apud Claudianos)».

in Ovidii epistolam fluxerunt *). Quae si tenemus, omnibus ceteris, quae Vries l. l. p. 142 sq. ad excusandum utrumque vocabulum attulit, supersederi posse opinor.

Eidem Birtio l. l. epitheton *aequoreae* offensioni fuit **), pro quo Baehrens l. l. p. 18 *aequales*, Vries autem l. l. pp. 108, 144 *aequaevae* coniecerunt, cum lectionem corruptam esse persuasum haberent. Attamen hic quoque tradita scriptura defendi potest: cur enim primum non concedamus poetae, ut eo quod proprie de ipsa insula dici potest, ad incolas eius translato insulanas *aequoreas* *καταχρηστικῶς* dicat? Quocum graecum *ἀμφιάλος* conferri potest, quod proprie de insulis dicitur, ut de Ithaca apud Homerum, de Lemno apud Sophoclem (Phil. v. 1464); attamen nihilominus apud Homerum (Od. VIII 114) *Ἀμφιάλος* est nomen proprium uni e Phaeacibus inditum, qui Scheriam insulam incolebant. Porro ab Aeschylo Pers. v. 558 classici *θαλάσσιοι*, a Sophocle (Ai. v. 880) piscatores *ἀλιάδαι* nominati sunt. Pindaro quoque Isthm. I, 8 Cei insulani sunt *aequorei viri* ***). Eodem modo, ut iam vidimus, Ovidius ipse Britannos appellavit *aequoreos*. Quam licentiam hic quoque poetae concedere licebit, imprimis si eius animo graecum aliquod vocabulum (e. g. *ἀλιάδες*) obversatum esse ponamus. Quod autem illud adiectivum minus apte hic positum esse idem

*) Non enim probanda est Burmanni sententia, qui Ovidium v. 8 Euripid. Alcest. v. 345 imitando expressisse putabat, cf. J. Chr. Wolfii Sapphus poetriae Lesbiae fragg. et elegg. p. 183.

**) «Puellis—inquit—Lesbiacis in v. 199 inepte adponitur adiectivum «aequoreae», quasi ibi referret eas esse insulanas; plane insolitam hanc adiectivi notionem addidit poeta ex Ovidi Met. XV 753 (aequoreos Britannos), ubi positum est aptissime».

***) Verba Pindari sunt:

*Φοῖβον χορεύων
ἐν Κέφ ἀμφιρῦτα σὺν ποντῶις
ἀνδράσιν.*

statuit, id potius ex epithetorum constantium quae dicuntur usu explicandum esse videtur: quotiens enim e. g. Achilles apud Homerum *πρόδας ὤκυνς* dicitur, ubi eum hac in re excellere minime refert? quotiens Aeneas apud Vergilium pius, ubi minime opus est pietate? *) Itaque mea quidem sententia ad explicandum quam ad resarciendum locum confugere satius erit.

V. 100 verba „Lesbi puella“, quibus Phaon Lesbum relinquens poetriam alloqui debebat, Mure l. l. p. 592 documento esse putat Sapphonem neque cum quoquam coniugio iunctam, neque viduam, sed caelibem fuisse**). Quocum minime faciemus neque vocis puellae vim urgebimus, quae hoc loco non ad aetatem, sed tantum ad sexum designandum adhibita sensu latiore feminam significat. Simili modo Ovidius Epist. I, 3 eodem verbo usus est:

Troia iacet certe, Danais invisa puellis.

Non enim virgines Graecae Troiam detestantur propter eorum, quibus nubant, inopiam, sed potius uxores Graecorum contra Troiam profectorum, ut ipsa Penelopa, quam poeta illam epistulam scribentem facit. Neque aliter Laodamia, Protesilai uxor, hoc verbo usa est Epist. XIII, v. 105:

Nox grata puellis***).

Quid? Horatius quoque ipsam Sapphonem Carm. IV, 9, 12 „Aeoliam puellam“ nominavit:

*) Simili modo Heroid. XIV 23 Pelasgo nulla certa ratione addita magni epitheton additum est. Birt ipse l. l. p. 424 imbellem eum vocat ibidemque p. 416 illud adiectivum non sine certo graeco exemplo ab Ovidio appositum esse statuit. Qui si sibi constare voluisset neque ad aliam amussim Ovidium, ad aliam hunc quem dicit Neroneum poetam recensuisset, hic quoque eadem explicatione uti debebat.

**) Who—inquit—can believe that Ovid... would have made Phaon adress a middle aged widow by the title of «Lesbi puella»?

***) Alia Ovidiana exempla v. apud Vries. l. l. p. 78.

Vivuntque commissi calores
Aeoliae fidibus puellae.

Itaque hoc quoque loco Lesbi puella tantum idem significat atque Graecum $\Lambda \epsilon \sigma \beta \iota \varsigma$, ut Sappho et in epigrammatis et in nummis saepissime appellata est, neque quidquam de poetriae matrimonio inde concludi potest.

IV.

V. 7 in definienda carminis elegiaci notione in plurimis membranis unius syllabae lacuna exstat; ita enim legimus:
elegi † flebile carmen.

Quae lacuna in duobus libris addita redundante aliqua vocula, ut q u e, q u o q u e, perverse suppleta est. Recentiorum autem plerique cod. Maffei scripturam E l e g e i a receperunt *); cum vero Elegiae vox aliis locis apud Ovidium non elegiacum carmen, (quod e l e g i valent), sed fictam quandam elegiacae poesis deam significet, Baehrens l. l. p. 7 vulgata illa lectione spreta post primum verbum s u n t excidisse suspicatus ita lacunam supplevit:

elegi s u n t flebile carmen.

Quae coniectura optime sese habet: nam additum a Baehrensisio verbum in codice archetypo per compendium f litterae simile fortasse scriptum erat propterque proximam f litteram, a qua flebile vocabulum exorditur, a librario facillime omitti potuit **): Porro autem fieri potuit, ut alius librarius archetypi

*) V. Vries l. l. pp. 21, 39 vel Sedlmayer l. l. ad h. v.

**) Blassio teste (v. J. Mülleri Handbuch d. klass. Altertumswissenschaft T. I tab. VI) verbi s u n t haec compendia scripturae exstant: $\bar{\text{f}} \bar{\text{s}}$, $\bar{\text{f}} \bar{\text{r}}$. Quae conf. cum f litterae variis scribendi modis ibid. tabb. IV et V.

compendio perperam intellecto pro s u n t reposuerit q u e vel q u o q u e, ut legitur in codd. Hamburgensi (h) et Francofurtano (f) *). Totum autem hoc colon describit elegiacae poesis vim, non antiquiorum quidem Graecorum, sed Alexandrinorum, quorum definitio cum hoc loco apte conferri potest **).

Baehrensii simplicissima correctio non satisfacit Vriesio, qui l. l. p. 40 e l e g o s iam in priore colo eius versus desiderans hoc modo versum corrigi iubet:

Flendus amor meus est elegis: hoc flebile carmen.

Putat enim illos elegos priori colo addendos esse, quoniam per se intellegatur poetriae suum amorem deplorandum esse; quaeri autem, quo modo id fieri debeat, h. e. quod poesis genus ad eam rem adhibendum sit. Quod tamen minus verum est: priore enim loco summa vis posita est in primo verbo *f l e n d u s*; minime autem contendendi potest per se quemque intellegere Sapphoni amorem deflendum esse; hoc patet ex iis, quae infra sequuntur, non vero iam ex initio epistulae. Tota autem sententia hoc modo procedit: Quaerenti Phaoni, cur Sappho non lyrico, (quo solebat), sed elegiaco metro in condendo carmine utatur, poetria respondet sibi tum flendum esse, quapropter se adhibere elegiacum, quod flendo conveniat, non autem melicum metrum***) Quibus ita explicatis Baehrensianam coniecturam Vriesianae praeponendam esse censeo.

*) Voculae q u e scribendae compendia v. apud Blass. l. l. tab. VI.

**) Cf. Procli chrestom. (in Westphal. Scriptt. metr. I p. 242: τὸ γὰρ θρῆνος ἔλεγον ἐκάλουν οἱ παλαιοί . . — Suid. s. v. ἔλεγος: θρῆνος. — Eustath. II. 1372: ἔλεγοι ὃ ἐστὶ θρῆνοι. V. Flach. Geschichte d. griech. Lyrik p. 175 sq.

***) Ehwald l. l. p. 219 et in ed. Teubn. cum aliis e l e g i verbo producendo ita, ut pro perfecto tempore verbi eligendi accipiendum sit, lacunam explendam esse pertinaciter contendit: attamen et ipsum verbum illa Procrustea medela

V.

Initio huius libelli expositum est, quot quantaque auctoritatis homines docti Sapphus epistulam summo cum taedio aspernati sint ac respuerint; nunc ad eam rem revertimur. Duae autem praecipue res sunt, quae hominum doctorum stomachos contra epistolae auctorem moveant, primum quod rustice obscene inverecundeque de coitu verba faciat, tum quod poetriam calumniatur. Iam igitur quid de utroque sentiamus, sub finem breviter expediamus.

Quod ad prius attinet, sane non in animo est nobis Romanum poetam defendere, at saltem excusare. Quis enim est qui nesciat, quanta cum libertate veteres scriptores in rebus Venereis narrandis versati sint? Si contuleris e. g. vv. 142—150 huius epistolae cum Propertii V, 7, 19 sq., vel descriptionem eorum, quae Sappho a Phaone relicta per somnum videt, imprimis v. 133 sq., cum iis, quae Horatius Satir. I, 5, 82—85 de se ipso a perfida ancilla decepto narrat, facere non poteris, quin Ovidianas descriptiones earundem rerum verecundiores esse mihi concedas. Attamen Teuffel utrumque epistolae locum damnavit*). Multo sanior Welckeri sententia mihi esse videtur, qui ex his similibusque Ovidianis locis epistolam genuinam esse concludebat**). Itaque si eadem aestimatione omnes illos locos metiemur, omnes damnandi respuendique erunt***).

effectum nimis languet (ich habe gewählt), et elegiaci carminis nomen, in quo hoc loco cardo vertitur quodque opposita vox barbitos (h. e. melicum carmen) satis superque tuetur, ita deleretur. Quamobrem vix quemquam Ehwaldio astipulaturum esse crediderim.

*) Cf. eius Geschichte der röm. Literatur ed. tert. p. 528 in.

**) Vv. 46 sqq. 133 sq. vocantur a Welckero «ächt Ovidisch», v. Kleine Schriften P. II p. 120.

**) Ceterum quod ad Ovidium attinet, non praetermittendum esse puto hoc loco Ehwaldii sententiae mentionem facere, quam in Kaibeliani libri censura l. l. p. 174 his verbis expressit: «Die Anführungen Kaibels... geben

Iam alterum videamus. Homines docti, qui poetriam Lesbio crimini obnoxiam fuisse credebant, duobus huius Heroidis locis tamquam firmissimo argumento ad opinionem suam sustentandam utebantur. Ita ante Welckerum fere omnes excepto quidem Heinsio, qui iam ante hos centum annos Ovidium incusans poetriae ut poterat patrocinator est*); ita post Welckeri Sapphus apologiam Mure**). Attamen ex iis ipsis epistulae locis, qui huc referri possint, recte intellectis atque explicatis poetriam in hac saltem epistula non solum a Romano poeta non aspersam esse infamia, sed innocentiam eius aperte indicatam esse concludi potest. Quod cum iam ante hos tres annos a Vriesio l. l. pp. 44 sq., 109 egregie enodatum esset, non erat repetendum, nisi nuper Ehwald l. l. p. 222 illa Vriesiana explicatione posthabita lectiones a Baehrensio probatas amplexus esset. Poetae verò sententia tum optime perspici poterit, si a graecis verbis Sapphus vitae ab Alexandrino quodam homine litterato concinnatae ordiemur, qua et Ovidium et Suidam usos esse supra vidimus. Suidas enim s. v. Σαπφῶ tribus e poetriae amicarum numero nominatis haec addit: πρὸς ἃς καὶ διὰ βολὴν ἔσχε αἰσχρᾶς φιλίας. Verba autem διαβολὴν ἔσχε nihil aliud

einen neuen Nachweis, ... dass die geschilderten Situationen—(de Amoribus loquitur)—und gerade die dem Dichter am meisten zum Vorwurf gemachten zumeist—nichts weiter als litterarische an vorhandene Vorbilder sich anschliessende und von Anderen behandelte Motive ausführende Fictionen sind, dass also die Versicherung Ovids: vita verecunda est, Musa iocosa mea (Trist. II 354) durch diese Gedichte wenigstens nicht widerlegt wird.—Ita idem Kaibel Amor. I, 5, 10 sqq. ex Philodemo (Anthol. Pal. V 132) imitando expressa esse docuit.—Quibus ea quoque addi possunt, quae poeta de concumbendi variis modis A. A. III 771 sqq. (coll. ibid. II 679 sq.) docet, quae ex Philaenidis illo famoso libro, qui περὶ σχημάτων συνουσιαστικῶν inscribatur, Ovidium mutuatum esse probabiliter mecum conicere poteris. De quo libro cf. Welcker. l. l. p. 87 ann. coll. Bergk. ad Aeschrionis iambogr. frag. 8.

*) V. Welcker. l. l. p. 143.

**) V. Rhein. Mus. N. F. XII (a. 1857) pp. 587 adn. 12, 589.

significant nisi hoc: calumniabantur eam, falsum crimen ei intendebant. Eandem sententiam inesse in duobus Ovidianis locis, qui huc spectant, iam ostendam. Quorum prior v. 19 exstat, ubi Sappho de sua cum puellis consuetudine haec dicit:

Quas non sine crimine amavi*).

Cum igitur interpretes sub criminis voce culpa m intellegerent, poetria ab Ovidio iis infamata esse videbatur, imprimis cum „non sine crimine“ per litoten dictum maxima cum culpa significaret. Quod propterea quoque offenderet, ut Welcker. l. l. p. 119 recte observavit, quod Sappho, quae per totam epistulam de suo erga unum Phaonem amore loqueretur, male rem suam ageret, si tam aperte libereque nefarium crimen confiteretur, quod confessa Phaonem minime ad se allexisset. Quamobrem plerique homines docti, qui hanc epistulam tractabant, illam alteram codicum lectionem, in quibus non in hic (sc. in Lesbo insula) mutatum legitur, praetulerunt, quo factum est, ut Sappho hoc versu famam suam contra calumniatores defenderet. Nihilominus tamen eam lectionem, quae optimo libro nititur, retinere licet, si criminis vocem hoc loco non pro culpa, sed pro culpandi causa acceperis, quam notionem in ea voce inesse non est, cur exemplis allatis confirmem. Itaque Sappho illo colo haec vult dicere: quarum amor causa fuit sceleris mihi obiecti. Si vero illa verba non sine crimine in Graecam linguam ita converteris ut idem significant atque οὐκ ἀδικαβλήτως, non erit, cur et de eodem fonte et de eadem vi ac significatione cum latinorum tum graecorum verborum dubites.

*) Vriesio teste non exstat tantum in codd. Francofurtano (f) et Hamburgensi (h); defendit post Naugarium (v. J. Chr. Wolf. l. l. p. 186) Vries l. l. p. 44 sq.; hic (pro non) habent reliqui ll. mss., quod post alios Baehrens l. l. p. 19 tuetur, quocum facit Ehwald l. l. p. 222; Burmannus (v. J. Chr. Wolf. l. l.) nec reposuit, fortasse, ut Vries coniecit, rationem palaeographicam secutus; quae lectio Bentleio quoque arrisit.

Alterum locum v. 201 habes, ubi haec leguntur:

Lesbides, infamem quae me fecistis *a m a t a e* *).

Quodsi horum quoque verborum significationem ita interpreteris: „quarum amor causa vel fons meae infamiae fuit“, nihil ex eo versu concludes, nisi Ovidii aetate illum quidem de Sapphone rumorem divulgatum fuisse, famam autem eius a Romano poeta hoc quidem loco minime esse pollutam**). Si denique hunc quoque versum cum graecis comparaverimus, facere non poterimus, quin in latinis non solum eandem sententiam, sed etiam ipsa graeci exemplaris verba expressa esse statuamus: quid est enim aliud *infamis facta sum* nisi *διαβολὴν ἔσχον*? ***)

Itaque hoc modo utroque loco explicato non erit, cur in Ovidium invehamur vel etiam Heroidem damnemus. Sane concedendum est non omnia in ea esse ad unguem perpolita multaue dici potuisse decentius atque brevius****); quae cuncta

*) Lectio *a m a t a e* in solo cod. Francofurtano (f) servata est; pro ea omnes reliqui libri mss. habent corruptum verbum *a m a r e*, ex quo Baehrens l. 1. 19 applaudente Ehwaldio (l. 1. p. 222 et in ed. Teubn.) *a m o r e* refinxit.

**) Sane aliis locis Ovidius aliter sentit; ita A. A. III 331:

Nota sit et Sappho,—quid enim lascivius illa?

Porro Trist. II 365:

Lesbia quid docuit Sappho, nisi amare puellas?


ubi recentiores virgula post *a m a r e* posita (vide ed. Merkelii) locum castrabant.

***) Origo illius de Sapphus cum amicis nefaria consuetudine optimè explicatur καθ' ὁμωσύμην: cum enim Sappho amicas suas ἑταῖρας in carminibus ardoris plenis appellasset (cf. fragg. 11, 83), ἑταῖρα autem apud posteriores *meretricem* significaret (cf. Athen. XIII, 751 D), homines Graeci genuinam eius verbi vim non intellegentes sive de industria perverse interpretati illam fabulam finxerunt. Quam famam postea divulgatissimam fuisse Senecae verba (Epist. 88) testantur, qui Didymum illum Chalcenterum doctam disquisitionem scripsisse narrat, cuius titulus erat: An Sappho publica fuerit?

****) De amplificandi studio Ovidii cf. Senecae Controv. II, 9, 28 iudicium iam a Teuffelio l. 1. p. 521 allatum: «Ovidius nescit quod bene cessit relinquere». Idem rhetor ibid. II, 10, 12 testatur Ovidium nonnunquam de industria corrigenda non correxisse, cum interdum decentiorem faciem esse contenderet, in qua aliquis naevus remaneret. Quod homines docti Ovidiana corrigentes non semper ita ut par est respiciunt.

potius Ovidii rhetoricis studiis et iuvenili aetate, ad quam haec quoque epistula referenda esse videtur, excusanda sunt, quam ut propterea Heroidem spuriam esse statuamus.

Haec erant, quae nobis addenda esse videbantur. In quibus inter nos ceterosque, qui huic epistulae operam navabant, id discriminis intercedit, quod nos praecipue Graeca lingua adiutrice adhibita Ovidii Graecorum discipuli verba corrupta aut falso intellecta restituebamus vel explicabamus. In quo si quid prae ceteris vidimus, quod veri similitudine non omnino destitutum esse videatur, novum documentum dedimus eius, quam perverse agant, qui Romanas litteras tractantes Graecos, a quibus latini homines fere in omnibus pendent, non asciscendos esse arbitrantur.



Index locorum,

qui in hac commentatione emendantur vel
explicantur

Chronic. Par. v. 51.	Pagg. 68 sqq.
----------------------	------------------

Ovid. Sapph. epist. v. 7	108 sq.
“ “ “ “ 8	105 “
“ “ “ “ 17	88 sqq.
“ “ “ “ 19	111 sq.
“ “ “ vv. 33a, 34a	101 sqq.
“ “ “ v. 100	107 sq.
“ “ “ “ 111	26 *).
“ “ “ “ 139	98 sqq.
“ “ “ “ 181	105 sq.
“ “ “ “ 201	113.

Sapph. frag. 22	20 ***).
“ “ 46	32 **).
“ “ 71	89 sq.
“ “ 110	21.
“ “ 125	26 **).
“ “ 130	31 **).
“ “ 138	30 *).

Suid. s. v. Σαρπώ.	83 sqq.
“ “ “	88 **).
“ “ Φάων	60.

Timocl. Sapph. frag.	82 sq.
----------------------	--------






A FINE IS INCURRED IF THIS BOOK IS
NOT RETURNED TO THE LIBRARY ON
OR BEFORE THE LAST DATE STAMPED
BELOW.

DEC 10 1973

4127471

Le 10.718
Quæstiones Sapphicas.
Widener Library

005675304



3 2044 085 214 476

